

ဗျာဒိတ်တော်

ယောဟန်ဟို ဖွမ်ပြဟူ ဗျာဒိတ်တော်

နိဒါန်း

ယောဟန်ဟို ဖွမ်ပြဟူ ဗျာဒိတ်တော်ဟာ ဓမ္မသစ်ကျမ်းရဲ့ နှော-က်ဆောင်းကျမ်း ဖြစ်ဟယ်။ အယ်ကျမ်းဟို တမန်တော် ယောဟန်ဟု ခရစ်တော် မွီးဘီးန ငှ၅ ခုနှစ်လော့-က်ဟု ရေးဟူးလေဟယ် (၁.၁)။ သူဟာ ယောဟန်ရေးဟူးဟူ ဒန်းကောန်းန ပေးစာသောင်းစောင်ဖြစ်ဟူ ယောဟန်ရဲ့ ပထမပေးစာ၊ ယောဟန်ရဲ့ ဒုတိယပေးစာန ယောဟန်ရဲ့ တတိယပေးစာလေဟိုလည်း ရေးဟူးလေဟယ်။ ယောဟန်ဟာ “ယေရှုရဲ့ ရှစ်ဆောင်း” တဗွဲတော်တပါး ဖြစ်နလည်း သိဂေဟယ် (ယော ၁၃.၂၃)။ သူဟာ ယေရှုခရစ်တော်ရဲ့ ဒန်းကောန်းဟို ဟောဟူကြောန့် ပတ်မုကျန်းဟို နယ်နှင်ဒန်ခံရလေဟယ်။ သူဟာ အယ်ကျန်းမာရှိနေဒူးမာ ဗျာဒိတ်တော်ဟို ရေးလေဟယ် (၁.၉)။

ဗျာဒိတ်တော် ထဲမာရေးဟူးဟူ ယောဟန်ရဲ့ ရည်ရွယ်ချစ်ဟာ ယေရှုပုလန်လာဟိုခိဟာ နီးနေဘိ ဖြစ်ဟူကြောန့် ယေရှုခရစ်တော်ဟို သစ်စာရှိဟိုန မျှော်လင့်ချစ်ပေးဟိုတွပ် စာဖတ်မားလေဟို တိုက်တွန်းအားပေးဟူးဟယ် (၁.၃; ၂၂.၇)။ သူဟာ ယေဘုယျအားဖြင့် ခရစ်ယာန်လေ

ဂူလောင်းန ခန်းဂီး ၂—၃ ထဲမှာ သင်းတော်ခွန်နစ်ပါးနား
 ဟို့ သီးသန့် ရေးဟူးဟယ်။ ယောဟန်ဟာ ပရောဖက်ပြု
 ချစ်ဖြစ် (၁.၃) ရေးဟူးဘီး သူမြင်ဟူးဇာလေဟို့ ဖော်
 ပြဟို့တွပ် စာစောန်တခုလောင်းမှာ ပေါင်ဆောန်ချစ်လေ
 ဘောင်ဂီးဟို့ သောင်းဟူးဟယ်။ အယ်ကျမ်းဟာ ဓမ္မဟော
 န်းကျမ်းထဲဟာ ထူးသဖြင့် ဇာခရိကျမ်း ၆.၁-၈ ရဲ့ စိပိုင်း
 တချို့န တူဂေဟယ်။ တံပိုးခွန်နစ်လောင်းန ဖလားခွန်နစ်
 လောင်းဟာလည်း ဘုရားသခင်ဟာ အဲဂုတုတုပြည်ဟို့ ဒန်
 ပေးဟို့တွပ် စေလွှတ်လိုက်ဟူ ကပ်ရောဂါန ရရာတိုင်း တူ
 လေဟယ် (ထွက်မြောက်ရာကျမ်း ၇—၉)။ ဗျာဒိတ်တော်
 ဟာ နှော့-က်ဆောင်းကာလကြောန်း၊ ယေရှုဟာ အောန်
 မြင်သူဖြစ်ဟူကြောန်း၊ ယေရှုဟို့ ယောင်ကြည်ကိုးစားဟူ
 လူလေဂူလောင်းဟာ ကိုယ်တော်နတူးဒူ ထာဝရသတ်ရှင်
 သူ ဖြစ်ဟူကြောန်းဟို့ ရေးဟူးဟယ်။ အယ်ကျမ်းမှာ ယေ
 ရှုဟာ ကြာခန်မှာ ပုလန်ကြွလာမယ် ဆိုဘီး ဒီပေးဟူးဟူ
 ကျမ်းန မျှော်လင့်ချစ် ပေးဟူးဟူ ကျမ်းလည်းဖြစ်လေ
 ဟယ်။

ကြောန်းရာ ကျဉ်းချောက်

၁။ ယောဟန်ဟာ သူဟာ ဖယ်သူဖြစ်ဟယ် ဆိုဇာန အယ်
 ပရောဖက်ပြုရှင်းနဆိုင်ဟူ ရှုပါရောင်ဟို့ ဖယ်မျိုး
 လတ်ခံရရှိဟယ် ဆိုဇာဟို့ ပြောရှင်းအားဖြင့် စပြု
 ဟူးဟူကြောန်း (၁.၁—၁.၂၀)

၂။ သူဟာ ယေရှုနားဟုနေ ဒိုက်ရိုက်ရဟူးဟူ ဒန်းစ

ကားဟို့ သင်းတော်ခွန်နစ်ပါးဟို့ ပေးဟူးဟူကြောင်း
(၁.၁—၃.၂၂)

၃။ သူဟု ဇိခွန်နစ်ခုန (၄.၁—၈.၅) တံပိုးခွန်နစ်လောင်း
ဟို့ ဖော်ပြဟူးဟူကြောင်း (၈.၆—၁၁.၁၉)

၄။ ယောဟန်ဟာ ခေါင်းခွန်နစ်လောင်းရှိဟူ နဂါးဟို့
တိုက်ခိုက်ဟူ ယော့-က်ကျားသားရဲ့ တိုက်ပွဲဟို့ ဖော်
ပြဟူးဟူကြောင်း (၁၂.၁—၁၄.၂၀)

၅။ သူဟု မျစ်တော်ဖလား ခွန်နစ်လောင်းဟို့ ရေးဟူး
ဟူကြောင်း (၁၅.၁—၁၆.၁၈)

၆။ ယောဟန်ဟာ ကောင်းဂန်ဘောင်မာ ဘုရားသခင်
ဟု ရန်သူလေဟို့ ဖယ်မျိုးနိုင်ယူလိုက်ဟယ် ဆိုဇာဟို့
ဖော်ပြဟူးဟူကြောင်း (၁၇.၁—၂၀.၁၅)

၇။ နှော့-က်ဆောင်းမာ သူဟာ ကောင်းဂန်သစ်န မုလေ
ဂီးသစ် ပေါ်လာမယ် ဆိုဇာဟို့ ဖော်ပြဟူးကြောင်း
(၂၁.၁—၂၂.၂၁)

¹ အယ်ကျမ်းစာမာ ယေရှုခရစ်တော် ဖွင့်ပြဟူးဟူ
ဗျာဒိတ်တော်ကြောင်းဟို့ မှတ်တမ်းတန်ဟူးဟယ်။
ဘုရားသခင်ဟာ ခရစ်တော်ဟို့ အယ်ဗျာဒိတ်တော်ဟို့
ပေးရရှင်းဟာ ကြာခန်မာဖြစ်ရဟူ ဇာလေဟို့ သူရဲ့ စေ
ခံလေဟို့ သိစေရှင်ဟူကြောန့် ဖြစ်ဟယ်။ အယ်ကြောန့်
ခရစ်တော်ဟာ သူရဲ့စေခံ ယောဟန်နားဟို့ ကောင်းဂန်
တမန်ဟို့ လွတ်လိုက်ဘီးဟာ အယ်ဗျာဒိတ်တော်ဟို့ ပု
လန်ဘီးဖော်ပြစေဟယ်။

² ယောဟန်ဟုလည်း သူမြင်ရ ကြားရဟူ၍ မှန်မျှ
န ဘုရားသခင်ရဲ့ စကားတော်နဲ့ ယေရှုခရစ်တော်နဲ့ဆိုင်ဟူ
သတ်သေခံချစ်လေဟူ အယ်စာစောန်မှာ ရေးဟူးပေးဟု
ယ်။

³ ဒီဟု ရရာတိုင်း နီးလာဘီ ဖြစ်ဟူကြောနဲ့ ပရောဖက်
ပြုဘီး ဟောပြောဟူးဟူစကားဟို့ ဖတ်ဟူသူနဲ့ အယ်စ
ကားဟို့ ကြားရဘီး ရေးဟူးဟူ၍ မှန်မျှဟို့ လိုက်နာဘီး
စောန်ထီးဟူသူလေဟာ မင်္ဂလာရှိဟယ်။

သင်းတော်ခွန်နစ်ပါးဟို့ နှောက်ဆစ်ဟူကြောန်း

⁴ ငါယောဟန်ဟာ၊

အာရှိပြည်မာရှိဟူ သင်းတော်ခွန်နစ်ပါးဟို့ စာရေးလို
က်ဟယ်။

ခုလည်း ရှိဘီး၊ ရင်းရင်ဒူးဟုလည်း ရှိဟူးဘီး
နော-က်တခီမာ ကြွလာဟူ သခင်နားဟုရော၊ ပလ္လင်
တော်ရှေ့မာရှိဟူ ဝိညာဉ်ခွန်နစ်ပါးနားဟုရော ကျေးဇူး
တော်နဲ့ ငြိသတ်ရှင်းဟာ နန်းနို့လေမာရှိပါစေ။ ⁵ သစ်စာ
ရှိဟူသတ်သေ၊ သေဟူလူလေထဲမာ ဦးဆောင်းမိုးလာ
ဟူသူ၊ မုလေဂီးရဲ့ မန်းဂီးလေဟို့ အောက်ချောက်သူဖြ
စ်ဟူ ယေရှုခရစ်တော်နားဟု ကျေးဇူးတော်နဲ့ ငြိသတ်ရှ
င်းဟာ နန်းနို့လေမာ ရှိပါစေ။

နို့လေဟို့ ရှစ်ဘီး၊ သူရဲ့သွီးတော်အားဖြင့် နို့လေရဲ့ ပြစ်
လေဟုနေ ဖြေလွှတ်ပေးဘီး

6 နို့လေဟို့ နိုင်ငံတော်သား ဖြစ်စေဘီး သူ့ရဲ့ ဖ
ဘုရားသခင်ရဲ့ မှုတော်ဟို့ လောက်ဆောန်နိုင်ဟို့တွပ် နို့
လေဟို့ မန်းဂီးရာနုရော၊ ယဇ်ပုရောဟိတ်ရာနုရော ပေး
တော်မူဟူ ယေရှုခရစ်တော်ဟူ ကမ္ဘာဆစ်ဆစ် ဖောင်းကီး
တော်မူပါစေ။ အာမင်။

7 “ကေ့ကေ့။ ကိုယ်တော်ဟူ မိုးတီဟို့ စီးဘီးဟူ ကြွလာ
လေ့မယ်”

“ကိုယ်တော်ဟို့ ထိုးဖော့-က်လိုက်ဟူ လူလေန
လူလေ ဂူလောင်းဟူ မြင်ရဂေ့လေ့မယ်။”

ကမ္ဘာမာ လူမျိုးလေရှိမျှဟူ “ဝန်းနဲ ကြေကွဲဂေ့လေ
မယ်။”

အယ်တိုင်းမှန်ပါစေ! အာမင်။

8 ခုလည်းရှိဘီး၊ ရင်းရင်ဒူးဟုလည်း ရှိဘီး နော့-က်တ
ခါမာ ကြွလာဟို့ အနန္တတိုင်းန ပုလဲဇောင်ဟူ ထာဝရဘုရား
သခင်ဟု “ငါဟူ စနဆောင်းဖြစ်ဟယ်” ဆိုဘီး မိန့်တော်
မူဟယ်။

ရှုပါရောင်န ခရစ်တော်ဟို့ မြင်ဟူကြောင်း

9 ငါဟူ နိုင်ငံတော်သားလေခံရဟူ ဆင်းရဲဒေါက်ခဟို့
နန်းနို့တူးဒူ ခံနေရဘီး လောက်ဖော်ကိုင်ဖတ်ဖြစ်ဟူ နန်းနို့
လေရဲ့ ညီကို ယောဟန်ဖြစ်ဟယ်။ ငါဟူ ဘုရားသခင်

ရဲ့ စကားတော်နဲ့ ယေရှု့နဲ့ဆိုင်ဟူ သမ္မာတရားလေဟို့
ဟောပြောကြေညာဟို့တွပ် ပတ်မုကျန်းဟို့ ပိုခံရဟယ်။

10 သခင်ဘုရားရဲ့ နေ့မာ ဝိညာဉ်တော်ဟော ငါ့ထိတ်ဟို့
ရော့-က်လာဘီး ငါဟော တံပိုးခရာသံနတူဟူ သံတခုဟော
ငါ့နော့-က်မာ ကြားရဟယ်။

11 အယ်သံဟော “နန်မြင်ရဟူ ဇာလေဟို့ စာစောန်မာရေး
ဘီးဟော ဖောက်မြို့၊ စမုနရမြို့၊ ပေရဂံမြို့၊ သွာတံရမြို့၊
သာဒိမြို့၊ ဖိလဒေလဖိမြို့၊ လောဒိကံမြို့လေမာရှိဟူ သင်း
တော် ခွန်နစ်ပါးနားဟို့ ပေးလိုက်ပါ” ဆိုဘီး ပြောဟယ်။

12 အယ်ခီမာ ငါဟို့ ပြောဟူသံဟော ဖယ်သူရဲ့သံဖြစ်နူး။
ဆိုဇာဟို့ လှည့်ဘီးဟော ကော့လိုက်ဟူ ခီမာ ရွှေမီးခွပ် ခွန်
နစ်လောင်းနု၊

13 အယ်မီးခွပ်လေရဲ့ လယ်မာ လူသားနတူဟူ သူတ
ယော့-က်ဟို့လည်း တို့ဟယ်။ အယ်လူဟော ခေဖျားထိ
ရော့-က်အောန် ဝတ်လောင်ဟို့ ဝတ်ဘီးဟော ရင်ဖတ်မာ
ရွှေခါးဗတ်ဟို့လည်း ဝတ်ဟူးလေဟယ်။

14 အယ်လူရဲ့ ခေါင်းဟော ဆံဗန်ဟော ဖုလူဟူသိုးမီးမျိုး၊
နှမ်းပွမ့်မျိုး ဖုလူဘီးဟော သူရဲ့ မျစ်စိလေဟော မီးလျှံမျိုး
ဖြစ်နေဟယ်။

15 သူရဲ့ ခေလေဟော ရရာတိုင်း ပြင်းဟူ မီးဖိုမာ သန်စ
င်ဟူးဘီး ရရာတိုင်း လန်းဟူ ကြေးဝါစစ်စစ်န တူဟယ်။
သူသံဟူလည်း ရရာတိုင်း ကီးဟူ ရေလှိုင်းသံန တူဟယ်။

16 သူဟော ညာလတ်မာ ကြယ်ခွန်နစ်လောင်းဟို့ ကိုင်

ဟူးဟယ်။ သူ့ရဲ့ ဇင်ပေါ့-က်ထဲဟု သွားနေ့ ဖတ်ပါဟု သန်လျက် ထွပ်လာဟယ်။ သူ့ရဲ့ မျစ်နှာဟာ ရှိတဂိုးန တော့-က်နေဟူ၊ ရရာတိုင်း လန်းဟူ နေမျိုးဖြစ်နေဟယ်။

17 ငါဟာ အယ်လူဟို မြင်ဟူ ခီမာ သူ့ရဲ့ ခေရင်းမာ လဲ ကုလဘီး လူသေမျိုး ဖြစ်ဟူးဟယ်။ အယ်ခီမာ သူဟာ ငါ့ထတ်ဟို သူ့ရဲ့ညာလတ်ဟို တန်ဘီးဟာ “ကြော့-က်န။ ငါဟာ ဦးဆောင်းန နှော့-က်ဆောင်းဖြစ်ဟယ်။

18 ငါဟာ သတ်ရှင်ဟူသူလည်း ဖြစ်ဟယ်။ ငါဟာ ရင် သေဟူးဟယ်။ အယ်ဘေမဲ့ ကေ့ကေ့ ငါဟာ ကမ္ဘာဆစ် ဆစ် သတ်ရှင်နေဟယ်။ ငါဟာ သေရှင်းတရားန မရဏာ နိုင်ငံရဲ့ သော့-က်လေဟိုလည်း ကိုင်ဟူးဘီး စိုးရဟယ်။

19 “အယ်ကြောန့် နန်မြင်ရဟူဇာလေ၊ ခုဖြစ်နေဟူဇာလေ န နှော့-က်မာဖြစ်လာရဟို ဇာလေဟို ရေးဟူးလိုက်။

20 ငါ့ရဲ့ ညာဖတ်လတ်မာ နန်မြင်ရဟူ ကြယ်ခွန်နစ် လောင်းန ရွှေမီးခွပ် ခွန်နစ်လောင်းလေရဲ့ နတ်နဲဟူမိပါ ယ်ဟု ကြယ်ခွန်နစ်လောင်းဟာ သင်းတော်ခွန်နစ်ပါးရဲ့ စေ တမန်လေ ဖြစ်ဂေ့ဘီး ဆီမီးခွပ် ခွန်နစ်လောင်းဟာ သင်း တော်ခွန်နစ်ပါး ဖြစ်ဂေ့ဟယ်။

2

ဧဖက်သင်းတော်တွပ် ဒန်းစကား

1 “ဧဖက်မြို့မာရှိဟူ သင်းတော်ရဲ့ စေတမန်ဟို အယ် မျိုးရေးလိုက်ဟယ်။

“ညာလတ်မာ ကြယ်ခွန်နစ်လောင်းဟို့ ကိုင်ဟူးဟူသူ၊
ရွှေမီးခွပ် ခွန်နစ်လောင်းရဲ့ လယ်မာ သွားလာနေဟူသူဟု
အယ်မျိုးမိန့်တော်မူဟယ်။

² နန့်ရဲ့ လောက်ဆောန်ရှင်းလေ၊ နန့်ရဲ့ ကြိုးစာအားထုမှု
န သီးခံရှင်းလေဟို့ ငါသိဟယ်။ နန့်ဟာ ရုရာတိုင်း ဆိုးဟူ
လူလေဟို့ လတ်ခံဘဲဟူကြောင်းန ကိုယ့်ကိုယ်ကိုယ် တမန်
တော် ဆိုဘီး ခေါ်ဂေ့ဘေမဲ့ တမန်တော်မူဘဲဟူ လူလေဟို့
စမ်းသပ်စစ်ဆေးဘီး သူးနှိလေဟာ လီညာဟူသူလေ ဖြစ်
ဂေ့ဟယ် ဆိုဇာဟို့ နန့်ဟာ တွံရဟူ ကြောင်းဟို့လည်း ငါသိ
ဟယ်။

³ နန့်ဟာ သီးခံဘီး ငါ့ရဲ့ နာမတွပ် ပန်ဗန်းဘေမဲ့ အား
လျော့ဟူ။

⁴ အယ်ဘေမဲ့ နန့်ဟို့ ငါ့ဟာ ပြစ်ပြောဇာရှိဟယ်။ ဖြား
ဖြစ်ကြောန့်နူးဆိုဟာ နန့်ဟာ စစဒူးဟုဖြစ်ဟူ ရှစ်ရှင်းမြစ်
တာဟို့ စွန့်ဟူးဘီး။

⁵ အယ်ကြောန့် နန့်ဟာ ဖယ်မျှလော့-က် ကုလဆင်းလာ
ဟယ် ဆိုဇာဟို့ ဒီရဂေ့ဘီး၊ နောန်ဒရဂေ့ဘီး စစဒူးဟု ကျ
င့်ဟူတိုင်းဘဲ ပုလန်ကျင့်ပါ။ အယ်မျိုးမူဘဲနေဟာ နန့်ရှိဟူ
နေရာဟို့ ငါလာမယ်။ နန့်ဟာ နောန်ဒရဘဲနေမယ် ဆိုဟာ
နန့်ရဲ့ မီးခွပ်ဟို့ နေရာဟုနေ ငါဟာ ဖယ်ပစ်မယ်။

⁶ အယ်ဘေမဲ့ နီကောလ တမဲ့လေရဲ့ ကျင့်ကြံရှင်းလေ
ဟို့ ငါဟာမူးမျိုး နန့်လည်း မူးဟူကြောန့် နန့်ဟို့ ချီးမွမ်းဇာ
ရှိဟယ်။

7 “ဝိညာဉ်တော်ဟု သင်းတော်ဟို့ မိန့်တော်မူဟူ ဇာလေ
ဟို့ နားရှိဟူသူလေ ကြားပါစေ!

“အော်န်မြင်ဟူသူဟို့ ဘုရားသခင်ရဲ့ ပရဒိသုဘောင်မာ
သတ်ပန်ရဲ့သီးဟို့ စားရဟူခွင့်ဟို့ ငါပေးမယ်။

စမုရနသင်းတော်တွပ် ဒန်းစကား

8 “စမုရရမြို့မာရှိဟူ သင်းတော်ရဲ့ စေတမန်ဟို့ အယ်
မျိုးရေးလိုက်ဟယ်။

“ဦးဆောင်းန နှော-က်ဆောင်းဖြစ်ဟူသူ၊ သေဘီးမှ သ
တ်ပုလန်ရှင်လာဟူသူဟု အယ်မျိုးမိန့်တော်မူဟယ်။

9 နန်ရဲ့ ဒေါက်ခဝေဒနာန ဆင်းရဲရှင်းလေဟို့ ငါသိဟု
ယ်။ မှန်ဆိုဟာ နန်ဟာ ကြွယ်ဝဟယ်။ ကိုယ့်ကိုယ်ကိုယ်
ယုဒလူမျိုးဖြစ်ဟယ် ဆိုဘီး ပြောဂေဟူ၊ ယုဒလူမျိုးမှုဘဲ
ဟူ၊ စာတန်ရဲ့ သင်းဝမ်လေဖြစ်ဂေဟူ သူလေနားဟုနေ
ကဲ့ရဲ့ဘီး ပြောခံရရှင်းလေဟို့လည်း ငါသိဟယ်။

10 နန်ခံစားရဟို့ ဒေါက်ခဝေဒနာလေဟို့ ကြော့-က်န။ န
န်ဟာ စောင်ဇမ်းနှော-က်ယှစ်ရှင်းဟို့ ခံရဟို့ကြောန်း မာရ်
နတ်ဟာ နန်းနို့ထဲမာ တချို့လေဟို့ ထောန်ထဲမာ ထဲဟား
ဟယ်။ နန်နို့ဟာ ဆယ်ရစ်လောင်းလောင်း ဆင်းရဲဒေါက်ခ
ဟို့ ခံရဂေလေ့မယ်။ သေဒဲထိ သစ်စာစောန့်ပါ။ အယ်မျိုး
ဆိုဟာ သတ်သရဖူဟို့ နန်ဟို့ ငါပေးမယ်။

11 “ဝိညာဉ်တော်ဟု သင်းတော်ဟို့ မိန့်တော်မူဇာလေဟို့
နားရှိဟူသူလေ ကြားပါစေ!

“အောန်မြင်ဟူသူဟို ဒုတိယသေရှင်းဟာ ညဉ့်ဆဲဟို့ရဟူ။

ပေရဂံသင်းတော်တွပ် ဒန်းစကား

¹² “ပေရဂံမြို့မာရှိဟူ သင်းတော်ရဲ့ စေတမန်ဟို့ အယ်မျိုးရေးလိုက်ဟယ်။

“သွားနေဖတ်ပါဟူ၊ ရုရာတိုင်းထတ်ဟူ၊ သန်လျက်ရှိဟူ သူဟု အယ်မျိုး မိန့်တော်မူဟယ်။

¹³ နန်ဟာ ဖယ်နေရာမာ ထိုင်နေဟယ် ဆိုဇာဟို့ ငါသိဟယ်။ အယ်နေရာမှာ စာတန်ရဲ့ ပလ္လင်ရှိဟယ်။ ငါ့ဟို့ သစ်စာရှိဟူ ငါ့ရဲ့သတ်သေ အနုတိပဟာ စာတန်ရဲ့နေရာဖြစ်ဟူ နန်နို့နားမာ သတ်ခံရဟူ ခီမာ နန်ဟာ ငါ့ရဲ့နာမဟို့ စွဲကိုင်ဘီး ငါ့မာဟားဟူ ယောင်ကြည်ရှင်းဟို့ စွန်ပစ်ဟူ။

¹⁴ အယ်ဘေမဲ့ နန်းနို့ဟို့ ငါဟာ ပြစ်ပြောဇာ နဲနဲရှိဟယ်။ ဖြားဖြစ်ကြောင်းနူးဆိုဟာ နန်းနို့မာ ဗာလရဲ့ ယူဝါဒဟို့ ခံယူဘီးဟာ ကျင့်နေဂေဟူ သူလေရှိနေဟယ်။ ဣသရေလလူမျိုးလေဟာ ရောက်ထုဟို့ ပူဇော်ဟားဟူဇာလေဟို့ စားဂေဟို့တွပ်ရော၊ တရားဘဲဟူ မေထုန်ဟို့ လောက်ဂေဟို့တွပ်ရော သူးနို့ရှေ့မာ မှားယွင်းဂေဟူ ဇာလေဟို့ ဒုလဟားဟို့ကြောန်း ဗာလမ်ဟာ ဗာလက်မန်းဟို့ သန်ပေးဟယ်။

¹⁵ အယ်မျိုးဘဲ နန်းနို့မာ နိကာလ တမဲ့လေရဲ့ ယူဝါဒဟို့ ခံယူဘီး ကျင့်နေဂေဟူ သူလေလည်း ရှိနေဟယ်။

16 အယ်ကြောန့် နောန့်ဒရပါ။ အယ်မျိုးမူဘဲနေဟာ ငါ
ဟာ နန်းနိုနားဟို့ မြန်းမြန်ဟားလာဘီး ငါ့ဇပ်ပေါ့-က်ထဲဟု
သန်လျက်န နန်းနိုဟို့ တိုက်ခိုက်မယ်။

17 “ဝိညာဉ်တော်ဟု သင်းတော်ဟို့ မိန့်တော်မူဇာလေဟို့
နားရှိဟူသူလေ ကြားပါစေ!

“အောန်မြင်ဟူသူဟာ ဖွပ်ဟားဟူ မနန့်ဟို့ ငါပေးမယ်။
ကုလော့-က်ဖုလူဟို့လည်း ငါပေးမယ်။ အယ်ကုလော့-က်
ဟို့ ရဟူသူဟုလွဲဘီး ဖယ်သူလည်း အယ်နာမယ်သစ်ဟို့
သိဂေဟု။

သွာတိရသင်းတော်တွပ် ဒန်းစကား

18 “သွာတိရမြို့မာရှိဟူ သင်းတော်ရဲ့ စေတမန်ဟို့ အယ်
မျိုးရေးလိုက်ဟယ်။

“မီးလျှံမျိုး မျစ်စိန ရရာတိုင်း တော့-က်ဟူ၊ ကြေးဝါန
တူဟူ၊ ခေရှိဟူ ဘုရားသခင်ရဲ့ သားတော်ဟု အယ်မျိုးမိန့်
တော်မူဟယ်။

19 နန်ရဲ့ လောက်ဆောန်ရှင်းလေန နန်ရဲ့ရှစ်ရှင်း၊ ယောင်
ကြည်ရှင်း၊ မူတော်ဆောန်ရှင်း၊ သီးခံရှင်းလေဟို့ ငါသိ
ဟယ်။ နန်ဟာ နော့-က်ဆောင်းလောက်ဆောန်ရှင်းလေ
ဟာ ရင်ဟုလောက်ဆောန်ရှင်းထတ် သာနေဟူကြောင်းဟို့
လည်း ငါသိဟယ်။

20 အယ်ဘေမဲ့ နန်ဟို့ ငါဟာ ပြစ်ပြောဇာရှိဟယ်။ ဖြား
ဖြစ်ကြောင်းဆိုဟာ နန်ဟာ ကိုယ့်ကိုယ်ကိုယ် ပရောဖက်

မ ဆိုဘီး ခေါ်ဟူမီးမ ယေဇဗေလဟို့ လောက်ရှင်ဟူမျိုး လောက်ဟို့ ခွမ့်ပေးဟူးဟယ်။ အယ်ကြောန့် သူဟာ ငါ့ရဲ့ စေခံလေဟို့ တရားဘဲဟူ မေထုန်ပြုဟို့တွပ် ရောက်ထုဟို့ ပူဇော်ဟူးဟူဇလေဟို့ စားဂေဟို့တွပ် သွန်သန်ဘီးဟာ သူးနို့လေဟို့ လှည့်ဇးနေဟယ်။

21 ငါဟာ သူဟို့ နောန်ဒရဟို့တွပ် ခီပေးဘေမဲ့ သူဟာ တရားဘဲဟူ မေထုန်ဟို့ နောန်ဒရရှင်ဟူစိ မေ့ဟူ။

22 အယ်ကြောန့် ငါဟာ သူဟို့ အိယာထတ်မာ လဲစေဟယ်။ သူန အီထောန်ရေးဖော့-က်ပုလန်ဘီး ပြစ်မှားဟူ လူလေဟို့လည်း သူးနို့လောက်ဟူ မူလေတွပ် နောန်ဒရဘဲနေဟာ ရရာတိုင်း ကီးဟူ ဆင်းရဲဒေါက်ခဟို့ ရော့-က်စေမယ်။

23 သူ့ရဲ့ သားမီးလေဟို့လည်း သေဘေးန ငါစီရင်မယ်။ အယ်ခီမာ ငါဟာ စိန့်လောင်းဟို့ သိဟူသူဖြစ်ဟယ် ဆိုဇာ သင်းတော်ဂူလောင်းဟာ သိရဂေလေမယ်။ နန်းနို့ ဂူလောင်းဟို့လည်း ကိုယ်လောက်ဟူးဟူတိုင်းဘဲ ကျိုးပြစ်ဟို့ ငါဟာပေးမယ်။

24 “အယ်ဘေမဲ့ အယ်မီးမရဲ့ ယူဝါဒန စာတန်ရဲ့ နတ်နဲ ရှင်းဖြစ်ဟူ၊ သူးနို့ ခေါ်ဂေဟူဇလေ သိဘဲန သွာတိရမြို့မာ ကျန်နေဟူလူလေဟို့ ငါပြောရှင်ဟူဇဟု နန်းနို့ထတ်မာ တခြားဝန်ထောက်လေဟို့ ငါတန်ဟူ။

25 နန်နို့လေမာ ရှိဟူဇလေဟို့ဘဲ ငါကြွလာဟူခီထိ စွဲကို င်ဟူးဂေ။

26 အောက်မြင်ဟူ သူလေန ငါ့ရဲ့မူဟို့ ဆောင်းထိစောန့် ထီးဟူ သူလေဟာ လူမျိုးဂူလောင်းဟို့ အောက်စိုးရဟူ ခွ မ်ဟို့ ငါပေးမယ်။

27 အယ်လူလေဟာ ငါကိုယ်တိုင် ငါ့ရဲ့ ဖနားဟုရဟူ အောက်စိုးခွမ်နတူဟူ မလေအိုးလေဟို့ ရိုက်ခွဲမျိုးဘဲ သံ လှိတ်န သူးနို့ဟို့ အောက်စိုးရလေ့မယ်။

28 ငါဟာ မိုးသော့-က်ကြယ်ဟို့လည်း အယ်လူလေဟို့ ပေးမယ်။

29 “ဝိညာဉ်တော်ဟု သင်းတော်ဟို့ မိန့်တော်မူဇာလေဟို့ နားရှိဟူသူလေ ကြားပါစေ။

3

သာဒိသင်းတော်တွပ် ဒန်းစကား

1 “သာဒိမြို့မာရှိဟူ သင်းတော်ရဲ့ စေတမန်ဟို့ အယ်မျိုး ရေးလိုက်ဟယ်။

“ဘုရားသခင် ရဲ့ ဝိညာဉ် ခွန်နစ် ပါး န ကြယ် ခွန်နစ် လောင်းရှိ ဟူသူဟု အယ်မျိုး မိန့်တော်မူဟယ်။ နန့်ရဲ့ လောက်ဆောန်ရှင်းလေဟို့ ငါသိဟယ်။ နန့်ဟာ သတ်ရှင် နေဟယ် ဆိုဘီး နာမယ်ခံဘေမဲ့ သေနေဟူလူ ဖြစ်ဟယ်။

2 ဒိနစောန့်နေပါ။ သေခါနီးဖြစ်နေဘီး ကျန်နေဟူသူလေ ဟို့ ခိုင်ခံစေပါ။ ဖြားဖြစ်ကြောင်းနူးဆိုဟာ နန့်ရဲ့ လောက် ဆောန်ရှင်းလေဟာ ငါ့ရဲ့ ဘုရားသခင်ရှေ့မာ ပြစ်ပြောဇာ ရှိသေးဟယ် ဆိုဇာ ငါမြင်ရဟယ်။

3 အယ်ကြောန့် နန်ဟာ ဖယ်မျိုးခံယူဘီး ကြားနာရဟူဇာ
လေဟို့ ဒီရဘီး အယ်ဇာလေဟို့ စောန့်ထီးပါ။ နောန်ဒရပါ။
နန်ဟာ ဒိန်စောန့်ဘဲနေဟာ ခိုးလာဟူမျိုး နန်နားဟို့ ငါလာ
ဇာဟို့ နန်ဟာ လောင်းဝသိဟို့ မူဟူ။

4 အယ်ဘေမဲ့ သာဒိမြို့မာ ကိုယ့်ရဲ့ဝတ်ဟို့ ညစ်ညူးစေ
ဘဲဟူသူ နဲနဲဟား ရှိသေးဟယ်။ အယ်လူလေဟာ ထိုက်တ
န်ဟူသူလေ ဖြစ်ဂေဟူကြောန့် ဝတ်ဖုလူဟို့ဝတ်ဘီး ငါ့နာမ
နတူးဒူး သွားလာရလေ့မယ်။

5 အောန်မြင်ဟူသူဟာ အယ်မျိုးဘဲ ဝတ်ဖုလူဟို့ ဝတ်ရ
လေ့မယ်။ ငါဟုလည်း သူ့ရဲ့နာမယ်ဟို့ သတ်စာစောန်မာ
လောင်းဝဖျစ်ပစ်ဟူ။ ငါဟာ သူ့ရဲ့နာမယ်ဟို့ ငါ့ဖရေ့မာ
ရော၊ ကောန်းဂန်တမန် ရှေ့မာရော ဝန်ခံမယ်။

6 “ဝိညာဉ်တော်ဟာ သင်းတော်ဟို့ မိန့်တော်မူဟူ ဇာလေ
ဟို့ နားရှိဟူသူလေ ကြားပါစေ။

ဖိလဒေလဖိသင်းတော်တွပ် ဒန်းစကား

7 “ဖိလဒေလဖိမြို့မာရှိဟူ သင်းတော်ရဲ့ စေတမန်ဟို့
အယ်မျိုးရေးလိုက်ဟယ်။

“သန်ရှင်းဟူသူ၊ ရရာတိုင်း မှန်ဟူသူ၊ ဒါဝိဒ်ရဲ့သော့-က်
ဟို့ ကိုင်ဟားဟူသူ၊ ဖယ်သူလည်း ပိနိုင်ဘဲနေအောန် ဖွမ့်
ဟားဟူသူ၊ ဖယ်သူလည်း ဖွမ့်နိုင်ဘဲနေအောန် ပိဟားဟူ
သူဟာ အယ်မျိုးမိန့်တော်မူဟယ်။

⁸ နန်ရဲ့ လောက်ဆောင်းရှင်းလေဟို့ ငါသိဟယ်။ ကေ့ကေ့။ ဖယ်သူလည်း ပိနိုင်ဘဲဟူ ခွဗော့-က်ဟို့ နန်ရှေ့မာ ငါဖွမ်ဟူးဟယ်။ ဖြားဖြစ်ကြောန်နူးဆိုဟာ နန်ဟာ စွမ်းရည်နဲဟူးဘဲ ရှိဘေမဲ့ ငါ့ရဲ့ စကားတော်ဟို့ လိုက်နာစောန့်ထီးဘီး ငါ့ရဲ့ နာမဟို့လည်း ပယ်ဟယ်။

⁹ ကေ့ကေ့။ ကိုယ့်ကိုယ်ကိုယ် ယုဒလူမျိုးဖြစ်ဟယ် ဆိုဘီး ယုဒလူမျိုးမူဘဲန စာတန်ရဲ့ ပေါင်းသင်းဝမ်လေဖြစ်ဂေ့ဟူ၊ လီညာဘီးပြောဂေ့ဟူ လူလေဟို့ နန်ရဲ့ ခေရင်းမာလာဘီး ရှိခိုးစေဘီးဟာ ငါဟာ နန်းနို့ဟို့ ရှစ်ဟယ် ဆိုဇာဟို့ သူးနို့ဟို့ သိစေမယ်။

¹⁰ နန်ဟာ သီးခံရှင်းနဆိုင်ဟူ ငါ့ရဲ့ စကားတော်ဟို့ လိုက်နာဘီး စောန့်ထီးဟူကြောန် မှလေဂီးထတ်မာ နေထိုင်ဂေ့ဟူ သူလေဟို့ စမ်းသပ်စစ်ဆေးဟို့ ရော့-က်လာဟူ ခီမာ ငါဟာ နန်ဟို့ စောန်ရှော့-က်မယ်။

¹¹ ငါဟာ မြန်းမြန်ဟူးလာမယ်။ နန်ရဲ့ သရဖူဟို့ ဖယ်သူလည်း လုယူဘဲဟို့တွပ် နန်မာရီဟူဇာလေဟို့ စွဲကိုင်းဟူးပါ။

¹² ငါဟာ အောန်မြင်ဟူသူဟို့ ငါ့ရဲ့ ဘုရားသခင် ဗိမာန်တော်မာ တိုင်ဖြစ်စေမယ်။ သူဟာ ဖယ်ခါလည်း ပုလန်ဟို့ ထွပ်ဟူးရဟို့ မှဘီ။ ငါဟာ ငါ့ဘုရားသခင်ရဲ့ နာမတော်ဟို့ ရော၊ ငါ့ဘုရားသခင်ရဲ့ မြို့တော်ဖြစ်ဟူ ကောင်းဂန်ဘောင်ဟုနေ ဆင်းလာဘီး ယေရုရှလင်မြို့သစ်ရဲ့ နာမဟို့ရော၊ ငါ့ရဲ့ နာမသစ်ဟို့ရော သူထတ်မာ ရေးဟူးမယ်။

13 “ဝိညာဉ်တော်ဟု သင်းတော်ဟို့ မိန့်တော်မူဟူ ဇာလေ
ဟို့ နားရှိဟူသူလေ ကြားပါစေ။

လောဒိကိသင်းတော်တွပ် ဒန်းစကား

14 “လောဒိကိမြို့မရှိဟူ သင်းတော်ရဲ့ စေတမန်ဟို့
အယ်မျိုးရေးလိုက်ဟယ်။

“အာမင်ဖြစ်ဟူသူ၊ သစ်စာရှိဘီး ပြောန့်မတ်ဟူသတ်
သေ၊ ဘုရားသခင်ရဲ့ ဖန်ဆင်းဟွားဟူထဲမာ ဦးဆောင်းဖြ
စ်ဟူသူဟု အယ်မျိုးမိန့်တော်မူဟယ်။

15 နန်ရဲ့ လောက်ဆောန်ရှင်းလေဟို့ ငါသိဟယ်။ နန်ဟာ
အေးလည်း မူဟု။ ပူလည်း မူဟု။ ငါဟာ နန်ဟို့ အေးဆို
ဟာအေး၊ ပူဆိုဟာပူ တခုခုဟို့ဘဲ ဖြစ်စေရှင်ဟယ်။

16 နန်ဟာ ပူလည်းမူဘဲန၊ အေးလည်းမူဘဲန၊ မပူမအေး
ဖြစ်နေဟူကြောန့် နန်ဟို့ ငါ့ဇပ်ပေါ့-က်ထဲဟု ထွီးထုမယ်။

17 နန်ဟု ‘ငါဟာ ရရာတိုင်း ကြွယ်ဝဟူကြောန့် ပြားဇာ
လည်း လိုဟု ဆိုဘီး’ ပြောနေဟယ်။ အယ်ဘေမဲ့ နန်ဟာ ရ
ရာတိုင်း စိပ်ြစ်ဇာကောန်းဟူသူ၊ နားဇာကောန်းဟူသူ၊ ဆင်း
ရဲဟူသူ၊ မျစ်စိကန်းနေဟူသူန ခုလေးပုလန်းဗုလန်း ဖြစ်
နေဟယ် ဆိုဇာဟို့ နန်သိဟု။

18 နန်ဟာ ကြွယ်ဝဟို့တွပ် မီးနသန်စင်ဟွားဟူ ရွှေဟို့
ရော၊ နန်ဟာ ခုလေးပုလန်းဗုလန်း ဖြစ်နေဘီး ယှစ်လေ
ပေါ်ဘဲနေအောန် နန်ဝတ်ဟို့ ဖုလူဟူ ဝတ်ရောင်ဟို့ရော၊ နန်
ရဲ့ မျစ်စိ ပုလန်ဘီးမြင်လာဟို့တွပ် မျစ်စဉ်ခတ်ဟို့ ဆေး

ဟို့ရော၊ ငါ့နားမာ ဝယ်ဟို့တွပ် နန့်ဟို့ ငါဟာ ကြံပေးရှင်ဟု
ယ်။

¹⁹ ငါဟာ ငါရှစ်ဟူသူ မှန်မျှရဲ့ ပြစ်လေဟို့ ဖော်ပြဘီး
ဟာ ဆောင်းမတတ်ဟယ်။ အယ်ကြောန့် ကိုယ့်စိကိုယ်
နှိုးဆော်ဘီး နောန်ဒရပါ။

²⁰ နားထောန်ဂေ့။ ငါဟာ ခွဗော့-က်ရှေ့မာ ရပ်ဘီး
ခေါ့-က်ဘီးနေဟယ်။ ဖယ်သူမဆို ငါ့ရဲ့သံဟို့ ကြားဘီး ခွ
ဗော့-က်ခွမ်မယ် ဆိုဟာ အယ်လူရှိဟူ နေရာဟို့ ဝမ်ဘီး သူ
နတူးဒု စာစားမယ်။ သူဟုလည်း ငါနတူးဒု စားသော့-က်
ရလေ့မယ်။

²¹ ငါဟာ အောန်မြင်ဘီး ငါ့ဖနတူးဒု ပလ္လင်ထတ်မာ ထိုင်
ရမျိုးဘဲ အောန်မြင်ဟူ သူဟာ ငါ့ရဲ့ ပလ္လင်ထတ်မာ ငါန
တူးဒု ထိုင်ရဟို့ ခွမ်ဟို့ ငါပေးမယ်။

²² “ဝိညာဉ်တော်ဟု သင်းတော်ဟို့ မိန့်တော်မူဟူ ဇာလေ
ဟို့ နားရှိဟူသူလေ ကြားပါစေ” ဆိုဘီး မိန့်တော်မူလေဟု
ယ်။

4

ကောန်းဂန်ဘောင်းဟု ပလ္လင်တော်

¹ အယ်ဘီးန ငါကေ့လိုက်ဟူ ခီမာ ကောန်းဂန်မာဖွမ်ဟွား
ဟူ ခွဗော့-က်တဗော့-က်ရှိဟယ်။

အယ်ခီမာ ပထမဆောင်း ငါ့ဟို့ မိန့်တော်မူဇာဟို့ ကြားရ
ဟူ၊ တံပိုးခရာသံမျိုးဖြစ်ဟူ သံဟု “အယ်နေရာဟို့ တတ်

လာလိုက်။ အယ်ဖြစ်ပျစ်လေရဲ့ နှော့-က်မာ ဖြစ်ရဟ့်ဇာ
လေဟ့် နန့်ဟ့် ငါပြမယ်။” ဆိုဘီး ပြောဟယ်။

² အယ်ခီမာ ရှစ်ရှင်းဘဲ ဝိညာဉ်တော်ဟာ ငါ့ထတ်ဟ့်
ရော့-က်လာလေဟယ်။ ကောန်းဂန်ဘောင်မာ ပလ္လင်တခု
ရှိဟယ်။ ပလ္လင်ထတ်မာထိုင်နေဟူသူ တပါးရှိဟယ်။

³ ထိုင်နေဟူသူဟာ နဂါးသွဲန ပတုတမြားကုလော့-က်နီ
မျိုး ရောန်ရှိဘီး ပလ္လင်ပတ်ပတ်လည်မာ မြမျိုးဆင်းရော
န်ရှိဟူ သက်တံ့ရှိဟယ်။

⁴ ပလ္လင်ရဲ့ ပတ်ပတ်လည်မာ တခြားပလ္လင် နှော့ဆယ်
လေးခုရှိဘီး အယ်ပလ္လင်လေထတ်မာ ဖုလူဟူဝတ်ရောင်
ဟ့် ဝတ်ဟားဘီး ခေါင်းထတ်မာ ရွှေသရဖူဟ့် ဆောန်းဟား
ဟူ သတ်ကီးဝါဂီး နှော့ဆယ်လေးပါးဟာ ထိုင်နေဂေဟယ်။

⁵ ပလ္လင်ထဲဟု လန့်စစ်ဖုလတ်ရှင်း၊ မိုးချောင်းသံလေ၊
မိုးကြိုးသံလေ ထွပ်လာဟယ်။ ဘုရားသခင်ရဲ့ ဝိညာဉ်
ခွန်နစ်ပါးဖြစ်ဟူ မီးခွပ်ခွန်နစ်လောင်းဟာ ပလ္လင်ရှေ့မာ
တော့-က်လောန်ဘီး ရှိနေဟယ်။

⁶ အယ်ဘီးဟာ ပလ္လင်ရှေ့မာ ကုလော့-က်သလင်း
နတူဟူ ဖန်ရေကန်မျိုးရှိဟယ်။ ပလ္လင်ရဲ့ လယ်နရော၊
ပတ်ပတ်လည်မာရော၊ ရှေ့ဖတ်န နှော့-က်ဖတ်လေမာရော
မျစ်စိလေနပုလဲနေဟူ သတ္တဝါလေးပါးရှိဟယ်။

⁷ ပထမ သတ္တဝါဟာ ခြင်္သေ့နတူဘီး ဒုတိယ သတ္တဝါ
ဟာ နွားသားဂန်းနတူဟယ်။ တတိယ သတ္တဝါဟာ လူနတူ

ဟူ မျစ်နှာရှိဘီး စတုတ္ထ သတ္တဝါဟာ ပုလန်နေဟူ လင်း
ယောင်နတူဟယ်။

⁸ အယ်သတ္တဝါ လေးပါးလောင်းဟာ တောန်ပံခြွေ-က်
ခုစိရှိဘီး ပတ်ပတ်လည်န ထဲဖတ်မာ မျစ်စိလေန ပုလဲဘီး
ရှိနေဟယ်။ သူးနို့ဟာ နေရောညဉ့်ရော နားဘဲန

“ထာဝရ ဘုရားသခင်ဟာ

သန်ရှင်း တော် မူ ဟု ယ်။ သန်ရှင်း တော် မူ ဟု ယ်။

သန်ရှင်းတော်မူဟယ်။

ကိုယ်တော်ဟာ ခုရှိဘီး ရင်ဟုလဲရှိဟူ နှော-က်တခီမာ ကြွ
လာဟို့ အနန္တတဂိုးနပုလဲဇောင်ဟူ သခင်ဖြစ်ဟယ်”

ဆိုဘီး

ပြောဆိုဂေဟယ်။

⁹ အယ်မျိုး ပလ္လင်ထတ်မာထိုင်ဘီး ကမ္ဘာဆစ်ဆစ်သတ်
ရှင်ဟူ သခင်ရဲ့ ဖောင်းသရေတော်၊ ဂေါင်တော်န ကျေးဇူး
တော်လေဟို့ သတ္တဝါလေးပါးဟာ ချီးမွမ်းဂေဟူ ခီမာ

¹⁰ သတ်ကီးဟူသူ နှော့ဆယ့်လေးပါးဟာ ပလ္လင်ထတ်
မာထိုင်ဟူ သခင်ရဲ့ရှေ့မာ ပျပ်ဝပ်ဘီးဟာ ကမ္ဘာဆစ်ဆစ်
သတ်ရှင်ဟူ သခင်ဟို့ ကိုးကွယ်ဘီးဟာ သူးနို့လေရဲ့ သရဖူ
လေဟို့ ပလ္လင်ရှေ့မာ ခုလဟားဘီးဟာ၊

¹¹ “ကျွန်တော့်ဟားလေရဲ့သခင် ဘုရားသခင်ဟာ

ကိုယ်တော်ဟာ ရှိမျှဂူလောင်းဟို့ ဖန်ဆင်းဟူကြောန်
ကိုယ်တော်ရဲ့ လိုတော်ကြောန်ဘဲ ရှိမျှဂူလောင်းဟာ သတ်
ရှင်ရဂေဟယ်။

အယ်ကြောန့် ကိုယ်တော်ဟာ ဖောင်းသရေတော်၊ ဂေါင်တော်၊ တဂိုးတော်လေဟို့ ခံထိုက်ဟယ်” ဆိုဘီး ပြောဆိုဂေဟယ်။

5

စာစောန်န သိုးသားဂန်းဟားကြောန်း

¹ အယ်ဘီးန ပလ္လင်ထတ်မာ ထိုင်ဟူသခင်ရဲ့ ညာဖတ်လတ်မာ ထဲရောပုလန်ရော နှော့ဖတ်လောင်း စာလောင်းလေ ရေးဟားဘီး၊ မှတ်လတ်ခဏာတန်ဘီး တဇိခွန်နစ်ခုနု ပိဟားဟူ စာစောန်တစောန် ရှိနေဇာဟို့ ငါဟာ မြင်ရဟယ်။

² အယ်ခီမာ ရရာတိုင်း ခွန်အားကီးဟူ ကောန်းဂန်တမန်တပါးဟာ “ဖယ်သူဟာ အယ်စာစောန်ဟို့ ဖွမ်ဘီး အယ်တဇိလေဟို့ ခွာထိုက်နူး” ဆိုဘီး သံကုလယ်ဂီးန ကြေညာနေဇာဟို့ ငါဟာ မြင်ရဟယ်။

³ အယ်ဘေမဲ့ ကောန်းဂန်မာဖြစ်စေ၊ မုလေဂီးထတ်မာ ဖြစ်စေ၊ မုလေဂီးအော့-က်မာ* ဘဲဖြစ်စေ စာစောန်ဟို့ဖွမ်ဘီး ကေ့နိုင်ဟူသူ ဖယ်သူလည်း မေ့ဟူ။

⁴ အယ်စာစောန်ဟို့ ဖွမ်ဘီးဟာကေ့ဟို့တွပ် ထိုက်တန်ဟူသူ ယော့-က်လည်း တွံဘဲဟူကြောန့် ငါဟာ ရရာတိုင်း ငိုဟယ်။

* 5:3 ၅.၃ မွေဂီးအော့-က်မာ၊ မရဏာနိုင်ငံ အယ်မျိုးမူဘဲနေဟာ လူသေလေရဲ့ ကမ္ဘာ (ရှု ၁.၁၈)။

5 အယ်ဒီမာ သတ်ကီးဟူသူ တပါးဟာ “ငိုန၊ ကေ့ ကေ့။ ယုဒမျိုးနွယ်ဟုနေ ပေါလာဟူခြင်သို့၊ ဒါဝိဒ်ရဲ့ မူလ ရင်းမြစ်ဖြစ်ဟူ သခင်ဟာ အောက်မြင်ဟူကြောန့် အယ်စာ စောန်န တဇိခွန်နစ်ချစ်ဟို့ ဖွမ်နိုင်ဟယ်။” ဆိုဘီး ငါ့ဟို့ ပြောဟယ်။

6 အယ်ဘီးန သေသတ်ခံဟားရဟူ ပေါင်ဖြစ်နေဟူ သိုးသားဂန်းဟားဟာ ပလ္လင်န သတ္တဝါလေးပါးရဲ့ ကြား ထဲဟု သတ်ကီးဟူ သူလေရဲ့လယ်မာ ရပ်နေဇာဟို့ ငါမြင် ရဟယ်။ အယ်သိုးသားဂန်းဟားမာ ချိုခွန်နစ်ရှောန်းန မျစ် စိခွန်နစ်လောင်းရှိဟယ်။ အယ်မျစ်စိလေဟာ မုလေဂီးတဗု လန်လောင်းဟို့ လွတ်လိုက်ခံရဟူ ဘုရားသခင်ရဲ့ ဝိညာဉ် ခွန်နစ်ပါး ဖြစ်ဟယ်။

7 သိုးသားဂန်းဟားဟာ လာဘီး ပလ္လင်ထတ်မာ ထိုင်နေ ဟူသခင်ရဲ့ ညာဖတ်လတ်မာရှိဟူ စာစောန်ဟို့ ယူလိုက်ဟယ်။

8 အယ်စာစောန်ဟို့ ယူလိုက်ဟူ ဒီမာ သတ္တဝါလေးပါးန သတ်ကီးဟူသူ နှေ့ဆယ့်လေးပါးဟာ သန်ရှင်းသူလေရဲ့ ဆုတောင်းချစ်လေဖြစ်ဟူ မီးရှို့ဟူ နံ့သာပေါန်းန ပုလဲနေ ဟူ ရွှေဖလားလေဟို့ရော၊ စောန်းလေဟို့လည်း ကိုင်ဟား ဂေ့ဘီး သိုးသားဂန်းဟားရှေ့မာ ပျပ်ဝပ်ဘီး၊

9 ကိုယ်တော်ရှင်ဟာ သေသတ်ရှင်းဟို့ ခံရဟူကြောန့် “တိုင်းနိုင်ငံ ဂူလောင်းမာရှိဟူ သာသာစကားလေ မျိုးမျိုး ပြောဂေ့ဟူ

လူမျိုးလေထဲဟုနေဘီး ကျွန်တော့်ဟူးလေဟို့ ယူ
ဘီး၊ သွီးတော်န ဘုရားသခင်တွပ် ဖိုးခပေးဘီး ဝီး
ကော့-က်လိုက်ဟယ်။

အယ်ကြောန့် ကိုယ်တော်ဟာ အယ်စာစောန်ဟို့ ယူဘီး တ
ဇိလေဟို့ ဖွမ်ထိုက်ဟူသူ ဖြစ်ပါဟယ်။

10 ကျွန်တော့်ဟူးလေရဲ့ ဘုရားသခင်ရှေ့မာ မန်းဂီးနေန
ရော၊ ယဇ်ပုရောဟိတ်နေနရော ခန့်ဟူးဘီး၊
မှလေဂီးထတ်မာ အောက်ချောက်ရဟူခွမ်ဟို့ ပေးဟ
ယ်” ဆိုဘီး
ချင်းသစ်ဟို့ ဆိုဂေဟယ်။

11 အယ်ခီမာ ငါဟာ ကေ့လိုက်ဟူ ခီမာ ပလ္လင်
ပတ်ပတ်လည်မာရော၊ သတ္တဝါလေးပါးန သတ်ကီးဟူလူ
လေရဲ့ ပတ်ပတ်လည်မာရော၊ ရပ်ဘီးနေဟူ ကောန်းဂန်
တမန်လေရဲ့ သံဟို့ ကြားရဟယ်။ အယ်ကောန်းဂန်တမန်
လေဟာ သီးသန်းကုဋေ ကဘဲန ဘောင်ဂီးဘဲရှိဟယ်။

12 သူးနို့ဟာ
“သေသတ်ခံရဟူ သိုးသားဂန်းဟူးဟာ
တဂိုး၊ စည်းဇိမ်၊ ဉာဏ်ပညာ၊ ခွန်အားစွမ်းရည်၊
ဖောင်းသရေတော်၊ ဖောင်းအာနုဘော်၊
ချီးမွမ်းရှင်းဟို့ ခံထိုက်ဟယ်” ဆိုဘီး
သံကုလယ်ဂီးန ပြောဆိုဂေဟယ်။

13 နှော့-က်ထပ် ကောန်းဂန်၊ မုလေဂီး၊ မုလေဂီးအော့-က်
ဟု ပန်လယ်ရဲ့ နေရာတိုင်းမှာ သတ္တဝါဂူလောင်းဟု
“ပလ္လင်ထတ်မှာ ထိုင်နေဟူသခင်န သိုးသားဂန်းဟွားဟွာ
ကမ္ဘာဆစ်ဆစ် ချီးမွမ်းရှင်းဟို့ ခံရပါစေ။

ဖောင်းကီးတော်မူပါစေ”

ဆိုဘီး သံကုလယ်ဂီးန ပြောဂေဇာဟို့ ငါဟာ ကြားဟယ်။

14 သတ္တဝါလေးပါးဟု “အာမင်” ဆိုဘီး ပုလန်ပြောဂေဇာ
ဟယ်။ သတ်ကီးဝါဂီးလေဟုလည်း ပျပ်ဝပ်ဘီး ကိုးကွယ်ဂေ
ဟယ်။

6

စာစောန်ထဲဟု တဇိလေကြောင်း

1 သိုးသားဂန်းဟွားဟွာ တဇိခွန်နစ်ချစ်မှာ ပထမတချ
စ်ဟို့ ဖွမ်ဟူ ခီမာ ငါကေ့လိုက်ဟူ ခီမာ မိုးကြိုးသံနတူဟူ
သံမျိုးန သတ္တဝါလေးပါးထဲမှာ တပါးဟု “လာဂေ့” ဆိုဘီး
ပြောဇာဟို့ ငါကြားရဟယ်။

2 အယ်ခီမာ ငါကေ့လိုက်ဟူ ခီမာ မြင်းဖုလူတကောန်ဟို့
တို့ရဟယ်။ မြင်းစီဟူသူဟာ လေးဟို့ ကိုင်ဟွားဟယ်။ သူ
ဟို့ သရဖူဟို့ ပေးဟယ်။ သူဟာ အောန်မွဲခံဘီးဟူသူ နေန
အောန်မွဲခံဟို့တွပ် ထွပ်ဟွားဟယ်။

3 သိုးသားဂန်းဟွားဟွာ ဒုတိယတဇိဟို့ ဖွမ်လိုက်ဟူ ခီမာ
ဒုတိယသတ္တဝါဟု “လာဂေ့” ဆိုဘီး ပြောဇာဟို့ ငါကြားဟ
ယ်။

4 အယ်ခီမာ မြင်းနီတကောန်ဟာ ထွပ်လာဘီး စီးဟူသူ ဟာ လူလေဟို့ ရှင်းရှင်းသတ်ဂေဟို့တွပ် မှလေဂီးထတ်မာ ငြိပ်ရှင်းဟို့ ရောက်သီးဟူ ခွမ်ဟို့ရဟယ်။ ရရာတိုင်း ကီး ဟူ ထားတလတ်ဟို့လည်း သူဟို့ ပေးလေဟယ်။

5 သိုးသားဂန်းဟားဟာ တတိယတဇိဟို့ ဖွမ်လိုက်ဟူ ခီ မာ တတိယသတ္တဝါဟု “လာဂေ” ဆိုဘီး ပြောဇာဟို့ ငါ ကြားရဟယ်။ ငါဟာ ကေ့လိုက်ဟူ ခီမာ မြင်းမဲတကောန် ဟို့ တွံရဟယ်။ အယ်မြင်းထတ်မာ စီးနေဟူသူဟာ သူ့ရဲ့ လတ်မာ ခီခွမ်ဟို့ ကိုင်ဟားဟယ်။

6 အယ်ဘီးန သတ္တဝါလေးပါးလယ်ဟု ထွပ်လာဟူ စကားသံနတူဟူ သံဟု “ဂျောင်ဆန်တခွပ် ဆိုဟာ ဒေနာရီ တပြား၊ မုယောဆန်သောင်းခွပ် ဆိုဟာ ဒေနာရီတပြားဖြ စ်ဟယ်။ ဆိန စပျစ်ဝိုင်ဟို့ ပျစ်စီးစေန” ဆိုဇာဟို့ ငါကြား ရဟယ်။

7 သိုးသားဂန်းဟားဟာ စတုတုတတဇိဟို့ ဖွမ်လိုက်ဟူ ခီမာ စတုတုတသတ္တဝါဟု “လာဂေ” ဆိုဘီး ပြောဇာဟို့ ငါ ကြားရဟယ်။

8 ငါကေ့လိုက်ဟူ ခီမာ မြင်းမဲတကောန်ဟို့ တွံရဟယ်။ အယ်မြင်းထတ်မာ စီးနေဟူသူဟာ သေမန်း ဆိုဘီး နာ မယ်ဖြစ်ဟယ်။ သူ့ရဲ့နော့-က်မာ မရဏာနိုင်ငံ*ဟာ လိုက် လာဟယ်။ သူးနို့ဟာ ထားဘေးနရော၊ ငတ်မွတ်ခေါန်ပါး ဟူ ဘေးနရော၊ သေဘေးနရော၊ မှလေဂီးထတ်မာရှိဟူ

* 6:8 ၆.၈ မရဏာနိုင်ငံ၊ လူသေလေရဲ့ ကမ္ဘာ (ရှု ၁.၁၈)။

သားရဲလိဆန်ဘေးနရော လူလေဟို သတ်ဟို့တွပ် မှလေ
ဂီးရဲ လေးပေါင်တပေါင် ခွမ့်အာဏာဟို့ ရဂေဟယ်။

⁹ သိုးသားဂန်းဟားဟာ ပဉ္စမတဇိဟို့ ဖွမ်လိုက်ဟူ ခီမာ
ဘုရားသခင်ရဲ စကားတော်နရော၊ သစ်စာရှိဟူ သတ်သေ
ခံချစ်နရော၊ သေသတ်ခံရဟူ သူလေရဲ ဝိညာဉ်လေဟို့
ယဇ်ပလ္လင်အော့-က်မာ ငါမြင်ရဟယ်။

¹⁰ အယ်လူလေဟာ “သန်ရှင်း ဖြောန့်မတ်မှန်ကန်ဘီး
စိုးပိုင်တော်မူဟူ သခင်၊ ကျွန်တော့်လေရဲ သွီးတွပ် မှ
လေဂီးထတ်မာ နေဂေဟူလူလေဟို့ တရားစီရင်ဘဲန၊
ကလဲစားချေဘဲန ဖယ်မျှထိကြာအောန် နေဟို့နူး” ဆိုဘီး
သံကုလယ်ဂီးန အော်ပြောဂေဟယ်။

¹¹ အယ်ခီမာ သူးနို့လေဟို့ ဝတ်လောင်ဖုလူဟို့ ပေးဘီး
ဟာ သူးနို့မျိုးဘဲ သေသတ်ခံရဟို့ မှဆောန်ဟူ ညီကို မော
န့်နမလေ ရေတွပ်တိုင်း ပုလဲဇောင်ဟို့ခီထိ ရှစ်ဟားနားယူ
ဂေဟို့တွပ် သူးနို့လေဟို့ မိန်တော်မူဟယ်။

¹² သိုးသားဂန်းဟားဟာ ဆဋ္ဌမ တဇိဟို့ ဖွမ်လိုက်ဟူ ခီ
မာ ငလျင်ဟာ ပြင်းပြင်ထန်းထန်ဟား လှောက်ဟူကြောန်
နေဟာ ဘဲမွီးန လောက်ဟားဟူ ဝတ်ကြမ်းမျိုး မဲဟားဘီး
လဟုလည်း သွီးမျိုး ဖြစ်ဟားဟယ်။

¹³ ကောန်းဂန်ဟူ ကြယ်လေဟာ ရရာတိုင်း ပြင်းဟူလေ
လှောက်ဟူ ခီမာ သဖန်းဗန်ဟု သီးစီးလေဟု ကွဲကုလမျိုး
ဘဲ မှလေဂီးထတ်ဟို့ ကုလဂေဟယ်။

6:12 6.၁၂ က ဗျာ ၁၁.၁၃: ၁၆.၁၈: ၁ မ ၂၄.၂၉: မာ ၁၃.၂၄.၂၅: လု
၂၁.၂၅

14 ကောန်းဂန်ဟုလည်း စာစောန်ဟို့ လိလိုက်ဟူမျိုး ပျော့-က်ဟားဘီး တောန်န ကျွန်းရှိမျှဟာ သူးနှိနေရာဟု နေဘီး ဝိဟားဂေဟယ်။

15 အယ်ခီမာ မုလေဂီးမာရှိဟူ မန်းဂီးလေ၊ အာဏာပိုင် လေ၊ စစ်ဗိုလ်ချုပ်လေ၊ ဌေးလေ၊ ခွန်အားကီးဟူ သူလေန ကျွန်န လွတ်လတ်ဟူ သူလေ ရှိမျှဟာ လှိုင်ဂူလေမာရော၊ တောန်လေထတ်မာ ကုလော့-က်ဆောန် ကြားလေမာရော ပူးနေဘီးဟာ

16 တောန်လေန ကုလော့-က်ဆောန်လေဟို့ “နှိလေထ တ်ဟို့ ပြိုကုလဘီးဟာ ပလွင်ထတ်မာ ထိုင်ဟူ သခင်ရဲ့ မျစ်နှာတော်န သိုးသားဂန်းဟားရဲ့ မျစ်ဒေါသဟုနေဘီး နှိ လေဟို့ ဖောင်းဘီးကွယ်ဂေပါ။

17 ဖြားဖြစ်ကြောန်နူးဆိုဟာ အယ်သခင်လေရဲ့ မျစ် ဒေါသ ထန်ရှားဟူ နေရစ်ဂီးဟာ ကုလလာဘီး ဖြစ်ဟူ ကြောန်န ဖယ်သူဟု ခံနိုင်ဟို့နူး” ဆိုဘီး ပြောဂေဟယ်။

7

ဣသရေလလူမျိုး ၁၄၄,၀၀၀

1 အယ်ဘီးန ကောန်းဂန်တမန် လေးပါးဟာ မုလေဂီး ရဲ့ ဒေါ့-က်လေးဒေါ့-က်မာ ရပ်ဘီးဟာ မုလေဂီးထတ်ဟို့ ရော၊ ပန်လယ်ထတ်ဟို့ရော၊ သစ်ပန်ရှိမျှ ထတ်ဟို့ရော၊

လေတိုက်ဘဲဟို့တွပ် မုလေဂီးလေးဖတ်ဟု လေဟို့ ထီး
ချောက်ဟူးဟူ ဇာဟို့ ငါမြင်ရဟယ်။

² နှော-က်တခါ တခြား ကောန်းဂန်တမန် တပါးဟာ
သတ်ရှင်ဟူ ဘုရားသခင်ရဲ့ တဇီဟို့ ကိုင်ဘီးဟာ နေထွပ်
လာဟူ နေရာဟုနေဘီး တတ်လာဇာဟို့ ငါမြင်ရဟယ်။
အယ်ဘီးန ကောန်းဂန်တမန် တပါးဟု မုလေဂီးန ပန်လယ်
လေဟို့ ဘေးရော-က်စေဟို့တွပ် ခွမ်ရဟူးဟူ ကောန်းဂန်
တမန် လေပါးဟို့။

³ “နို့လေရဲ့ ဘုရားသခင်ဟို့ စေခံဟူ သူလေရဲ့ ဖူးမာ တ
ဇီခတ်ဇာ မပီးမချင်း မုလေဂီး၊ ပန်လယ်န သစ်ပန်လေဟို့
ဘေးဒေါက်ခ ဖြစ်စေန” ဆိုဘီး သံကုလယ်ဂီးန အော်ပြော
ဟယ်။

⁴ အယ်ဘီးန တဇီခတ်ခံရဟူ သူလေရဲ့ ရေတွပ်ဟို့
ငါကြားဟယ်။ ဣသရေလ လူမျိုးလေရဲ့ မျိုးနွယ်ထဲမာ
၁၄၄,၀၀၀ လေဟာ တဇီခတ်ရှင်းဟို့ ခံရဂေဟယ်။

⁵ ယုဒမျိုးနွယ်ထဲမာ ၁၂,၀၀၀၊ တဇီခတ်ခံရဘီး၊

ရုဗင်မျိုးနွယ်ထဲမာ ၁၂,၀၀၀၊

ဂဒ်မျိုးနွယ်ထဲမာ ၁၂,၀၀၀၊

⁶ အာရှာမျိုးနွယ်ထဲမာ ၁၂,၀၀၀၊

နဿလိမျိုးနွယ်ထဲမာ ၁၂,၀၀၀၊

မနာရှေမျိုးနွယ်ထဲမာ ၁၂,၀၀၀၊

⁷ ရှိမောင်မျိုးနွယ်ထဲမာ ၁၂,၀၀၀၊

လေဝိမျိုးနွယ်ထဲမှာ ၁၂,၀၀၀၊

ကူသခါမျိုးနွယ်ထဲမှာ ၁၂,၀၀၀၊

⁸ ဇာဗုလုန်မျိုးနွယ်ထဲမှာ ၁၂,၀၀၀၊

ယောသပ်မျိုးနွယ်ထဲမှာ ၁၂,၀၀၀၊

ဗ်ယာမိန်မျိုးနွယ်ထဲမှာ ၁၂,၀၀၀ လေဟာ တဇိခတ်ဇာ
ဟို့ ခံရဂေဟယ်။

လူအောက်ဂီး

⁹ အယ်ဘီးန ငါကေ့လိုက်ဟူ ခီမာ တိုင်းနိုင်ငံ၊ လူမျိုး
နွယ်စု၊ လူမျိုးလေန ဘာသာစကား ဘောန်းဇောင်ပြောဟူ
သူလေထဲဟုနေဘီး ဖယ်သူလည်း ရေဟို့နိုင်ဘဲဟူ လူအောက်
ဂီးဟာ ဝတ်လောင်ဖုလူဟို့ ဝတ်ဟူးဘီး သူးနို့လတ်မာ
စွန်ပလွဲခတ်လေဟို့လည်း ကိုင်ဟူးဂေဘီးဟာ ပလ္လင်န
သိုးသားဂန်းဟူးရှေ့မာ ရပ်နေဂေဟယ်။

¹⁰ သူးနို့ဟု၊

“ကယ်တန်ရှင်း ကျေးဇူးဟာ
ပလ္လင်ထတ်မာ ထိုင်ဟူ နို့လေရဲ့ ဘုရားသခင်န
သိုးသားဂန်းမာ ရှိဟယ်” ဆိုဘီး ရရာတိုင်း ကုလယ်ဟူ
သံန အော်ပြောဂေဟယ်။

¹¹ ကောန်းဂန်တမန် ဂူလောင်းဟု ပလ္လင်မာရော၊ သတ်ကီး
ဝါဂီးလေန သတ္တဝါ လေးပါးလေရဲ့ ပတ်ပတ်လည်မာရော
ရပ်နေဂေဟယ်။ သူးနို့လေဟာ ပလ္လင်ရှေ့မာ ဘုရားသခင်
ဟို့ ပျပ်ဝပ်ကိုးကွယ်ဘီး၊

¹² သူးနို့ဟု၊

“အာမင်
 ကောန်းဂျီးမင်္ဂလာ၊ ဖောင်းသရေတော်၊
 ဉာဏ်ပညာ၊ ကျေးဇူးတော် ချီမွမ်းရှင်း၊ ဂေါင်တော်၊
 တဂိုးန စွမ်းသတ်တိလေဟာ
 နို့လေ ဘုရားသခင်မာ ကမ္ဘာဆစ်ဆစ် ရှိပါစေ။
 အာမင်!” ဆိုဘီး ပြောဆိုဂေဟယ်။

13 အယ်ဘီးန သတ်ကီးဝါဂီးလေထဲဟု တပါးဟာ “ဝတ်
 လောင်ဖုလူဟို ဝတ်ဟားဟူ သူလေဟာ ဖယ်သူလေနှူး။
 ဖယ်နေရာဟု လာဂေနှူး” ဆိုဘီး ငါ့ဟို မေးဟယ်။

14 ငါဟုလည်း “သခင်၊ ကိုယ်တော်ဟုဘဲ သိဟယ်” ဆို
 ဘီး ပုလန်လျှော့-က်ဟူ ခီမာ အယ်သူဟု၊

“အယ်လူလေဟာ ရရာတိုင်း ကီးဟူ ဆင်းရဲဒေါက်ခ
 ထဲဟု ထွတ်လာဟူ သူလေ ဖြစ်ဂေဟယ်။ သူးနို့လေ
 ဟာ ကိုယ့်ရဲ့ ဝတ်လောင်လေဟို သိုးသားဂန်းဟားရဲ့ သွီး
 အားဖြင့် လျှော်ဘီးဟာ ဖုလူစေဟားဂေဟယ်။

15 အယ်ကြောန်၊
 “သူးနို့လေဟာ ဘုရားသခင်ရဲ့ ပလ္လင်ရှေ့မာ နေရာရဘီး
 ဗိမာန်တော်မာ ဘုရားသခင်ရဲ့ ဝတ်ဟို နေ့ညမပြတ်
 ဘဲ စေခံဂေဟယ်။

ပလ္လင်ထတ်မာ ထိုင်နေဟူ သူဟာ
 သူးနို့လေနတူးဒူး ရှိဘီး ကာကွယ် စောန့်ရှေး-က်လေ့
 မယ်။

16 သူးနို့ဟာ နှော့-က်တခါ ရေလေ၊

စားဇာလေ ငတ်ရဟို့ မှဟဟ။
 နေရောန်လည်း ထိရဟို့ မှဟဟ။
 ဖြားပူဒန်ဟို့လည်း ခံရဂေဟဟ။
 17 ဖြားဖြစ်ကြောင့်နူးဆိုဟဟ ပလ္လင်လယ်မာ ရှိဟူ သိုးသား
 ဂန်းဟားဟဟ
 သူးနှိလေဟို့ လောက်ကျွေးဘီး
 သတ်စမ်းရေဒွမ်းဟို့ လမ်းပြလေ့မယ်။
 ဘုရားသခင်ဟုလည်း သူးနှိလေရဲ့ မျစ်စိမာရှိဟူ မျ
 စ်ရယ်ရှိမျှဟို့ သုပေးမယ်” ဆိုဘီး ပြောလေဟဟ။

8

သတ္တမဇိ

1 သိုးသားဂန်းဟား သတ္တမဇိဟို့ ဖွမ်လိုက်ဟူ ခီမာ ကော
 န်းဂန်ဘောင်မာ နာရီဝပ်လော့-က် တိတိဆိဆိဟား ဖြစ်
 ဟားဟဟ။

2 အယ်ဘီးန ဘုရားသခင်ရဲ့ ရှေ့မာ ရပ်နေဟူ ကောန်း
 ဂန်တမန် ခွန်နစ်ပါးဟို့ ငါမြင်ဟဟ။ သူးနှိလေဟို့ တံပိုး
 ခရာ ခွန်နစ်လောင်းဟို့ ပေးဟဟ။

3 တခြား ကောန်းဂန်တမန် တပါးဟဟ လာဘီးဟဟ ရွှေ
 လန်းဗန်းဟို့ ကိုင်ဘီး ယဇ်ပလ္လင်နားမာ ရပ်နေဟဟ။
 ပလ္လင်ရှေ့မာ ရှိဟူ ရွှေယဇ်ပလ္လင်ထတ်မာ သန်ရှင်းဟူ သူ
 လေဟဟ ဆုတောင်းရှင်းနတူးဒူ ဆစ်ကပ်ဘီး မီးရှို့ဟူ နံသာ
 ပေါန်းလေဟို့ ပေးလိုက်ဟဟ။

၄ နံ့သာပေါင်းရဲ့ မီးခိုးလေဟာ သန့်ရှင်းသူလေရဲ့ ဆုတောင်းရှင်းနတူးဒု ကောင်းဂန်တမန်ရဲ့ လတ်ထဲဟုနော်ဘီး ဘုရားသခင်ရဲ့ ရှေ့တို့ တတ်ဟူးလေဟယ်။

၅ အယ်ဘီးန ကောင်းဂန်တမန်ဟာ လန်းဗန်းဟို့ ယူဘီး ယဇ်ပလ္လင်ရဲ့ မီးန ပုလဲစေဘီး မုလေဂီးထတ်ဟို့ ခုလလိုက်ဟူ ခီမာ သံဗြယ်ရှင်း၊ မိုးချောင်းရှင်း၊ လန်စစ်ဖုလတ်ရှင်း၊ မုလေဂီးလောက်ရှင်းလေ ဖြစ်ဂေဟယ်။

တံပိုးလေ

၆ အယ်ဘီးန တံပိုးခွန်နစ်လောင်းရှိဟူ ကောင်းဂန်တမန် ခွန်နစ်ပါးဟာ တံပိုးမှုဟို့တွပ် ပြင်ဆင်ဂေဟယ်။

၇ ပထမ ကောင်းဂန်တမန်ဟာ တံပိုးမှုဟူ ခီမာ မိုးသီးလေ ဖြစ်ဟူးဟယ်။ သွီးန ရောနေဟူ မီးမျိုးဖြစ်ဟယ်။ မုလေဂီးထတ်ဟို့ ခုလလိုက်ဟူ ခီမာ မုလေသောင်းစုတစု၊ သစ်ပန် သောင်းစုတစု၊ စီးဟူ ဖြစ်ပန် ရှိမျှလေဟာ လောန်ဟူးလေဟယ်။

၈ ဒုတိယ ကောင်းဂန်တမန်ဟာ တံပိုးမှုဟူ ခီမာ မီးလောန်နေဟူ၊ ရုရာတိုင်း ကီးဟူ တောန်ဟို့ ပန်လယ်ထဲဟို့ ခုလလိုက်ဟူ ခီမာ ပန်လယ် သောင်းစု တစုဟာ သွီးဖြစ်ဟူးဟယ်။

၉ ပန်လယ်မာ သတ်ရှင်ဟူ သတ္တဝါ သောင်းစု တစုဟာ သေဟူးဟယ်။ သန်းဖော သောင်းစု တစုလည်း ပျစ်စီးဟူးဟယ်။

10 တတိယ ကောင်းဂန်တမန်ဟာ တံပိုးမှုဟူ ခီမာ မီးတိုင် မျိုး ရရာတိုင်း လန်းဟူ ကြယ်ဂီး တလောင်းဟာ ကောင်းဂန်ဟု ကုလဘီး မှလစ်သောင်းစု တစုဟို့ရော၊ စမ်းရေဒွမ်းလေနားဟို့ရော ရော့-က်ဟားဟယ်။

11 အယ်ကြယ်ဟာ ဒေါန ဆိုဘီး နာမယ်ရှိဟယ်။ ရေသောင်းစု တစုဟာ ဒေါနဖြစ်ဘီး အယ်ခါးဟူ ရေဟို့သော့-က်ဟူကြောင့် လူလေဟာ သေဂေဟယ်။

12 စတုတ္ထ ကောင်းဂန်တမန်ဟာ တံပိုးမှုဟူ ခီမာ နေသောင်းစု တစု၊ လသောင်းစု တစု၊ ကြယ်သောင်းစု တစုဟာ ကြတ်ဟားဘီး မိုက်ဟားဟယ်။ နေသောင်းစု တစုန ညဉ့်သောင်းစု တစုဟုလည်း လန်းရောန်ဟို့ ရဂေဟမ်း။

13 အယ်ဘီးန ငါကေဟူ ခီမာ လင်းယောင် တကောန်ဟာ ကျန်နေဟူ ကောင်းဂန်တမန် သောင်းပါးရဲ့ တံပိုးမှုဟူ သံကြောင့် မှလေဂီးသားလေဟာ အမင်္ဂလာ၊ အမင်္ဂလာ၊ အမင်္ဂလာ ရှိဂေဟယ် ဆိုဘီး ကောင်းဂန်လယ်မာ ပုလန်နေဘီး သံကုလယ်ဂီးန ပြောနေဇာဟို့ ငါကြားရဟယ်။

9

1 ပဉ္စမ ကောင်းဂန်တမန်ဟာ တံပိုးမှုဟူ ခီမာ ကြယ်တလောင်းဟာ ကောင်းဂန်ဟုနေ မှလေဂီးထတ်ဟို့ ကုလလာဇာဟို့ ငါမြင်ဟယ်။ သူ့ဟို့ နတ်ဆောင်းတွမ်း*ရဲ့ သော့-က်ဟို့ ပေးလိုက်ဟယ်။

* 9:1 ဇ.၁ နတ်ဆောင်းတွမ်း၊ မွေဂီးရဲ့ နတ်ဆောင်းမာရှိဘီး နတ်ဆိုးလေဟို့ နှော့-က်ဆောင်း ပြစ်ပေးရှင်း ခံရခန်ထိ ချောက်နှောန်ဟားဟူ နေရာဖြစ်ဟယ်။

² သူဟာ နတ်ဆောင်းတွမ်းရဲ့ သော့-က်ဟို့ ဖွမ်လိုက်ဟူ ခီမာ မီးဖိုဂီးတခုရဲ့ မီးခိုးလေမျိုး အယ်တွမ်းထဲဟု တတ်လာဘီး အယ်နတ်ဆောင်းတွမ်းဟု မီးခိုးလေကြောန့် နေန အာကာသလေဟာ မှော်ဟူးလိုက်ဟယ်။

³ အယ်ဘီးန အယ်မီးခိုးလေထဲမာ ကျိုင်းကောန်လေဟာ မုလေဂီးထတ်ဟို့ ထွပ်လာဂေဟယ်။ သူးနို့ဟာ မုလေဂီးမာရှိဟူ ကန်းမီးဂေါ့-က်လေရဲ့ တဂိုးလေမျိုး ရဂေဟယ်။

⁴ မုလေဂီးထတ်မာရှိဟူ ပြက်ပန်လေန စီးဟူသစ်ပန်ဂီ၊ သစ်ပန်ငယ် ရှိမျှလေဟို့ ဘေးလေဖြစ်စေဘဲ ဖူးမာဘုရားသခင်ရဲ့ ဇိမ္မေဘဲဟူ သူလေဟို့ဘဲ ဘေးဖြစ်စေဟို့တွပ် သူးနို့ဟို့ မှာဟူးဟယ်။

⁵ အယ်လူလေဟို့ သေသတ်ဘဲန ငါးလလောင်းလောင်းညှဉ်းဆဲဟို့ခွမ်ဟို့ ပေးဟူးဟယ်။ အယ်ကျိုင်းကောန်ရဲ့ ညှဉ်းဆဲရှင်းကြောန့် ခံရဟူ ဝေဒနာဟာ လူဟို့ ကန်းမီးဂေါ့-က် ထိုးခံရဟူ ခီမာ နာဟူဝေဒနာန တူဟယ်။

⁶ အယ်နေရစ်လေမာ လူလေဟာ သေမန်းဟို့ ရှာဂေလေမယ်။ အယ်ဘေမဲ့ တို့ရဂေဟု။ ရရာတိုင်း သေရှင်ဘေမဲ့ သေရှင်းဟာ သူးနို့နားဟုနေ ထွပ်ပုလေးဟူးလေမယ်။

⁷ အယ်ကျိုင်းကောန်လေရဲ့ သဏ္ဌာန်ဟာ စစ်ပွဲတွပ် ပြင်ဟူးဟူ စစ်ပြင်းနတူဟယ်။ သူးနို့ရဲ့ ခေါင်းထတ်မာ ရွှေသရဖူလေ ဆောင်းဟူးဟူဇာနတူဘီး သူးနို့ရဲ့ မျစ်နှာလေဟာ လူမျစ်နှာနတူဟယ်။

⁸ သူ့နှို့မာ မီးမဆန်းဗန်နတူဟူ ဆန်းဗန်ရှိဘီး သူ့နှို့သွားဟာ ခြင်္သေ့သွားမျိုး ဖြစ်ဟယ်။

⁹ သူ့နှို့မာ သံရင်အောက်တဇာနတူဟူ ရင်အောက်တဇာရှိဘီး သူ့နှို့ရဲ့ တောန်ပံခတ်လိုက်ဟူသံဟာ စစ်ပွဲဟိုပုလေးဟားဟူ ရရာတိုင်းများဟူ မြင်းရထားရဲ့ သံနတူဟယ်။

¹⁰ သူ့နှို့လေမာ ကန်းမီးဂေါ့-က်မျိုး ဆူးပါဟူဗွီးရှိဘီး အယ်ဗွီးန လူလေဟို ငါးလလောင်းလောင်း ဘေးဖြစ်စေနိုင်ဟူ တဂိုးရှိဟယ်။

¹¹ သူ့နှို့ရဲ့ မန်းဂီးဟာ နတ်ဆောင်းတွမ်းရဲ့ စေတမန် ဖြစ်ဟယ်။ အယ်သူရဲ့ နာမယ်ဟာ ဟေဗြဲစကားအားဖြင့် အဗဒုဒန် (ဓိပါယ်ဟု “ဖျစ်ဆီးရှင်း”) ဖြစ်ဘီး ဂရိစကားအားဖြင့် အပေါလျူန် (ဓိပါယ်ဟု “ဖျစ်ဆီးမား”) ဆိုဘီး ဖြစ်ဟယ်။

¹² ပထမ အမင်္ဂလာဟာ လွန်ဟူးဘီး။ နှော့-က်ထပ် အမင်္ဂလာ နှော့ပါးလာအူးမယ်။

¹³ ဆဋ္ဌမ ကောန်းဂန်တမန်ဟာ တံပိုးမှုလိုက်ဟူ ခီမာ ဘုရားသခင်ရဲ့ ရှေ့မာရှိဟူ ရွှေယဇ်ပလ္လင်ရဲ့ ချိုလေးရှောက်နားဟု ထွပ်လာဟူ သံဟု။

¹⁴ အယ်တံပိုးရှိဟူ ဆဋ္ဌမ ကောန်းဂန်တမန်ဟို “ရရာတိုင်း ကီးဟူ ဥဖရတ်မြစ်နားဟု ခယ်ဟူးဟူ ကောန်းဂန်တမန်လေးပါးဟို လွတ်လိုက်ပါ” ဆိုဘီး ပြောဇာဟို ငါကြားရဟယ်။

¹⁵ အယ်ခီမာ အယ်နှစ်၊ အယ်လ၊ အယ်ရစ်၊ အယ်နာရီ

တွပ် ပြင်ဆင်ဟူးဟူ ကောင်းဂန်တမန်လေးပါးဟာ လူ
သောင်းစုတစုဟို့ သတ်ဟို့တွပ် လွတ်ပေးရှင်းဟို့ ခံရဟ
ယ်။

16 မြင်းစီးသူ ဦးရေဟု ကုဋေပေါင်းနေ့ဆယ် ဖြစ်ဟယ်
ဆိုဘီး သူးနှိလေဟု ရေနေဇာဟို့ ငါကြားရဟယ်။

17 ဗျာဒိတ်ရူပါရောင်မာ ငါမြင်ရဟူ မြင်းစီးဟူ သူရဲလေ
ဟာ မီးတော့-က်နေဟူရောန်၊ နတ်ပြာရောန်၊ ကန်မျိုးဖြစ်
ဟူ ဝါရောန် ရင်အောက်တဇာလေ ရှိဂေဟယ်။ မြင်းလေ
ရဲ့ခေါင်းဟု ခြင်္သေ့ခေါင်းနတူဘီး သူးနှိလေရဲ့ ဇပ်ပေါ့-က်
ထဲဟု မီးတော့-က်နေဟူ မီးခိုးန ကန်လေထွပ်နေဟယ်။

18 သူးနှိရဲ့ ဇပ်ပေါ့-က်ထဲဟုထွပ်ဟူ မီး၊ မီးခိုးန ကန်
လေဟုနေဖြစ်လာဟူ ဘေးဒန်သောင်းခုကြောန် လူလေ
သောင်းစုတစု သေဂေဟယ်။

19 မြင်းလေရဲ့ တဂိုးဟာ သူးနှိလေရဲ့ ဇပ်ပေါ့-က်န ဗွီး
မာရှိဟယ်။ သူးနှိရဲ့ ဗွီးဟာ ဗွီနတူဟူ ခေါင်းရှိဘီးဟာ အယ်
ခေါင်းနဘဲ လူလေဟို့ ဘေးဒန်ရော့-က်စေဟယ်။

20 အယ်ဘေးဒန်လေကြောန် သေဘဲန ကျန်နေဟူ
သူလေဟာ နတ်ဆိုးလေဟို့ရော၊ ရွှေ၊ ငွေ၊ ကြေးနီ၊ ကု
လော့-က်၊ သစ်သားလေန လောက်ဟူးဟူ မြင်နိုင်ဘဲ၊
ကြားနိုင်ဘဲ၊ လမ်းရှော့-က်နိုင်ဘဲဟူ ရောက်ထုလေဟို့
ရော၊ ကိုယ့်လတ်န လောက်ဟူးဟူဇာလေဟို့ ကိုးကွယ်
ဘဲန နေဟို့တွပ် နှောန်ဒရဂေဟ။

21 လူသတ်ရှင်း၊ ပြုစားရှင်း၊ တရားဘဲဟူ မေထုန်

လောက်ရှင်းန ခိုးရှင်းလေတွပ်လည်း နောက်ဒရဘဲန နေ
ဂေဟယ်။

10

ကောန်းဂန်တမန်န စာစောန်ငယ်

¹ အယ်ဘီးန ခွန်အားကီးဟူ ကောန်းဂန်တမန်တပါးဟာ
မိုးတီဟို့ ခြောင်ဘီး ကောန်းဂန်ဟု ဆင်းလာဇာဟို့ ငါမြင်
ရဟယ်။ သူ့ရဲ့ ခေါင်းထတ်မာ သက်တံ့ရှိဘီး သူ့ရဲ့ မျစ်နှာ
ဟာ နေမျိုးဖြစ်ဘီး သူ့ရဲ့ ခေဟာလည်း မီးခဲတိုင်မျိုး ဖြစ်
ဟယ်။

² သူ့ရဲ့ လတ်မာ ဖွမ်ဟူးဟူ စာစောန်ငယ်ဟူး တခုရှိဟု
ယ်။ သူ့ရဲ့ ဘယ်ခေဒေါ-က်ဟို့ ပန်လယ်ထတ်မာန ညာခေ
ဒေါ-က်ဟို့ ကူးထတ်မာ ခုလဟူးဟယ်။

³ ခြသေ့ဟောန်မျိုး ရရာတိုင်း ကုလယ်ဟူသံန ကြွေး
ကြော်ဟယ်။ အယ်မျိုး ကြွေးကြော်ဟူ ခီမာ မိုးချောက်ဟူ
သံ ခွန်နစ်ချစ်ဟာ ဗြယ်လေဟယ်။

⁴ မိုးချောက်ဟူသံ ခွန်နစ်ချစ် ဗြယ်ဟူ ခီမာ၊ ငါဟာ ရေး
ဘီးမှတ်ဟို့ လောက်နေဟူ ခီမာ ကောန်းဂန်ဟု သံဟု “မိုး
ချောက်ဟူသံ ခွန်နစ်ချစ် ဗြယ်ဟူဇာဟို့ ဇိတ်ဟူး။ အယ်
ဇာလေဟို့ ရေးဟူးန” ဆိုဘီး ပြောဇာဟို့ ငါကြားရဟယ်။

⁵ အယ်ခီမာ ပန်လယ်န ကူးထတ်မာ ရပ်နေဟူဇာဟို့ ငါ
မြင်ရဟူ ကောန်းဂန်တမန်ဟု သူ့ရဲ့ ညာလတ်ဟို့ ကောန်း
ဂန်ဟို့ မုလောက်ဘီး၊

6 ကမ္ဘာဆစ်ဆစ် သတ်ရှင်ဘီး ကောန်းဂန်န ကောန်းဂန်
မာ ရှိဟူဇာလေဟူရော၊ မုလေဂီးန မုလေဂီးမာရှိဟူ ဇာ
လေဟူရော ဖန်ဆင်းဟူ သခင်ဟူ တိုင်တယ်ဘီး “ခီကာလ
ဟာ ကြာဟို့ မှဘိ။

7 သတ္တမ ကောန်းဂန်တမန် မူရဟို့ တံပိုးမူသံဗြယ်ဟူ နေ့
ရစ်ကာလမာ ဘုရားသခင်ရဲ့ နတ်နံဟူဇာဟာ သူ့ရဲ့ စေခံ
ပရောဖက်လေဟို့ ပြောဟူးဟူ ဒန်းကောန်းတိုင်းဘဲ ပီး
ဟူးလေ့မယ်” ဆိုဘီး ပြောဟယ်။

8 အယ်ဘီးန ငါကြားရဟူ ကောန်းဂန်ဟု သံဟု “ပန်
လယ်န ကူးထတ်မာ ရပ်နေဟူ ကောန်းဂန်တမန်ရဲ့ လတ်
မာရှိဘီး ဖွမ်ဟူးဟူ စာစောန်ဟို့ သွားယူလိုက်” ဆိုဘီး ငါ
ဟို့ ပုလန်ဘီးပြောဟယ်။

9 အယ်ကြောန့် ငါဟာ ကောန်းဂန်တမန်နားဟို့ သွားဘီး
စာစောန်ငယ်ဟို့ ငါ့ဟို့ ပေးဟို့တွပ် တောန်းလိုက်ဟူ ခီမာ
သူဟု “စာစောန်ဟို့ ယူဘီး စားလိုက်ပါ။ အယ်ဇာဟာ နန့်
ရဲ့ ဝန်းထဲမာ ခါးဘေမဲ့ နန့်ရဲ့ ဇပ်ပေါ့-က်ထဲမာ ပျားရယ်
မျိုး ရှိလေ့မယ်” ဆိုဘီး ငါ့ဟို့ ပြောဟယ်။

10 ငါဟုလည်း ကောန်းဂန်တမန်ရဲ့ လတ်ဟု စာစောန်
ငယ်ဟို့ ယူဘီး စားလိုက်ဟူ ခီမာ ငါ့ရဲ့ ဇပ်ပေါ့-က်ထဲမာ
ပျားရယ်မျိုးရှိဘေမဲ့ စားဘီးန ငါ့ရဲ့ဝန်းထဲမာ ခါးလေဟု
ယ်။

11 အယ်ခီမာ နန့်ဟာ ရရာတိုင်း များဟူလူမျိုး၊
တိုင်းနိုင်ငံလေ၊ ဘာသာစကား ဘောန်းဇောင် ပြောဟူ

လူမျိုးလေ၊ မန်းဂီးလေန ပတ်သတ်ဘီး နှော-က်ထပ် ပ
ရောဖက်ပြုဘီး ဟောပြောရမယ် ဆိုဘီး ငါ့ဟို့ ပြောလေ
ဟယ်။

11

သတ်သေခံ နှောယော့-က်

¹ အယ်ဘီးန တောန်အူးန တူဟူတိုင်းဇာ ကျူးရိုးတရှော
န်းဟို့ ငါ့ဟို့ ပေးဘီးဟာ “ထဘီး ဘုရားသခင်ရဲ့ ဗိမာန်
တော်န ယဇ်ပလုလင်ဟို့ တိုင်းဘီးဟာ အယ်နေရာမာ
ဝတ်ပြုကိုးကွယ်နေဟူ သူလေဟို့ ရေလိုက်ပါ။

² အယ်ဘေမဲ့ ဗိမာန်တော်ရဲ့ ခြံဝမ်း ပုလန်ဖတ်မာရှိဟူ
တံခိုင်းဟာ လူမျိုးခြားလေဟို့ ပေးဟားဟူကြောန့် တိုင်း
ဘဲန ချန်ဟားလိုက်။ အယ်သူလေဟာ သန်ရှင်းဟူ မြို့ဟို့
လေးဆယ်နှောလ လောင်းလောင်း ခေန နန်းဂေ့လေ့မယ်။

³ အယ်ခီမာ ငါဟာ ငါ့ရဲ့ သတ်သေခံနှောပါးဟို့ လွတ်
မယ်။ သူးနို့ဟာ ဝတ်ကြမ်းဟို့ ဝတ်ဘီးဟာ ရစ်ပေါင်း
၁,၂၆၀ လောင်းလောင်း ပရောဖက်ပြုဘီးဟာ ဟောပြော
ဂေ့လေ့မယ်” ဆိုဘီး ပြောဟယ်။

⁴ အယ်လူလေဟာ မုလေဂီးရဲ့ သခင်ရှေ့မာ ရှိဟူ
သံလွင်ပန်နှောပန်န ဆီမီးခွပ် နှောလောင်းဖြစ်ဂေ့ဟယ်။

⁵ တယော့-က်ယော့-က်ဟာ သူးနို့ဟို့ ညှဉ်းဆဲပေးဟို့
လောက်ဟယ် ဆိုဟာ သူးနို့ရဲ့ ဇပ်ပေါ့-က်ထဲဟ မီးထွတ်
လာဘီးဟာ သူးနို့ရဲ့ ရန်သူလေဟို့ လောန်စေဟယ်။ တ

ယော့-က်ယော့-က်ဟု သူးနို့ဟို့ ညှဉ်းဆဲဟယ် ဆိုဟာ
သေသတ်ဇာဟို့ ခံရမယ်။

⁶ သူးနို့ ပရောဖက်ပြုဘီး ဟောပြောဟူ နေ့ရစ်လေမာ
မိုးဝါဘဲဟို့တွပ် ကောန်းဂန်ဟို့ ပိဟားနိုင်ဟူ ခွမ်ရှိဘီး ရေ
ဟို့ သွီးမျိုး ဖြစ်ဟို့တွပ် ပုလောန်းလဲနိုင်ဟို့ ခွမ်ရဘီး သူးနို့
လိုရှင်ဟူ ခီတိုင်း မုလေဂီးဟို့ ဘေးဒန်ဘောန်းဇောင်န ဒန်
ခတ်နိုင်ဟူ ခွမ်လေရှိဂေဟယ်။

⁷ သူးနို့လေဟာ သတ်သေခံဘီးန နတ်ဆောင်းတွမ်းထဲ
ဟု တတ်လာဟူ သားရဲလိဆန်ဟာ သူးနို့န စစ်တိုက်ဟူ
ကြောန့် အောန်မြင်ဘီး သူးနို့ဟို့ သတ်လေ့မယ်။

⁸ သူးနို့ရဲ့ လောန်းလေဟာ မြို့ဂီးလေရဲ့ လမ်းမထတ်
မာ ကျန်ရစ်ဂေလေ့မယ်။ အယ်မြို့ဟာ သူးနို့ရဲ့ သခင်ဟို့
လက်ဝါးကပ်တိုင်ထတ်မာ တန်ဘီးသတ်ခံရဟူမြို့ ဖြစ်ဟ
ယ်။ အယ်မြို့ဟာ သောဒိုန အဲဂုတုတုပြည်ဟို့ ပေါန်ဆော
န်ဟားဟူ မြို့ဖြစ်ဟယ်။

⁹ အယ်ခီမာ လူမျိုးနွယ်စုလေ၊ ဘာသာစကား ဘော
န်းဇောင်ပြောဟူ လူမျိုးလေန၊ တိုင်းနိုင်ငံ ဂူလောင်းဟု
လူလေဟာ သူးနို့ရဲ့ လောန်းဟို့ သောင်းရစ်ခွဲ လောင်း
လောင်း ကေ့ဂေ့ဘီးဟာ အယ်လောန်းလေဟို့ သန်းခွလိုင်း
မာ သဂြိုဟ်ခွမ် ပေးဘဲန နေဂေ့လေ့မယ်။

¹⁰ မုလေဂီးထတ်မာ နေဂေ့ဟူ သူလေဟာ အယ်လူ
လေရဲ့ ဖျစ်ပျစ်ကြောန့် ဝန်းသာဂေ့ဘီး၊ ပျော်ဂေ့ဘီးဟား

ယော့-က်နယော့-က် လတ်ဆောန်လေဟို ပို့ပေးဂေလေ့
မယ်။ ဖြားဖြစ်ကြောန့်နူးဆိုဟာ အယ်ပရောဖက် နှေ့
ယော့-က်ဟာ မုလေဂီးထတ်မာ နေဂေဒူးဟာ သူးနို့လေဟို
ညှဉ်းဆဲဟားကြောန့် ဖြစ်ဟယ်။

11 အယ်ဘီးန သောင်းရစ်ခွဲ ကြာဟား ဟူ ခီမာ
ဘုရားသခင်နားဟာ သတ်ဝိညာဉ်ဟာ အယ်သူလေထဲဟို
ဝမ်ဟားဘီး သူးနို့ဟာ ထဘီးဟာ မတ်တတ်ရပ်ဂေဟယ်။
အယ်လူလေဟို မြင်ရဟူ သူလေဟာ ရရာတိုင်း ကြော့-က်
ဂေဟယ်။

12 အယ်ခီမာ ကောန်းဂန်ဟာ ရရာတိုင်း ကီးဟူ သံဟာ
“အယ်နေရာဟို တတ်လာဂေပါ” ဆိုဘီး အယ်လူ နှေ့
ယော့-က်ဟို ပြောဇာဟူ ကြားဟူ ခီမာ သူးနို့ဟာ မိုးတီန
ကောန်းဂန်ဘောင်ဟို တတ်ဟားဂေဟယ်။ သူးနို့ရဲ့ ရန်သူ
လေဟာ သူးနို့ဟို ကေ့နေဂေဟယ်။

13 အယ်ခီနာရီမာဘဲ ရရာတိုင်း ကြမ်းဟူ မုလေဂီး
လှောက်ဟူ ခီမာ မြို့ဆယ်ပေါင် တပေါင်ဟာ ပြိုကုလ
ဟားဟယ်။ အယ်မျိုး မုလေဂီလှောက်ရှင်းကြောန့် လူ
၇,၀၀၀ သေဂေဟယ်။ ကျန်ရစ်ဟူ သူလေဟာ ရရာတိုင်း
ကြော့-က်ဘီး ကောန်းဂန်ဘောင်ဟာ ဘုရားသခင်ရဲ့ နာမ
တော်န ဂေါင်တော်ဟို ချီးမွမ်းဂေဟယ်။

14 ဒုတိယ အမင်္ဂလာ လွန်ဟားဘီ။ တတိယ အမင်္ဂလာ
မြန်းမြန်ဟား ရော့-က်လာလေ့မယ်။

သတ္တမ တံပိုးမှုဟူကြောင်း

15 သတ္တမ ကောင်းဂန်တမန်ဟာ တံပိုးမှုလိုက်ဟူ ခီ
မာ ကောင်းဂန်ဘောင်မာ ရရာတိုင်း ကုလယ်ဟူ သံဟာ
ပေါ်လာဘီး၊

“ကမ္ဘာလောကဟာ နို့လေရဲ့
ဘုရားသခင်န ခရစ်တော် ပိုင်ဟူဇာ ဖြစ်ဟားဘီ။
ကိုယ်တော်ဟုလည်း ကမ္ဘာဆစ်ဆစ် အောက်ချောက်
လေ့မယ်” ဆိုဘီး ပြောဟယ်။

16 အယ်ခီမာ ဘုရားသခင်ရှေ့မာ ပလ္လင်ထတ်မာ ထိုင်နေ
ဂေဟူ သတ်ကီးဟူသူ ၂၄ ပါးဟာ ဘုရားသခင်ဟို ပျပ်ဝပ်
ကိုးကွယ်ဘီး၊

17 “ခုရှိဘီး ရင်းရင်ဒူးဟုလည်းရှိဟူ အနန္တတဂိုးရှင်
ဘုရားသခင်!

ကိုယ်တော်ဟာ မဟာတဂိုးတော်ဟို သောင်းပြုဘီးဟာ
လောကဟို အောက်စိုးဟူကြောန့် ကျေးဇူးတော်ဟို
ချီးမွမ်းပါဟယ်။

18 ကိုယ်တော်ရဲ့ မျစ်ဒေါသ ရှေး-က်လာဟူ ကာလရော၊
သေဟားဟူ သူလေဟို တရားစီရင်ဟူ ကာလရော၊
ခုခီမာ ကုလရှေး-က်လာဘီ ဖြစ်ဟူကြောန့် လူမျိုးခြား ဂူ
လောင်းဟာ မျစ်ဒေါသထွပ် ဂေဟယ်။
ကိုယ်တော်ရဲ့ စေခံ ပရောဖက်လေ၊ ကိုယ်တော်ရဲ့
သန်ရှင်းဟူ သူလေ၊

ကိုယ်တော်ရဲ့ နာမတော်ကို ကြော-က်ဘီး ရိုသေဟူသူ ကီး
 လေ ငယ်လေဟာ ဆုလာဘ်ကို ယူတို့တွပ်
 ဒီကာလရော၊ မှလေဂီးကို ဖျစ်စီးဟူ သူလေကို
 ဖျစ်ဆီးတို့ ဒီကာလရော ရော-က်လာဘီ”
 ဆိုဘီး ဘုရားသခင်ကို လျှော့-က်ဟူးဂေဟယ်။

¹⁹ အယ်ဘီးန ကောန်းဂန်ဘောင်မာ ရှိဟူ ဘုရားသခင်ရဲ့
 မိမာန်တော်ဟာ ပွမ့်ဟူးဘီး မိမာန်တော်ထဲမာ ကိုယ်တော်
 ရဲ့ ပဋိညာဉ် သစ်တာကို မြင်ရဟယ်။ လန့်စစ်ဖုလတ်ဇာ၊
 သံမြယ်ဇာ၊ မိုးချောင်းဇာ၊ မှလေဂီးလောက်ဇာန ရရာတိုင်း
 ကီးဟူ မိုးသီးကုလဇာလေ ဖြစ်လေဟယ်။

12

မီးမန နဂါးဂီး

¹ အယ်ဘီးန ကောန်းဂန်မာ ရရာတိုင်း ကီးဟူ နိမိတ်
 လတ်ခဏာ တွံရဟယ်။ မီးမတယော့-က်ဟာ နေဟို့ ဝတ်
 ဘီး လဟို့ ခေအော့-က်မာ နန်းဟူးဘီး ခေါင်းထတ်မာ
 ကြယ်ဆယ့်နှေ့လောင်းပါဟူ သရဖူဟို့ ဆောင်းဟူးဟ
 ယ်။

² အယ်မီးမဟာ ဗိုက်ပိုက်နေဘီး သားမွီးဟူ ဝေဒနာ
 ကြောန့် အော်ဘီး သားမွီးဟို့တွပ် ရရာတိုင်း ခံစားနေရ
 ဟယ်။

³ ကောန်းဂန်မာ တခြား နိမိတ်လတ်ခဏာဟို့ မြင်ရဟ
 ယ်။ ခေါင်းခွန်နစ်လောင်းန ချိုဆယ်ရှောန်းရှိဘီး သူရဲ့ ခေါ

န်းထတ်မာ သရဖူ ခွန်နစ်ခုဟို ဆောင်းဟူးဘီး နီရဲနေဟူ
နဂါးဂီး တကောန်ရှိဟယ်။

⁴ သူရဲ ဗွီးဟာ ကောန်းဂန်မာ ရှိဟူကြယ် သောင်းစုတ
စုဟို ဆွဲဘီး မလေဂီးထတ်ဟို ပစ်ခလလိုက်ဟယ်။ နဂါး
ဟာ သားမွီးခါနီး ဖြစ်နေဟူ မီးမရှေ့မာရပ်ဘီး သားမွီးဟူ
ခီမာ သူရဲသားဟို မျိုဟိုတွပ် စောန်နေဟယ်။

⁵ အယ်မီးမဟာ လူမျိုးဘောင်းဇောင်ဟို သံလုံတံန
အောက်စိုးရဟူ ယော့-က်ကျားသားဟို မွီးဟယ်။ အယ်
သားဟာ ဘုရားသခင်နားဟိုရော၊ ပလ္လင်နားဟိုရော၊ ခီ
ဆောန်ရှင်းဟို ခံရဟယ်။

⁶ အယ်မီးမဟုလည်း တောကန္တရထဲဟို ထွပ်ပုလေးရဟ
ယ်။ အယ်တောထဲမာ ရစ်ပေါန်း ၁,၂၆၀ လောင်းလောင်း
သူဟို ကေ့ဘီး စောန်ရှော့-က်ဟိုတွပ် ဘုရားသခင် ပြင်ဆ
င်ဟူးဟူ နေရာ တနေရာ ရှိဟယ်။

⁷ အယ်ဘီးန ကောန်းဂန်မာ စစ်ဖြစ်ဟယ်။ မိကုခေလ
န သူရဲ ကောန်းဂန်တမန်လေဟာ နဂါးဟို တိုက်ဂေ့ဟယ်။
နဂါးနသူရဲ စေတမန်လေဟာ ပုလန်ဘီးတိုက်ဂေ့ဟူ ခီမာ

⁸ နိုင်ဂေ့ဟူ။ ကောန်းဂန်မာလည်း သူးနှိတွပ်နေရာ မေ့
ဟုမ်း။

⁹ အယ်ခီမာ တကမ္ဘာလောင်းဟို လှည့်ဇားဘီး စာတန်
မာရ်နတ် နာမယ်ရှိဟူ ရှေးဗွီဟောင်းဖြစ်ဟူ နဂါးဂီးဟို မ
လေဂီးထတ်ဟို ပစ်ခလရှင်းဟို ခံရဟယ်။ သူနတူးဒူ သူရဲ

စေတမန်လေဟုလည်း ပစ်ခံလှိုင်းဟို့ ခံရဂေဟယ်။

10 အယ်ဘီးန ကောန်းဂန်ဘောင်မာ ရရာတိုင်း ကုလယ်ဟူသံဟု “နို့လေဘုရားသခင်ရဲ့ ကယ်တန်ရှင်း၊ တဂိုး၊ နိုင်ငံတော်န ခရစ်တော်မာရှိဟူ အာဏာစစ်လေဟာ ခုပေါ်လေဘီ။ ဖြားဖြစ်ကြောန်းနူးဆိုဟာ နို့လေရဲ့ ညီကိုလေဟို့ စွပ်စွဲဟူသူဖြစ်ဟူ နို့လေရဲ့ ဘုရားသခင်ရှေ့မာ နေရောညဉ့်ရော သူးနို့ဟို့ စွပ်စွဲဟူ သူဟာ ပစ်ခံလှိုင်းဟို့ ခံရလေဟယ်။

11 ညီကို မောန်နှမလေဟာ သိုးသားဂန်းဟားရဲ့ သွီးတော် အားဖြင့် ရော၊ ကိုယ့် ကိုယ် ကိုယ် သတ်သေခံဟူ စကားတော်အားဖြင့်ရော သူဟို့ အောက်နိုင်ဂေဟယ်။ သူးနို့ဟာ သေခံရအောက်ထိ သူးနို့ရဲ့ သတ်ဟို့ ပြောဂေဟု။

12 အယ်ကြောန့် ကောန်းဂန်ဘောင်န ကောန်းဂန်ဘောင်မာ စံမြန်းဟူ သူလေ ရရာတိုင်း ဝန်းသာဂေပါ။ မုလေဂီးန ပန်လယ်လေဟာ အမင်္ဂလာရှိဂေဟယ်။ ဖြားဖြစ်ကြောန်းနူးဆိုဟာ မာရ်နတ်ရဲ့ ခီဟာ ရှစ်ဟားဘဲရှိဟူ ကြောန်းဟို့ သိဟူကြောန့် ရရာတိုင်း ဒေါသန နန်းနို့နားဟို့ ဆင်းလာဘီ” ဆိုဘီး ပြောဇာဟို့ ငါကြားရဟယ်။

13 နဂါးဟာ မုလေဂီးထတ်ဟို့ ပစ်ခံလှိုင်းဟို့ သိဟူ ခီမာ ယော့-က်ကျားသားဟို့ မွီးဟူ မီးမဟို့ ရှာဘီးဟာ ညှဉ်းဆဲလေဟယ်။

14 အယ်ဘေမဲ့ အယ်မီးမဟာ တောကန္တာရထဲမာ ရှိဟူ သူရဲ့ နေရာဟို့ ပုလန်ဘီး သွားနိုင်ဟို့တွပ် ရရာတိုင်း ကီး

ဟူ လင်းယောင်ရဲ့ တောန်နေ့ခုံဟို့ ရဟားဟယ်။ သူဟာ အယ်နေရာမာ ဗွီလတ်ဟုနေ လွတ်ဟို့တွပ် သောင်းနှစ်ခွဲ လောင်းလောင်း ပြုစုစောင့်ရှော-က်ရှင်းဟို့ ခံရဟယ်။

¹⁵ ဗွီဟာ အယ်မီးမဟို့ ရေန မျောပါဟို့တွပ် သူရဲ့ ဇပ် ပေါ့-က်ထဲဟုနေ ရေဟို့ မှလစ်ရေစီးမျိုး သူရဲ့ ဇပ်ပေါ့-က် ထဲဟု မှထုလိုက်ဟယ်။

¹⁶ အယ်ဘေမဲ့ မှလေဂီးဟာ အယ်မီးမဟို့ ကူညီပေးဟယ်။ မှလေဂီးဟာ သူရဲ့ ဇပ်ပေါ့-က်ဟို့ ဖွမ်ဘီး နဂါးရဲ့ ဇပ် ပေါ့-က်ထဲဟု မှထုလိုက်ဟူ မှလစ်ရေဟို့ မျိုခလလိုက်ဟယ်။

¹⁷ အယ်ခီမာ နဂါးဟာ အယ်မီးမဟို့ ဒေါသထွပ်ဘီး ဘုရားသခင်ရဲ့ ပညတ်တော်လေဟို့ စောင့်ထီးဟူ သူလေ ယေရှုန ဆိုင်ဟူ၊ သတ်သေခံချစ်လေဟို့ ရဟားဟူ သူလေ ဖြစ်ဂေဟူ၊ အယ်မီးမရဲ့ မျိုးနွယ်ထဲဟု ကျန်နေဟူ သူလေ ဟို့ စစ်တိုက်ဟို့တွပ် ထွပ်ဟားဘီး၊

¹⁸ နဂါးဟာ ပန်လယ်ရဲ့ သဲပုလန်မာ ရပ်နေဟယ်။*

13

ပန်လယ်ထဲဟု တတ်လာဟူသားရဲ

¹ အယ်ဘီးန ချိုဆယ်ရှောန်းန ခေါင်းခွန်နစ်လောင်းရှိဟူ သားရဲတကောန်ဟာ ပန်လယ်ထဲဟု တတ်လာဇာဟို့ ငါမြ

* 12:18 ၁၂.၁၈ နဂါးဟာ ပန်လယ်ရဲ့ သဲပုလန်မာ ရပ်နေဟယ်၊ တချို့ မူရင်းလတ်ရေးမူလေမာ ငါရပ်နေဟယ်၊ ဆိုဘီး နေ့-က်ဟုလိုက်လာဟူ အယ်ကျမ်းပိုဒ်န ဆစ်ပေးဟားဟယ်။ 13:1 ၁၃.၁ ဗျာ ၁၇.၃.၇-၁၂

င်ရဟယ်။ အယ်ချိုလေထတ်မာ သရဖူဆယ်ခုရှိဘီး သူ့ရဲ့ ခေါင်းတလောင်းစီမာ ဘုရားသခင်ဟို့ စော်ကားတတ်ဟူ နာမယ်လေရှိဟယ်။

² ငါမြင်ရဟူ အယ်သားရဲဟာ ကုလားသစ်တကောန်န တူဟယ်။ သူ့ရဲ့ ခေဟာ ဝပ်ဝံခေမျိုးဖြစ်ဘီး သူ့ရဲ့ ဇေ ပေါ့-က်ဟာ ခြင်္သေ့ဇေပေါ့-က်မျိုး ဖြစ်ဟယ်။ နဂါးဟာ သူ့ရဲ့ တဂိုးလေ၊ ပလ္လင်လေ ရရာတိုင်းကီးဟူ ခွမ့်အာဏာ လေဟို့ သူ့ဟို့ ပေးလေဟယ်။

³ အယ်သားရဲရဲ့ ခေါင်းတလောင်းဟာ သေအောန်သတ် ခံရဟူမျိုး ဖြစ်ဘေမဲ့ သေစေတတ်ဟူ နာပျော့-က်ဟား လေဟယ်။ အယ်ခီမာ တကမ္ဘာလောင်းဟာ အံ့ဩဘီး အယ်သားရဲနော့-က်ဟို့ လိုက်ဂေဟယ်။

⁴ နဂါးတကောန်ဟာ သားရဲဟို့ ခွမ့်အာဏာပေးဟူကြော န် သူးနို့ဟာ နဂါးဟို့ ကိုးကွယ်ဂေဟယ်။ သူးနို့ဟ “ဖယ်သူ ဟာ သားရဲနတူနူး။ ဖယ်သူဟ သူဟို့ တိုက်နိုင်ဟို့နူး” ဆို ဘီး သားရဲဟို့လည် ကိုးကွယ်ဂေဟယ်။

⁵ အယ်သားရဲဟာ ရရာတိုင်းကြွားဘီး ဘုရားသခင်ဟို့ စော်ကားတတ်ဟူ ဇာတ်ပေါ့-က်ရှိဘီး လေးဆယ့်နှေ့လ လောင်းလောင်း အောက်စိုးဟူခွမ့်ဟို့ ရဟားဟယ်။

⁶ အယ်ခီမာ သူ့ရဲ့ ဇာတ်ပေါ့-က်ဟို့ ဖွမ့်ဘီး ဘုရားသ ခင်ဟို့ စော်ကားဟူ စကားဟို့ပြောဘီး ကိုယ်တော်ရဲ့ နာမ တော်ဟို့ရော၊ ကိုယ်တော်ရဲ့ တဲတော်ဟို့ရော၊ ကောန်းဂန် ဘောင်မာ စံမြန်းဟူ သူလေဟို့ရော ပြစ်မှားဘီး ပြောဟ

ယ်။

⁷ သူဟာ သန်ရှင်းဟူသူလေဟို စစ်တိုက်ဘီး အောက်နိုင်
ဟူးဟူကြောနဲ့ မျိုးနွယ်စုလေ၊ လူမျိုးလေ၊ ဘာသာစကား
န တိုင်းနိုင်တိုင်းမာရှိဟူ လူလေဟို အောက်စိုးဟူ ခွမ်ဟို
လည်း ရဂေဟယ်။

⁸ သေသတ်ရှင်းဟို ခံရဟူ သိုးသားဂန်းဟူးရဲ့ သတ်
စာစောန်မာ ကမ္ဘာဦးဟုနေစဘီး နာမယ်ရေးဟူးဘဲဟူ၊ မှ
လေဂီးထတ်မာ နေဂေဟူသူလေ ဂူလောင်းဟာ အယ်သား
ရဲ့ဟို ကိုးကွယ်ဂေလေဟယ်။

⁹ “နားရှိဟူသူလေ ကြားပါစေ။

¹⁰ ဖမ်းခံရဟူသူဟာ ဖမ်းခံရဟိုဘဲ ဖြစ်ဟယ်။ ထားန
သတ်ခံရဟူသူဟာ ထားနသတ်ခံရဟိုဘဲ ဖြစ်ဟယ်။ အယ်
နေရာမာ သန်ရှင်းသူလေရဲ့ သီးခံရှင်းန သစ်စာစောန်ရှင်း
လေ ရှိဂေဟယ်။”

¹¹ အယ်ဘီးန မှလေဂီးထဲဟု ထွပ်လာဟူ တခြားသားရဲ့
တကောန်ဟို ငါမြင်ရဟယ်။ သူဟာ သိုးသားဂန်းဟူးရဲ့
ချိုနတူဟူ ချိုနေ့ရှောန်းရှိဘီး နဂါးမျိုးဘဲ စကားပြောဟု
ယ်။

¹² အယ်သားရဲ့ဟာ ပထမသားရဲ့ရဲ့ တဂိုးရှိမျှဟို သူ
ရဲ့ရှေ့မာသောင်းဘီး သေတတ်ဟူ၊ နာပျော့-က်ဟူးဟူ
ပထမသားရဲ့တကောန်ဟို မှလေဂီးထတ်မာ နေဂေဟူ သူ
လေဟာ ကိုးကွယ်ဟိုတွပ် လောက်ဟယ်။

¹³ ရရာတိုင်းကီးဟူ နိမိတ်လတ်ခဏာလေဟို လောက်
ဘီး လူလေရှေ့မာ ကောန်းဂန်ဟုနေ မှလေဂီးထတ်ဟို မီး

ဟို့ကုလစေဟယ်။

14 သူဟာ ပထမသားရဲတကောန်ရှေ့မာ လောက်ခွမ့်ရဟွားဟူ နိမိတ်လတ်ခဏာလေန မုလေဂီးထတ်မာနေဂေဟူ သူလေဂူလောင်းဟို့ လှည့်ဖြားဘီး ထားဒန်ရာရဘေမဲ့သေဘန်သတ်ရှင်နေဟူ သားရဲရဲရောက်ထုဟို့ လောက်ဟို့တွပ် မုလေဂီးထတ်မာ နေဂေဟူသူလေဟို့ လောက်ခိုင်းဟယ်။

15 သားရဲရဲ ရောက်ထုဟာ စကားပြောနိုင်ဟို့တွပ်န သားရဲရဲရောက်ထုဟို့ ကိုးကွယ်ဘဲဟူသူ ရှိမျှဟို့ သတ်နိုင်ဟို့တွပ်ရော၊ သားရဲရဲရောက်ထုဟို့ သတ်သွမ်းပေးနိုင်ဟူခွမ့်ဟို့ ရလေဟယ်။

16 လူဂီးရော၊ လူငယ်ရော၊ ကြွယ်ဝဟူသူရော၊ ဆင်းရဲဟူသူရော၊ လွတ်လတ်ဟူသူရော၊ ကျွန်ဖြစ်ဟူသူရော၊ လူလေ ဂူလောင်းဟို့ သူးနှိရဲ ညာလတ်မာရော၊ ဖူးထတ်မာရော ဇီခတ်ခိုင်းဘီး

17 သားရဲရဲနာမယ် အယ်မျိုးမှုဘဲနေဟာ ကိုယ်စားပြုဟူဂဏန်းဟို့ ဇီခတ်ရှင်း မေ့ဘဲဟူသူဟို့ ရောင်းဝယ်လောက်ဘဲဟို့တွပ် စီရင်ဟွားဟယ်။

18 အယ်နေရာမာ ဉာဏ်ပညာရှိဟို့တွပ် လိုအပ်ဟယ်။ ထိုးထွင်းဟူ ဉာဏ်ရှိဟူသူဟာ သားရဲရဲ ကိန်းဂဏန်းဟို့တွပ်ချစ်ပါစေ။ ဖြားဖြစ်ကြောန်နူးဆိုဟာ အယ်ဇာဟာ လူတယော့-က်ရဲ ကိန်းဂဏန်းဖြစ်ဘီး အယ်ကိန်းဂဏန်းဟာ ၆၆၆ ဖြစ်ဟယ်။

14

သိုးသားဂန်းဟွားနု လူ ၁၄၄,၀၀၀

¹ အယ်ဘီးနု ငါကော့လိုက်ဟူ ခီမာ သိုးသားဂန်းဟွားဟာ ဇိအုန်တောန်ထတ်မာ ရပ်နေဟယ်။ သိုးသားဂန်းဟွားရဲ့ နာမနု ဖဘုရားသခင်ရဲ့ နာမလေဟို သူးနို့ရဲ့ ဖူးမာရေးဟွားဟူသူ ၁၄၄,၀၀၀ လေဟာ သိုးသားဂန်းဟွားနု တူးဒူရိုနေဂေဟယ်။

² အယ်ဘီးနု ရေကဒန်ဟုကုလဟူ ရေသံနရော၊ ရရာတိုင်းကုလယ်ဟူ မိုးကြိုးသံနတူဟူ ကောန်းဂန်ဟုသံဟို ငါကြားရဟယ်။ ငါကြားရဟူ အယ်သံဟာ စောန်းသမားလေဟာ သူးနို့လေရဲ့ စောန်းလေဟို တီးနေဟူ သံနလည်းတူဟယ်။

³ သူးနို့ဟာ ပလ္လင်ရှေ့မာရော၊ သတ္တဝါလေးပါးနု သတ်ကီးဝါဂီးလေရဲ့ ဇာတ်ပေါ့-က်လေ ရှေ့မာရော ချင်းသစ်ဟိုဆိုဂေဟယ်။ မုလေဂီးထတ်မာ ဝီးကော့-က်ဘီး ကယ်တန်ခံရဟူသူ ၁၄၄,၀၀၀ ဟု လွဲဘီးဟာ ဖယ်သူလည်း အယ်ချင်းဟို သန်ယူနိုင်ဟု။

⁴ အယ်သူလေဟာ မီးမလေနု ညှပ်ညူးစောဘဲဟူ သူလေဖြစ်ဂေဟယ်။ ဖြားဖြစ်ကြောန်နူးဆိုဟာ သူးနို့ဟာ လူပျိုစစ်စစ်ဖြစ်ဂေဟယ်။ သူးနို့ဟာ သိုးသားဂန်းဟွား သွားဟူနေရာဟို လိုက်ဂေဟူသူလေ ဖြစ်ဂေဘီး ဘုရားသခင်

န သိုးသားဂန်းဟူးတွပ် ဦးသီးဖြစ်ဘီး လူလေထဲမာ ဝီး
ကော့-က်ခံရဟူ သူလေဖြစ်ဂေဟယ်။

⁵ သူးနှိရဲ့ ဇပ်ပေါ့-က်မာ လီညာရှင်း မေ့ဟူ။ သူးနှိဟာ
ပြစ်တန်ဇာမေ့ဘဲသူလေ ဖြစ်ဂေဟယ်။

ကောန်းဂန်တမန် သောင်းပါးကြောန်း

⁶ အယ်ဘီးန တခြားကောန်းဂန်တမန် တပါးဟာ ကောန်း
ဂန်လယ်မာ ပုလန်နေဇာဟို့ ငါမြင်ရဟယ်။ သူဟာ မုလေ
ဂီးထတ်မာနေဂေဟူ သူလေဖြစ်ဟူ တိုင်းနိုင်ငံ၊ မျိုးနွယ်
စု၊ ဘာသာစကား ဘောန်းဇောင်ပြောဂေဟူ လူမျိုးလေဟို့
ဟောပြောဟို့တွပ် ထာဝရတည်ဟူ၊ ကောန်းမြတ်ဟူ ဒန်း
ကောန်းဟို့ ယူဆောန်လာဟယ်။

⁷ အယ်ကောန်းဂန်တမန်ဟ “ဘုရားသခင်တရားစီရင်
ဟူ ခီဟာ ကုလလာဘီး ဖြစ်ဟူကြောန့် ကိုယ်တော့်ဟို့
ကြော့-က်ဂေဘီး ဂေါင်သရေဟို့ ချီးမွမ်းဂေပါ။ ကော
န်းဂန်၊ မုလေဂီး၊ ပန်လယ်န စမ်းရေလေဟာ ဖန်ဆင်းရှင်
ဟို့ ကိုးကွယ်ဂေပါ” ဆိုဘီး ရရာတိုင်းကုလယ်ဟူသံန
ကြွေးကြော်လေဟယ်။

⁸ အယ်ဘီးန ဒုတိယကောန်းဂန်တမန်ဟာ လိုက်လာဘီး
“တရားဘဲဟူမေထုန် မှားယွင်းဟူကြောန့် ရရာတိုင်း ပြင်း
ထန်ဟူ ဒေါသစပျစ်ဝိုင်ဟို့ လူမျိုးဂူလောင်းဟို့ တိုက်ဟူ
ဗာဗုလုန်မြို့ဂီးဟာ ပြိုကုလဟူးဘိ၊ ပြိုကုလဟူးဘိ!”
ဆိုဘီး ကြွေးကြော်လေဟယ်။

9 နှော-က်ထပ် တတိယ ကောင်းဂန်တမန်ဟာ သူးနှိ
နှော-က်ဟု လိုက်လာဘီး၊ “သားရဲန သူးနှိရဲ့ ရောက်ထု
ဟို့ ကိုးကွယ်ဘီး သူးနှိရဲ့ ဖူးမာဖြစ်စေ၊ လတ်မာဘဲဖြစ်စေ
သူးရဲ့ ဇိဟို့ ခံဟူသူလေဟာ

10 ဘုရားသခင်ရဲ့ မျစ်တော်ဖလားဟု ရရာတိုင်း ပြင်း
ထန်ဟူ မျစ်တော် စပျစ်ဝိုင်ဟို့ သော့-က်ရလေ့မယ်။ အယ်
သူလေဟာ သန်ရှင်းဟူ ကောင်းဂန်တမန်လေန သိုးသားဂ
န်းဟားရဲ့ ရှေ့မာ ကန်နရောဟားဟူ မီးထဲမာ ညှဉ်းဆဲရှင်း
ဟို့ ခံရလေ့မယ်။

11 သူးနှိ ညှဉ်းဆဲခံရရှင်းရဲ့ မီးခိုးဟာ ကမ္ဘာဆစ်ဆစ်
တတ်ဘီးနေဟယ်။ သားရဲန သူးရဲ့ ရောက်ထုဟို့ ကိုးကွယ်
ဘီး သူနာမယ်ရဲ့ ဇိဟို့ ခံယူဟူသူလေဟာ နေရောညဉ့်ရော
သတ်သာရဟို့ မူဟု” ဆိုဘီး သံကုလယ်ဂီးန ကြွေးကြော်
လေဟယ်။

12 အယ်နေရာမာ ဘုရားသခင်ရဲ့ ပညတ်တော်လေဟို့
ရော၊ ယေရှုဟို့ ယောင်ကြည်ရှင်းဟို့ရော၊ စောန့်ထီးဟူ
သန်ရှင်းသူလေရဲ့ သီးခံရှင်း ရှိဟယ်။

13 အယ်ဘီးန ကောင်းဂန်ဘောင်ဟုသံဟာ “ရေးဟား
လိုက်။ ခုဟုစဘီး သခင်ဘုရားရဲ့ မူဟို့ဆောက်ဘီး သေ
ဟားဟူ သူလေဟာ မင်္ဂလာရှိဟယ်။” ဆိုဘီး ပြောဇာဟို့
ငါကြားရဟယ်။ ဝိညာဉ်တော်ဟုလည်း “မှန်ဟယ်၊ သူးနှိ
ဟာ ဆင်းရဲပန်ဗန်းဘီး လောက်ဆောက်ရှင်းဟုနေဘီး နား
ယူရဟူခွဲမ့်ဟို့ ရဂေ့လေ့မယ်။ ဖြားဖြစ်ကြောနဲ့ဆိုဟာ

သူးနှိလောက်ဆောန်ဟူ ကျိုးလေဟာ သူးနှိနတူးဒု ပါလို
က်ဟားကြောန့် ဖြစ်ဟယ်” ဆိုဘီး မိန့်တော်မူလေဟယ်။

မုလေးဂီးမာ သီးနှံရီသီးရှင်း

14 နှော-က်တခါ ငါကေ့လိုက်ဟူခီမာ ဖုလူဟူမိုးတီရီ
ဘီး အယ်မိုးတီထတ်မာ ခေါင်းထတ်မာ ရွှေသရဖူဟို ဆော
န်းဘီး လတ်မာ ရရာတိုင်း ထတ်ဟူဇင်ဟို ကိုင်ဟားဟူ
လူသားနတူဟူ တယော့-က်ဟာ ထိုင်နေဟယ်။

15 အယ်ဘီးန တခြားကောန်းဂန်တမန် တပါးဟာ ဗိမာန်
တော်ထဲဟု ထွပ်လာဘီး မိုးတီထတ်မာ ထိုင်နေဟူသူဟို
“မုလေးဂီးထတ်မာ ရီရဟိုဇလေဟာ မုည့်ဟားဘီဖြစ်
ဟူကြောန့် ရီသီးဟိုတွပ် ခီကုလဟားဘီး ဖြစ်ဟူကြောန့်
ကိုယ်တော်ရဲ့ ဇင်ဟိုလွတ်ဘီး ရီသီးပါ” ဆိုဘီး ရရာတိုင်း
ကုလယ်ဟူသန် ကြွေးကြော်လေဟယ်။

16 အယ်ခီမာ မိုးတီထတ်မာ ထိုင်နေဟူသူဟာ သူးရဲ့ ဇ
င်ဟို မုလေးဂီးဟို သွမ်းလိုက်ဘီးဟာ မုလေးဂီးဟာ ရီသီးရှ
င်းဟို ခံရလေဟယ်။

17 အယ်ဘီးန တခြားကောန်းဂန်တမန် တပါးဟာ ကော
န်းဂန်မာရီဟူ ဗိမာန်တော်ထဲဟု ထွပ်လာဟယ်။ သူးမာ
လည်း ရရာတိုင်း ထတ်ဟူဇင် ပါဟယ်။

18 အယ်ဘီးန မီးဟိုအောက်စိုးဟူ တခြားကောန်းဂန်
တမန်တပါးဟာ ယဇ်ပလ္လင်ထဲဟု ထွပ်လာဘီး ရရာတိုင်း
ထတ်ဟူဇင်ပါဟူသူဟို “စပျစ်သီးလေ မုည့်ဟားဘီ ဖြစ်
ဟူကြောန့် နန့်ရဲ့ ရရာတိုင်း ထတ်ဟူဇင်ဟို လွတ်ဘီး မု

လေဂီးထတ်မာရှိဟူ စပျစ်ခိုင်လေဟို့ ရိုသီးလိုက်” ဆိုဘီး
ရရာတိုင်း ကုလယ်ဟူသံန ပြောလေဟယ်။

¹⁹ အယ်ကောန်းဂန်တမန်ဟူလည်း သူ့ရဲ့ဇင်ဟို့ မှလေဂီး
ထတ်မာ သွမ်းလိုက်ဘီး မှလေဂီးထတ်ဟု စပျစ်ပန်လေ
ဟို့ ရိုသီးဘီး ဘုရားသခင်ရဲ့ ရရာတိုင်းပြင်းဟူ ဒေါသနဆို
င်ဟူ၊ ရရာတိုင်းကီးဟူ စပျစ်သီးနယ်ဟူ တွမ်းထဲဟို့ လွန်း
ခလလိုက်ဟယ်။

²⁰ မြို့ပုလန်မာရှိဟူ စပျစ်သီးနယ်ဟူ တွမ်းမာ နန်းလို
က်ဟူ ခီမာ သွီးဟူ အယ်စပျစ်သီးနယ်ဟူ တွမ်းထဲဟု စီး
ထွပ်လာဘီး မြင်းရဲ့ ဇစ်ကြိုးထိမိဘီး ၁၈၄ မိုင်လော့-က်
ထိ ပုံန့်ဟူးလေဟယ်။

15

နော့-က်ဆောင်းဘေးဒန်လေ သယ်လာဟူ ကောန်ဂန်း
တမန်လေ

¹ အယ်ဘီးန ကောန်းဂန်မာ ရရာတိုင်း ကီးဘီး အံ့ဩ
ဇကောန်းဟူ တခြားနိမိတ်လတ်ခဏာဖြစ်ဟူ နော့-က်
ဆောင်းဘေးဒန် ခွန်နစ်မျိုးရှိဟူ ကောန်းဂန်တမန် ခွန်
နစ်ပါးဟို့ ငါမြင်ရဟယ်။ အယ်ဘေးဒန်လေ အားဖြင့်
ဘုရားသခင်ရဲ့ ရရာတိုင်း ပြင်းဟူ ဒေါသဟူ ပုလဲဇေ
င်လေ့မယ်။

² နော့-က်ထပ် မီးနရောဟူးဟူ ဖန်ပန်လယ်မျိုးဇဟို့
ရော၊ သားရဲတကောန်ဟူ သူ့ရဲ့ ရောက်ထုန သူ့နာမယ်ရဲ့

ကိန်းဂဏန်းဟို့ နိုင်ရဟူးဟူ သူလေဟာ ဘုရားသခင်ရဲ့
စောန်းလေဟို့ ကိုင်ဆောက်ဘီးဟာ အယ်ဖန်ပန်လယ်ထတ်
မာ ရပ်နေဂေဟူဇာဟို့ရော ငါမြင်ရဟယ်။

³ သူးနို့ဟာ ဘုရားသခင်ရဲ့ စေခံ မောရှေရဲ့ ချင်းန
သိုးသားဂန်းဟူးရဲ့ ချင်းဟို့ ဆိုဘီး

“အနန္တတဂိုးရှင်ဘုရားသခင်၊ ကိုယ်တော်လောက်ဟူ မှု
လေဟာ

ရရာတိုင်း ကီးမြတ်ဘီး အံ့ဩဘွယ် ကောန်းပါဟယ်။
လူမျိုးဘောင်းဇောင်လေ*ရဲ့ မန်းဂီး၊ ကိုယ်တော်ရဲ့ နည်း
လမ်းလေဟာ

ရရာတိုင်း မှန်ပါဟယ်။

⁴ အို၊ ဘုရားသခင်၊ ကိုယ်တော့်ဟို့ ကြော့-က်ဘီး ရှိသေဘဲ
န နာမတော်ဟို့ ချီးမွမ်းဘဲ ဖယ်သူဟု နေနိုင်ဟို့နူး။
ကိုယ်တော်တပါးဘဲ သန်ရှင်းစင်ကြယ်ပါဟယ်။

ကိုယ်တော်စီရင်ဟူ မှုလေဟာ တရားမျှတကြောင်းဟို့ ထန်
ရှားနေဟူကြောန်

လူမျိုးဂူလောင်းဟာ ရှေ့တော်ဟို့ လာဘီးဟာ ပျပ်ဝပ်
ကိုးကွယ် ဂေ့လေ့မယ်”

ဆိုဘီး ပြောနေဂေဟယ်။

⁵ အယ်ဘီးန ငါကေ့လိုက်ဟူ ခီမာ ကောန်းဂန်ဘောင်မာ
ရှိဟူ သတ်သေခံချစ် တဲတော်ရှိဟူ ဗိမာန်တော်ဟာ ဖွဲ့
ဘီးရှိနေဟယ်။

* 15:3 ၁၅-၃ လူမျိုးဘောင်းဇောင်လေ၊ တချို့ မူရင်းလတ်ရေးမူလေမာ
ခေတ်လေ၊ ဆိုဘီး ပါရှိဟယ်။

6 ဘေးဒန်ခွန်နစ်မျိုးဟို့ ယူဆောန်လာဟူ ကောန်းဂန် တမန်ခွန်နစ်ပါးဟာ အယ်ဗိမာန်တော်ထဲဟု ထွပ်လာဂေ့ ဟယ်။ သူးနို့ဟာ စင်ကြယ်တော့-က်ပဟူ ပိချောဟို့ ဝတ် ဟားဘီး ရင်ဖတ်မာ ရွေရင်စည်းဟို့ စည်းဟားဟယ်။

7 အယ်ဘီးန သတ္တဝါလေးပါးထဲဟု တပါးဟာ ကမ္ဘာ ဆစ်ဆစ် သတ်ရှင်ဟူ ဘုရားသခင်ရဲ့ ရရာတိုင်း ပြင်းဟူ ဒေါသန ပုလဲနေဟူ ရွေဖလား ခွန်နစ်လောင်းဟို့ အယ် ကောန်းဂန်တမန်လေဟို့ ပေးလေဟယ်။

8 ဗိမာန်တော်ဟာ ဘုရားသခင်ရဲ့ ဖောင်းသရေတော်န တဂိုးတော်လေဟုနေ ထွပ်လာဟူ မီးခိုးလေန ပုလဲနေဟူ ကြောန့် ကောန်းဂန်တမန် ခွန်နစ်ပါးဟာ ဘေးဒန်ခွန်နစ်မျိုး မပီးမရှင်း ဖယ်သူလည်း ဗိမာန်တော်ထဲဟို့ ဝမ်နိုင်ဂေ့ဟု။

16

ပထမမျှစ်တော်ဖလား

1 အယ်ဘီးန ဗိမာန်တော်ထဲဟု ရရာတိုင်း ကုလယ်ဟူသံ ဟု “သွားဂေ့ပါ။ ဘုရားသခင်ရဲ့ ရရာတိုင်း ပြင်းဟူ မျှစ် တော်ဖလား ခွန်နစ်လောင်းဟို့ မုလေဂီးထတ်ဟို့ လွန်းဒုလ လိုက်ပါ” ဆိုဘီး ကောန်းဂန်တမန် ခွန်နစ်ပါးဟို့ ပြောဇာ ဟို့ ငါကြားရဟယ်။

2 ပထမကောန်းဂန်တမန်ဟာ သွားဘီး သူရဲ့ ဖလားဟို့ မုလေဂီးထတ်ဟို့ လွန်းဒုလလိုက်ဟူ ဒီမာ သားရဲတကော န်ရဲ့ ဇိရိုဟူသူန သူရဲ့ ရောက်ထုဟို့ ကိုးကွယ်ဟူသူလေမာ ရရာတိုင်း ဆိုးဟူ အိုင်းနာလေ ပေါ့-က်လေဟယ်။

3 ဒုတိယကောန်းဂန်တမန်ဟာ သူ့ရဲ့ ဖလားဟို့ ပန်လယ် ထတ်ဟို့ လွန်းခလလိုက်ဟူ ခီမာ ရေဟာ သေဟားဟူလူ လေရဲ့ သွီးမျိုးဖြစ်ဘီး ပန်လယ်ထဲမာရှိဟူ သတ်ရှိဟူ လိ ဆန်ဂူလောင်း သေဂေဟယ်။

4 တတိယကောန်းဂန်တမန်ဟာ သူ့ရဲ့ ဖလားဟို့ မှလစ် လေန စမ်းရေလေထတ်ဟို့ လွန်းခလလိုက်ဟူ ခီမာ ရေ ဟာ သွီးဖြစ်ဟားလေဟယ်။

5 အယ်ခီမာ ရေနဆိုင်ဟူ ကောန်းဂန်တမန်ဟ “ခရို ဘီး ရင်ဟုလည်းရှိဟူ သန်ရှင်းဟူ သခင်၊ အယ်ဇာလေ ဟို့ ကိုယ်တော်စီရင်ဟူကြောန့် ကိုယ်တော်ဟာ ပြောန့်မတ် ပါဟယ်။

6 ပြားဖြစ်ကြောန့်နူးဆိုဟာ အယ်သူလေဟာ သန်ရှင်း သူလေန ပရောဖက်လေရဲ့ သွီးဟို့ လွန်းဟားဂေဟူကြော န့် ကိုယ်တော်ဟာ အယ်သွီးလေဟို့ သူးနို့ဟို့ သော့-က်ဟို့ တွပ် ပေးတော်မူဟယ်။ သူးနို့ဟာ အယ်မျိုးခံဟို့တွပ် ထိုက် တန်ဟယ်” ဆိုဘီး ပြောဇာဟို့ ငါကြားရဟယ်။

7 အယ်ဘီးန ယဇ်ပလုလင်ဟုလည်း “မှန်ပါဟယ်။ အနန္တ တဂိုးန ပုလဲဇောင်ဟူ ဘုရားသခင်၊ ကိုယ်တော်ရဲ့ စီရင် ရှင်းလေဟာ မှန်ကန်ဘီး တရားမျှတပါဟယ်” ဆိုဘီး ပြော ဟူဇာဟို့ ငါကြားရဟယ်။

8 စတုတ္ထကောန်းဂန်တမန်ဟာ သူ့ရဲ့ ဖလားဟို့ နေထတ် ဟို့ လွန်းခလလိုက်ဟူ ခီမာ နေဟာ လူလေဟို့ မီးနလောင်း ရဟူ ခွမ်ဟို့ရဟယ်။

၉ လူလေဟာ ရရာတိုင်းပြင်းဟူ ပူရှိကြောန့် နေလော
နိဒန်ဟို့ ခံရဘီး အယ်ဘေးဒန်လေမာ ခွမ်အာဏာရှိဟူ
ဘုရားသခင်ရဲ့ နာမတော်ဟို့ ကီဆဲဘီး နောန်ဒလည်းရဂေ
ဟူ။ ဘုရားသခင်ရဲ့ ဖောင်းသရေတော်ဟို့လည်း ချီးမွမ်း
ဂေဟူ။

၁၀ ပဉ္စမကောန်းဂန်တမန်ဟာ သူရဲ့ ဖလားဟို့ သားရဲရဲ့
ပလ္လင်ထတ်ဟို့ လွန်းခလလိုက်ဟူ ခီမာ သားရဲရဲ့ နိုင်ငံဟာ
မှောန်မိုက်ဟားဘီး လူလေဟာ နာကျင်ဟူဝေဒနာကြောန့်
သူးနို့ရဲ့ လျာလေဟို့ ကိုက်ဂေဟယ်။

၁၁ လူလေဟာ သူးနို့ခံရဟူ နာကျင်ဟူဝေဒနာန သူးနို့ရဲ့
အိုင်းနာလေကြောန့် ကောန်းဂန်ဘောင်ရဲ့ ဘုရားသခင်ဟို့
ကီဆဲဂေဘီး သူးနို့ လောက်ဟူမူလေတွပ် နောန်ဒရဂေဟူ။

၁၂ ဆဋ္ဌမကောန်းဂန်တမန်ဟာ သူရဲ့ ဖလားဟို့ ရရာတိုင်း
ကီးဟူ ဥဖရတ်မလစ်ထတ်ဟို့ လွန်းခလလိုက်ဟူ ခီမာ ရှေ့
ပြည်ဟု မန်းဂီးလေတွပ် လမ်းဟို့ ပြင်ဆင်ပေးဟို့တွပ် မှ
လစ်ရေဟာ ခန်းဟားလေဟယ်။

၁၃ အယ်ဘီးန နဂါးဇပ်ပေါ့-က်ထဲဟုရော၊ သားရဲတ
ကောန်ရဲ့ ဇပ်ပေါ့-က်ထဲဟုရော၊ ပရောဖက်တုယောန် ဇ
ပ်ပေါ့-က်ထဲဟုရော၊ ဖားနတူဘီး ညစ်ညူးဟူ ဝိညာဉ်
သောင်းပါး ထွပ်လာဇာဟို့ ငါမြင်ရဟယ်။

၁၄ အယ်ဝိညာဉ်လေဟာ နိမိတ်လတ်ခဏာလေ လော
က်ဟူ နတ်ဆိုးလေရဲ့ ဝိညာဉ်လေ ဖြစ်ဂေဟယ်။ အယ်
ဝိညာဉ်လေဟာ ကမ္ဘာမရှိဟူ မန်းဂီးလေဟို့ အနန္တတိုင်းန

ပုလဲဇောင်ဟူ ဘုရားသခင်ရဲ့ နေ့ရစ်ဂီးမာ စစ်ပွဲတွင် စုဝေး
ဟို့ အယ်မန်းဂီးလေနားဟို့ ထွပ်ဟူးဂေဟယ်။

15 “ကေ့ကေ့။ ငါဟာ ခိုးလာဟူမျိုး လာမယ်။ ခလေးဗု
လန်းဗုလန်း သွားနေဘီး ကိုယ့်ရဲ့ယှစ်ဟို့ လူလေမြင်ရဘဲ
နေအောက် ကိုယ့်ရဲ့ဝတ်ဟို့ ထီးသီးဘီး ဒိန်စောန်နေဟူသူ
ဟာ မင်္ဂလာရှိဟယ်!”

16 အယ်ဘီးန ဝိညာဉ်လေဟာ မန်းဂီးလေဟို့ ဟေဗြဲ
စကားန အာမဂေဒန်ခေါ်ဟူ နေရာမာ စုဝေးဂေလေ့မယ်။

17 သတ္တမ ကောန်းဂန်တမန်ဟာ သူ့ရဲ့ ဖလားဟို့
အာကာသထဲဟို့ လွန်းခဲ့လလိုက်ဟူ ခီမာ ဗိမာန်တော်ထဲ
မာရှိဟူ ပလ္လင်ထဲဟု ရရာတိုင်း ကုလယ်ဟူသံဟု ပေါ်လာ
ဘီး “မှုပီးဟူးဘီ” ဆိုဘီး ပြောဟယ်။

18 အယ်ခီမာ လန့်စီးလတ်ရှင်း၊ သံမြယ်ရှင်းန မိုး
ချောက်ရှင်းလေ ဖြစ်လာဘီး ငလျင်လေလည်း ရရာတိုင်း
ပြင်းထန်ဘီး လှောက်လေဟယ်။ မုလေဂီးထတ်မာ လူဖြစ်
လာဟူ ခီဟုစဘီး အယ်မျှလော့-က်ကီးဘီး ရာရာတိုင်း
ပြင်းထန်ဟူ ငလျင်မျိုးဖြစ်ဖူးဟု။

19 မြို့ဂီးလေဟာ သောင်းပိုင်းကွဲဟူးဘီး လူဘောန်း
ဇောင်နေဟူ တိုင်းနိုင်ငံလေရဲ့ မြို့လေဟာလည်း ပြိုဟူး
ဂေဟယ်။ ဘုရားသခင်ဟာ သူ့ရဲ့ မျစ်တော်နဆိုင်ဟူ ပြင်း
ထန်ဟူ ဒေါသ စပျစ်ဝိုင်ခွပ်ဟို့ပေးဘီး ဗာဗုလုန်မြို့ဂီးဟို့
ဒီရစေဟယ်။

20 ကျွန်းရှိမျှဟာ ပျော့-က်ဟူးဘီး တောန်လေလည်း တွဲရဂေဟုမ်း။

21 ကောန်းဂန်ဟုလည်း ပေါန်တရာလော့-က်လေးဟူ မိုးသီးလေဟာ လူလေထတ်ဟို့ ကုလလေဟယ်။ အယ် ဘေးဒန်ဟာ ရရာတိုင်း ပြင်းထန်ဟူကြောန် လူလေဟာ အယ်မိုးသီးဘေးဒန်ကြောန် ဘုရားသခင်ဟို့ ကံဆဲဂေဟယ်။

17

ကောန်းဘဲဟူမီးမဂီးန သားရဲကြောန်း

1 အယ်ဘီးန ဖလားခွန်နစ်လောင်းရှိဟူ ကောန်းဂန်တမန် ခွန်နစ်ပါးထဲဟု တပါးဟာလာဘီး၊ ငါနစကားပြောဘီး “လာပါ၊ ရရာတိုင်းများဟူ ရေထတ်မာထိုင်ဟူ ကောန်း ဘဲဟူမီးမဂီး ခံရမယ့် တရားစီရင်ရှင်းဟို့ နန့်ဟို့ ငါပြမယ်။

2 မလေဂီးရဲ့ မန်းဂီးလေဟာ သူနတူးဒူ တရားဘဲဟူ မေ ထုန်ဟို့ လောက်ဂေဘီး မလေဂီးထတ်မာ နေဂေဟူသူလေ လည်း သူန တရားဘဲဟူ မေထုန်ဟို့ လောက်ဟူ စပျစ်ဝိုင် န မောဂေဟယ်” ဆိုဘီး ပြောဟယ်။

3 ငါ့ဟို့ ဝိညာဉ်တော်အားဖြင့် တောကန္တာရထဲဟို့ ခေါ် ဆောန်ဟူးလေဟယ်။ အယ်ခီမာ ခေါင်းခွန်နစ်လောင်းန ချိုဆယ်ရှောန်းရှိဘီး ဘုရားသခင်ဟို့ စော်ကားဟူ နာမယ် န ပုလဲနေဘီး နီနေဟူ သားရဲ တကောန်ထတ်မာ ထိုင်နေ ဟူ မီးမ တယော့-က်ဟို့ ငါမြင်ရဟယ်။

4 အယ်မီးမဟာ နီရောန်န ခရမ်းရောန်ဟို့ ဝတ်ဟူးဘီး
ရွှေတန်ဆာ၊ ကုလော-က်မြတ်ရတနာန ပုလဲတန်ဆာလေ
ဟို့ ဆင်ဟူးဘီး သူရဲလတ်မာ ရွံဇာကောန်းဟူ ဇာလေန
တရားဘဲဟူ မေထုန်လောက်ဘီး ညစ်ညူးရှင်းလေန ပုလဲ
နေဟူ ရွှေခွပ်ဟို့ ကိုင်ဟူးဟယ်။

5 သူရဲ ဖူးထတ်မာ ရေးဟူးဟူ လျှို့ဝှက်နတ်နဲဟူ နာမ
ဟာ၊

“ဗာဗုလုန်မြို့ဂီး
ကောန်းဘဲဟူ မီးမလေန
မှလေဂီးထတ်မာ ရွံဇာကောန်းဟူ ဇာလေနဲ့ မိ”
ဆိုဘီး ဖြစ်ဟယ်။

6 အယ်မီးမဟာ သန်ရှင်းဟူ သူလေရဲ့ သွီးန၊ ယေရှုရဲ့
သတ်သေခံလေရဲ့ သွီးန ယစ်မောနေဇာဟို့ ငါမြင်ရဟယ်။
ငါဟာ သူဟို့ မြင်ရဟူ ခီမာ ရရာတိုင်း အံ့ဩဟူးဟယ်။

7 အယ်ခီမာ ကောန်းဂန်တမန်ဟု “နန်ဟာ ဖြားဖြစ်ကြော
န့် အံ့ဩနူး” အယ်မီးမန သူဟို့ သယ်ဆောန်ဟူ ခေါင်း
ခွန်နစ်လောင်းန ချိုဆယ်ရှောန်းရှိဟူ သားရဲတကောန်ရဲ့
လျှို့ဝှက်နတ်နဲချစ်ဟို့ နန်ဟို့ ငါပြောပြမယ်။

8 နန်မြင်ရဟူ သားရဲ တကောန်ဟာ ရင်ဟူရှိဘီး ခုမွေဘဲ
ဟူ ကြာခန်မာ နတ်ဆောင်းတွမ်းထဲဟု တတ်လာဘီး ဖျစ်
ဆီးရှင်းဟို့ ခံရလေ့မယ်။ မှလေဂီးထတ်မာ နေဂေဟူ သူ
လေထဲမာ ကမ္ဘာတည်ဟူ ခီဟုစဘီး သတ်စာစောန်မာ နာ
မယ် စာရင်းဝမ်ဘဲဟူ သူလေဟာ ရင်ဟူရှိဘီး ခုမွေဘဲဟူ

ကြာခန်မာ ရော့-က်လာဟို့ အယ်သားရဲဟို့ မြင်ဘီးဟာ အံ့
သြဂေ့လေ့မယ်။

9 အယ်နေရာမာ ဉာဏ်ပညာန သိတရားရှိဟို့တွပ် လို
အပ်ဟယ်။ ခေါင်းခွန်နစ်လောင်းဟာ အယ်မီးမထိုင်နေဟူ
တောန်ခွန်နစ်လောင်းဖြစ်ဘီး မန်းဂီးခွန်နစ်ပါးလည်း ဖြစ်
ဟယ်။

10 ငါးပါးဟာ ကုလဆောင်းဟားဘီး။ တပါးဟာ ခုရှိ
ဟယ်။ ကျန်ဟူတပါးဟာ ပေါ်သေးဟူ။ ပေါ်လာဟူ ခီမာ
လည်း ရှစ်ဟားဘဲ ခံလေ့မယ်။

11 ရင်ဟူရှိဘီး ခုမွေဘဲဟူ သားရဲတကောန်ဟာ အဋ္ဌမ မ
န်းဂီးဖြစ်ဟယ်။ သူဟာ အယ်ခွန်နစ်ပါးထဲမာ တပါးလည်း
ဖြစ်ဘီး ဖျစ်ဆီးရှင်းဟို့ ခံရလေ့မယ်။

12 “နန်မြင်ရဟူ ချိုဆယ်ရှောန်းဟာ တိုင်းနိုင်ငံဟို့ ရ
သေးဘဲဟူ မန်းဂီးဆယ်ပါး ဖြစ်ဂေ့ဟယ်။ အယ်ဘေမဲ့
သူးနို့ဟာ သားရဲ တကောန်နတူဒူး မန်းဂီးလေမျိုး ခွမ်အာ
ဏာဟို့ ရရာတိုင်း တိုဟူ ခီကာလတခုမာ အောက်စိုးရဂေ့
လေ့မယ်။

13 အယ်မန်းဂီးလေဟာ တလောင်းတဝဒဲ ရှိဂေ့ဘီး သူး
နို့လေရဲ့ တဂိုးလေဟို့ သားရဲဟို့ အပ်ဂေ့လေ့မယ်။

14 သူးနို့ဟာ သိုးသားဂန်းဟားန စစ်တိုက်ဂေ့လေ့မယ်။
အယ်ဘေမဲ့ သိုးသားဂန်းဟားဟာ သူးနို့ဟို့ နိုင်ရလေ့မယ်။
ဖြားဖြစ်ကြောနဲ့နူးဆိုဟာ ကိုယ်တော်ဟာ သခင်လေရဲ့
သခင်၊ မန်းဂီးလေရဲ့ မန်းဂီး ဖြစ်တော်မူဟယ်။ ကိုယ်တော်

န တူဒူးရှိနေဟူ သူလေဟုလည်း ကိုယ်တော်ခေါ်ယူဘီး ဝီး
ကော့-က်ခဲရဟူ သူလေန သစ်စာရှိဟူ သူလေဖြစ်ဂေဟု
ယ်” ဆိုဘီး ပြောဟယ်။

¹⁵ အယ်ဘီးန အယ်ကောန်းဂန်တမန်ဟာ နန်မြင်ရ
ဟူ ကောန်းဘဲဟူမီးမ ထိုင်နေဟူရေဟာ တိုင်းနိုင်ငံလေ၊
ဘာသာစကားဘောန်းဇောင် ပြောဂေဟူ လူမျိုးလေန
ပြည်သူပြည်သားလေ ဖြစ်ဂေဟယ်။

¹⁶ နန်မြင်ရဟူ ချိုဆယ်ရှောန်းန သားရဲလေဟာ အယ်
ကောန်းဘဲဟူ မီးမဟို မူးဘီး၊ သူဟို ပျစ်စီးစေဘီး သူရဲ
ဝတ်ဟို ခလွတ်ပစ်ဂေဘီး သူရဲ သားဟို ကိုက်စားဘီး သူ
ဟို မီးရှို့ဂေလေမယ်။

¹⁷ ဖြားဖြစ်ကြောန့်နူးဆိုဟာ ဘုရားသခင်ဟာ သူရဲ
စကားတော်ဟာ ပုလဲဇောင်ရှင်းဟို ရှော့-က်ဟိုထိ သူး
နို့ဟာ တလောင်းတဝဒဲ ဖြစ်ဘီး သူးနို့ရဲ နိုင်ငံလေဟို
သားရဲတကောန်ရဲ လတ်ထဲဟို အပ်လိုက်ရှင်းအားဖြင့်
ဘုရားသခင်ရဲ ကြံစည်တိုင်း သူးနို့ရဲ စိန်လောင်းထဲဟို
ထဲသွမ်းလိုက်ဟယ်။

¹⁸ “နန်မြင်ရဟူ မီးမဟာ ကမ္ဘာလောကရဲ မန်းဂီးလေဟို
အောက်စိုးဟူမြို့ဂီး ဖြစ်ဟယ်” ဆိုဘီး ငါဟို ပြောဟယ်။

18

ဗာဗုလုန်မြို့ ပြိုကုလဟူကြောန်း

¹ အယ်ဘီးန ရရာတိုင်း ကီးဟူ ခွမ့်အာဏာန ကောန်းဂ
န်ဟု ဆင်းလာဟူ တခြား ကောန်းဂန်တမန်တပါးဟို ငါမြ

င်ရဟယ်။ မှလေးဂီးဟာ သူ့ရဲ့ ဖောင်းသရေတော်ကြောင့်
လန်းဘီးတော့-က်ပလေဟယ်။

² သူဟာ ရရာတိုင်း ကုလယ်ဟူသံန ကြွေးကြော်ဘီး
“ဗာဗုလုန်မြို့ဂီးဟာ ပြိုကုလဟားဘီး! ပြိုကုလဟားဘီး!
အယ်မြို့ဟာ နတ်ဆိုးနေဟူ နေရာ၊ ညစ်ညူးဟူနတ်လေ
နေဟူနေရာ၊ ညစ်ညူးဟူ ငှက်ဘောင်းဇောင် မှီခိုဟူနေရာ
န ညစ်ညူးဘီး ရှံဇာကောင်းဟူ လိဆန်လေဂူလောင်း မှီခို
ဟူနေရာ ဖြစ်ဟားဘီး။

³ ဖြားဖြစ်ကြောင့်နူးဆိုဟာ လူမျိုးဂူလောင်းဟာ သူ့
ရဲ့ တရားဘဲဟူ မေထုန်နုဆိုင်ဟူ ဒေါသ စပျစ်ဝိုင်ဟို့
သော့-က်ဂေဘီး မှလေးဂီးရဲ့ မန်းဂီးလေဟာ သူ့နတူးဒူ
တရားဘဲဟူ မေထုန်လောက်ဂေဘီး ကမ္ဘာ့ကုသယ်လေ
ဟာ သူ့ရဲ့ လွန်ကျူးဟူ ဇိမ်ခံရှင်း ရှိဝါကြောင့် ကြွယ်ဝလာ
ဂေဟယ်” ဆိုဘီး ပြောဟယ်။

⁴ အယ်ဘီးန ကောင်းဂန်ဘောင်ဟာ တခြားသံတခုဟို့ ငါ
ကြားရဟယ်။ အယ်သံဟ

“ထွပ်လာဂေ။ ငါ့ရဲ့ လူစုလေ၊ သူနားဟုနေ ထွပ်လာဂေပါ။

သူ့ရဲ့ ပြစ်လေထဲဟို့ ဆစ်ဆံဘီး ပါဝမ်ဂေန။

သူ့နတူးဒူ ပြစ်ဒန်ဟို့ ခံဂေန။

⁵ ဖြားဖြစ်ကြောင့်နူးဆိုဟာ သူ့ရဲ့ ပြစ်လေဟာ ကောင်းဂန်
ဘောင်ထိ ရော့-က်ဘီး

သူ့ရဲ့ တရားဘဲဟူမူလေဟာ ဘုရားသခင်ဟို့ ဒီရစေ
ဟူကြောနဲ့ ဖြစ်ဟယ်။

⁶ သူပေးဟွားတိုင်း သူဟို့ ပုလန်ပေးဂေပါ။

သူလောက်ဟွားဇာလေဟို့ နှေ့ဆတိုးဘီး ပုလန်ပေး
ဂေပါ။

သူရောစပ်ဟွားဟူ ခွပ်မာ

သူ့တွပ်နှေ့ဆ ရောစပ်ပေးဂေပါ။

⁷ သူဟာ ကိုယ့်ကိုယ်ကိုယ် ချီးမြှောက်ဘီး စည်းဇိမ်ခံစား
ဟွားမျှ

သူဟို့ ညဉ်းဆဲရှင်းန ဝန်းနဲကြကွဲရှင်းလေဟို့ ပေးဂေ
ပါ။

ဖြားဖြစ်ကြောနဲ့နဲ့ဆိုဟာ ငါဟာ မိဖုရားဖြစ်ဟယ်။ မောက်
ဆိုးမ မူဟာ။

ငါဟာ ဝန်းနဲကြကွဲရှင်းလေဟို့ ဖယ်ခါလည်း တွံ
ကြောင်ရဟို့ မူဟု ဆိုဘီး

သူ့စိတ်မာ ပြောဟူကြောနဲ့ဖြစ်ဟယ်။

⁸ အယ်ကြောန်းကြောနဲ့ ရောဂါဘေး၊ ဝန်းနဲကြကွဲဟူ
ဘေး၊

စာရေဇာ ရရာတိုင်း ခေါန်းပါးဟူဘေးလေဟာ

သူ့ရဲ့ထတ်မာ တရစ်ဒဲ ရှေ့-က်လာလေ့မယ်။

သူဟာ မီးရှို့ရှင်းဟို့လည်း ခံရလေ့မယ်။

ဖြားဖြစ်ကြောနဲ့နဲ့ဆိုဟာ သူဟို့

တရားစီရင်ဟူ ဘုရားသခင်ဟာ

တဂိုးကီးဟူကြောနဲ့ ဖြစ်ဟယ်” ဆိုဘီး ပြောဟယ်။

9 သူ့နတူးဒု တရားဘဲဟူမေထုန် လောက်ဂေဘီး စည်း
 ဖိမ်ခံစားဂေဟူ မလေဂီးရဲ့ မန်းဂီးလေဟာ သူ့ဟို လောန်
 နေဟူမီးခိုးဟို မြင်ဂေဟူ ခီမာ သူ့တွပ် ရရာတိုင်း ငိုဂေဟု
 ယ်။

10 အယ်လူလေဟာ သူခံရဟူညှဉ်းဆဲရှင်းဟို ကြော့-က်
 ဂေဟူကြော့နဲ့ ဝီးဟုရပ်ဘီး “ရရာတိုင်း ကီးဟူမြို့၊ အား
 ကီးဟူ ဗာဗုလုန်မြို့၊ နန်ဟာ ဖြစ်မှဖြစ်ရလေ၊ ဖြစ်မှဖြစ်
 ရလေ၊ ဖြားဖြစ်ကြော့နဲ့ဆိုဟာ နန်ခံရဟူ တရားစီရင်ရှ
 င်းဟာ ရရာတိုင်း တိုဟူ ခီတခုမာ ပြစ်ဒန်စီရင်ရှင်းဟို ခံရ
 လေဘီ!” ဆိုဘီး ပြောဂေဟယ်။

11 မလေဂီးထတ်မာရှိဟူ ကူသယ်လေဟုလည်း သူ့ရဲ့
 ကူပစ်စီးလေဟို ဝယ်ဟိုသူ ယော့-က်လည်း မှော့ဘဲဟူ
 ကြော့နဲ့ သူ့တွပ် ဝန်းနဲကြေကွဲဘီး ငိုဂေဟယ်။

12 သူးနို့လေရဲ့ ကူပစ်စီးလေဟာ ရွှေ၊ ငွေ၊ ကုလော့-က်
 မြတ်ရတနာ၊ ပုလဲ၊ ပိ ချော၊ ခရမ်းရော န်ဝတ် ထည်၊
 ပိုးထည်၊ နီဟူထည်၊ သစ်မွီးဘောင်းဇောင်၊ ဆင်စွယ်ပစ်စီး
 ဘောင်းဇောင်၊ ဖိုးကီးဟူသစ်သား၊ ကြေးသံ၊ ကုလော့-က်
 ဖုလူလေန လောက်ဟားဟူ ပစ်စီးဘောင်းဇောင်၊

13 သစ်ကြံပိုး၊ ဟမ်းရှစ်ဟူမွီးကြိုငါ၊ နံ့သာပေါင်း၊ ဆီ
 မွီး၊ လောဗန်၊ စပျစ်ပိုင်၊ ဆီ၊ မုညစ်၊ ဂျောင်ဆန်၊ ကွဲနွား
 လိဆန်၊ သိုး၊ မြင်း၊ မြင်းရထား၊ လူကိုယ်ခန္ဓာန လူလေရဲ့
 သတ်လေဘဲ ဖြစ်ဂေဟယ်။

14 ကူသယ်လေဟု “နန်းနို့ရဲ့ စိန်လောင်းတတ်မတ်ဟူ ရ

ရာတိုင်း ကောန်းဟူ သစ်သီးလေလည်း ပျော့-က်ဟူးဘီ။
စည်းဇိမ် ဂေါင်သရေလေလည်း ပျော့-က်ဟူးဘီ။ အယ်
ဇာလေဟာ ဖယ်ခါလည်းရဟို့ မှဘီ” ဆိုဘီး ပြောဟယ်။

15 သူ့အားဖြင့် ကြွယ်ဝလာဂေဘီး အယ်ကူပစ်စီးလေဟို့
ပိုင်ဂေဟူ သူလေဟာ သူခံရဟူ ညဉ်းဆဲရှင်းဟို့ ကြော့-က်
ဂေဟူကြော့နဲ့ ဝီးဟုရပ်ဘီးဟာ ငိုဘီး၊ ရရာတိုင်း ဝန်းနဲဘီး

16 “ပိချော၊ ခရမ်းရောန်ထည်န နီရောန်ထည်ဟို့ ဝတ်
ဟူးဘီး ရွှေတန်ဆာ၊ ကုလော့-က်မြတ်ရတနာန ပုလဲလေ
ဟို့ ဆင်ဟူးဟူမြို့ဂီး၊ နန်ဟာ ဖြစ်မှဖြစ်ရလေ၊ ဖြစ်မှဖြစ်
ရလေ!

17 ဖြားဖြစ်ကြော့နဲ့ဆိုဟာ အယ်မျှလော့-က် များဟူ
စည်းဇိမ်ဟာ တနာရီထဲမာ လောင်းဝ ဖျစ်ဆီးရှင်းဟို့ ခံ
ရဟယ်” ဆိုဘီး ပြောလေ့မယ်။ ရေယာဉ်မှူးန ခရီးသယ်
လေဂူလောင်း၊ သန်းဖောသားလေန ရေလမ်းမာ ကူသယ်
လောက်နေဂေဟူ လူလေ ဂူလောင်းဟာ ဝီးဟုရပ်ဘီး

18 သူ့ဟို့ လောန်နေဟူမီးဟု မီးခိုးလေဟို့ မြင်ဘီး “ဖယ်
ခါဒူးဟုလည်း အယ်မြို့ထတ် ခမ်းနားဟူမြို့ ရှိဖူးဟု!” ဆို
ဘီး အော်ပြောဂေဟယ်။

19 သူးနို့ဟာ မုလေမုဟို့ သူးနို့ခေါင်းထတ်ဟို့ ပစ်တန်
ဘီး၊ ဝန်းနဲကြော့ကွဲဘီး၊ ငိုဂေဘီးဟာ “သူးနို့ရဲ့ ဖိုးတန်ဟူ
ပစ်စီးလေကြော့နဲ့ ပန်လယ်ထဲမာရှိဟူ သန်းဖောလေဟို့ ပို
င်ဂေဟူသူ ရှိမျှဟို့ ကြွယ်ဝစေဟူ ရရာတိုင်း ကီးဟူမြို့၊ န
န်ဟာ တနာရီထဲမာဘဲ လောင်းဝ ဖျစ်ဆီးရှင်းဟို့ ခံရဟူ

ကြောန့် ဖြစ်မှဖြစ်ရလေ! ဖြစ်မှဖြစ်ရလေ!” ဆိုဘီး အော်ဘီးပြောဂေဟယ်။

20 ကောန်းဂန်ဘောင်ဟုစဘီး သန်ရှင်းဟူသူလေ၊ တမန်တော်လေန ပရောဖက်လေ၊ အယ်မြို့ရဲ့ ဖြစ်ပျစ်ကြောန့် ဝန်းသာဂေပါ။ ဖြားဖြစ်ကြောန့်နဲ့ဆိုဟာ ဘုရားသခင်ဟာ နန်းနို့ ဖတ်မာနေဘီး အယ်မြို့ထတ်ဟို့ ပြစ်ဒန်စီရင်ရှင်းဟို့ ရော့-က်စေဟယ် ဆိုဘီး ပြောဇာဟို့ ငါကြားရဟယ်။

21 အယ်ဘီးန ခွန်အားကီးဟူ ကောန်းဂန်တမန်တပါးဟာ ရရာတိုင်း ကီးဟူ ကုလိဆောင်မျိုး ကုလော့-က်တောင်းတတောင်းဟို့ ခီဘီးဟာ ပန်လယ်ထဲဟို့ ခုလဘီး “ဗာဗုလုန်မြို့ဂီးဟာ အယ်မျိုးဘဲ ပစ်ခုလရှင်းဟို့ ခံရဘီး လောင်းဝ တွံရဟို့ မှဘီ။

22 စောန်းသမား၊ ဂီတသမား၊ ပလွေသမား၊ တံပိုးခရာမူမားလေရဲ့ တီးမှုသံဟို့ နန်းနို့ထဲမာ လောင်းဝ တွံရဟို့ မှဘီ။ ကုလိဆောင်သံဟို့လည်း လောင်းဝ ကြားရဟို့ မှဘီ။

23 ဆီမီးရဲ့ လန်းရောန်ဟို့လည်း နန်းနို့ထဲမာ လောင်းဝ လန်းဟို့ မှဘီ။ ဒို့သားန ဒို့သမီးလေရဲ့ သံဟို့လည်း နန်းနို့ထဲမာ လောင်းဝ ကြားရဟို့ မှဘီ။ ဖြားဖြစ်ကြောန့်နဲ့ဆိုဟာ နန်ရဲ့ ကူသယ်လေဟာ မုလေဂီးရဲ့ အာဏာကီးမားဟူ သူလေ ဖြစ်ဂေဟယ်။ လူမျိုးဂူလောင်းဟာ နန်းနို့ရဲ့ ပြုစားရှင်းန လှည့်ဇားဇာဟို့ ခံရဂေဟယ်” ဆိုဘီး ပြောလေဟယ်။

24 ပရောဖက်လေ၊ သန်ရှင်းဟူသူလေန မုလေဂီးထတ်

မာ သေသတ်ခံရဟူ လူလေ ဂူလောင်းရဲ့ သွီးလေဟို့လည်း
အယ်မြို့မာတို့ရဟယ်။

19

¹ အယ်ဘီးန ကောန်းဂန်မာရှိဟူ လူလေဘောင်ဂီးရဲ့ ရ
ရာတိုင်း ကုလယ်ဟူ သံမျိုး ငါကြားရဟယ်။ သူးနို့ဟ
“ဟာလေလုယာ! ကယ်တန်ရှင်း၊ ဖောင်းသရေတော်န တ
ဂိုးတော်လေဟာ နို့လေရဲ့ ဘုရားသခင်န ဆိုင်ဟယ်။

² ဖြားဖြစ်ကြောန့်နူးဆိုဟာ ကိုယ်တော်ရဲ့ တရားစီရင်
ရှင်းလေဟာ ဖြောန့်မတ်မှန်ကန်ဟယ်။ တရားဘဲဟူ
မေထုန် လောက်ရှင်းလေန မှလေးဂီးဟို့ ပျစ်စီးစေဟူ
ကောန်းဘဲဟူမီးမဟို့ ကိုယ်တော်ဟာ စီရင်ဘီး သူရဲ့ လတ်
မာမဲ့နေဟူ ကိုယ်တော်စေခံလေရဲ့ သွီးတွပ် ဒန်ခတ်လိုက်
ဟယ်” ဆိုဘီး ပြောဂေဟယ်။

³ အယ်ဘီးန သူးနို့လေဟာ “ဟာလေလုယာ! မီးခိုးဟာ
ကမ္ဘာဆစ်ဆစ် တတ်ဘီးရှိနေဟယ်” ဆိုဘီး ပြောဂေဟ
ယ်။

⁴ သတ်ကီးဝါဂီးလေ ၂၄ ပါးန သတ္တဝါလေးပါးဟုလည်း
ပျပ်ဝပ်ဘီးဟာ ပလ္လင်ထတ်မာ ထိုင်နေဟူ ဘုရားသခင်ဟို့
ကိုးကွယ်ဘီးဟာ “အာမင်! ဟာလေလုယာ!” ဆိုဘီး ပြော
ဂေဟယ်။

သိုးသားဂန်းဟားရဲ့ အီတတ်မဲ့

⁵ ပလ္လင်ထဲဟု ထွပ်လာဟူ သံဟုလည်း “ဘုရားသခင်ရဲ့
စေခံလေန ဘုရားသခင်ဟို့ ကြော့-က်ဂေဟူ လူဂီးလူငယ်

လေ ဂူလောင်းဟု နို့လေရဲ့ ဘုရားသခင်ဟို့ ချီးမွမ်းဂေ့ပါ”
ဆိုဘီး ပြောဟယ်။

⁶ အယ်ဘီးန လူဘောင်ဂီးရဲ့ သံလေနရော၊ ရေကဒန်ဟု
နေ ကုလဟူရေသန်ရော၊ ပြင်းထန်ဟူ မိုးကြိုးသန်ရော တူ
ဟူသံဟု “ဟာလေလုယာ! အနန္တတဂိုးန ပုလဲဇောင်ဟူ နို့
လေရဲ့ ဘုရားသခင်ဟု စိုးစံတော်မူဟယ်။

⁷ နို့လေဟု ဝန်းသာရွှင်လန်းဘီး ကိုယ်တော်ရဲ့ ဖောင်း
သရေတော်ဟို့ ချီးမွမ်းဂေ့ဇို့။ ဖြားဖြစ်ကြောနဲ့နဲ့ဆိုဟု
သိုးသားဂန်းဟားရဲ့ အီတတ်ဗွဲဟု ခီကုလလာဟူကြော
နဲ့ သူရဲ့ ဒို့သမီးဟု သူ့ကိုယ်သူ သင့်ပြင်ဆင်လေဘိ။

⁸ အယ်ဒို့သမီးဟု စင်ကြယ်တော့-က်ပဟူ ပိချောထည်
ဟို့ ဝတ်ဆင်ခွဲမ့်ရဟယ်။ အယ်ပိချောဟု သန်ရှင်းသူလေ
ရဲ့ ဖြောန့်မတ်ဟူကျင့် ဖြစ်ဟယ်” ဆိုဘီး ပြောဇာဟို့ ငါ
ကြားရဟယ်။

⁹ အယ်ဘီးန ကောန်းဂန်တမန်ဟု “သိုးသားဂန်းဟားရဲ့
အီတတ်ဗွဲဟို့ ဖိခေါ်ခဲရဟူ သူလေဟု မင်္ဂလာရှိဂေ့ဟယ်
ဆိုဘီး ရေးဟားပါ” ဆိုဘီး ငါ့ဟို့ ပြောဘီးဟု “အယ်ဇာ
ဟု ဘုရားသခင်ရဲ့ ဖြောန့်မတ်မှန်ကန်ဟူ စကားတော်ဖြ
စ်ဟယ်” ဆိုဘီး ပြောလေဟယ်။

¹⁰ အယ်ခီမာ ငါဟု အယ်ကောန်းဂန်တမန်ဟို့ ကိုးကွ
ယ်ဟို့တွပ် ပျပ်ဝပ်ဟူ ခီမာ သူဟု “အယ်မျိုးလောက်န။ ငါ
ဟု နန်ဟုနေစဘီး ယေရှုနဆိုင်ဟူ သတ်သေခံချစ်ဟို့ ရ

ဟူးဟူ နန်းနို့လေရဲ့ ညီကို၊ လောက်ဖော်ဆောန့်ဖတ် စေခံဘဲ ဖြစ်ဟုယ်။ ဘုရားသခင်ဟို့ဘဲ ကိုးကွယ်ပါ” ဆိုဘီး ပြောဟုယ်။

ဖြားဖြစ်ကြောန့်နူးဆိုဟာ ယေရုရှန်ဆိုင်ဟူ သတ်သေခံချစ်ဟာ ပရောဖက်ပြုဘီး ဟောပြောဟူဝိညာဉ် ဖြစ်ဟုယ်။

မြင်းဖုလူစီးဟူသူကြောန့်

¹¹ အယ်ဘီးန ငါကေ့လိုက်ဟူ ခီမာ ကောန်းဂန်ဟာ ပွမ့်နေဘီး မြင်းဖုလူတကောန့် ရှိဟုယ်။ မြင်းထတ်မာ ထိုင်နေဟူသူဟာ သစ်စာရှိဟူသူ၊ မှန်ကန်ဟူသူ ဆိုဘီး ခေါ်ရှင်းဟို့ခံရဟုယ်။ သူဟာ ဖြောန့်ဖြောန့်မတ်မတ်ဟူး တရားစီရင်ဘီး စစ်တိုက်လေဟုယ်။

¹² သူ့ရဲ့ မျစ်စိလေဟာ မီးလျှံမျိုးဖြစ်ဘီး သူ့ရဲ့ ခေါင်းထတ်မာ သရဖူလေ ဆောန်းဟူးဟုယ်။ သူ့မာရေးဟူးဟူ နာမတခုရှိဘီး အယ်ဇာဟို့ သူကိုယ်တိုင်ဘဲသိဘီး ဖယ်သူလည်းသိဟု။

¹³ သူဟာ သွီးန နှစ်ဟူးဟူဝတ်ဟို့ ဝတ်ဟူးဘီး သူ့ရဲ့ နာမယ်ဟာ ဘုရားသခင်ရဲ့ စကားတော် ဆိုဘီး ခေါ်ဟုယ်။

¹⁴ ကောန်းဂန် ဗိုလ်ခေလေဟာ စင်ကြယ်ဟူ ပိချောထည်ဟို့ ဝတ်ဟူးဂေ့ဘီး မြင်းဖုလူဟို့ စီးဘီးဟာ သူ့နော့-က်ဟို့ လိုက်ဂေ့ဟုယ်။

¹⁵ လူမျိုးဘောန်းဇောင်ဟို့ နှိမ်နင်းဟို့တွပ် ထတ်ဟူ သန်လျက်ဟာ သူ့ရဲ့ ဇပ်ပေါ့-က်ထဲဟု ထွပ်နေဟုယ်။ သူဟာ

အယ်သူလေဟို သံလှိုတံန အောက်စိုးလေ့မယ်။ သူဟာ အနန္တတဂိုးန ပုလဲဇောင်ဟူ ဘုရားသခင်ရဲ့ မျှစ်တော်န ဆိုင်ဘီး ပြင်းထန်ဟူ စပျစ်ဝိုင်န စပျစ်သီးနယ်ဟူ တွမ်းဟို တတ်နန်းလေ့မယ်။

16 သူ့ရဲ့ဝတ်န ပေါန်မာ မန်းဂီးလေရဲ့ မန်းဂီး၊ သခင်လေ ရဲ့ သခင် ဆိုဘီး ရေဟားဟူ ဘွဲ့နာမရှိဟယ်။

17 အယ်ဘီးန နေထဲမာရပ်နေဟူ ကောင်းဂန်တမန် တ ပါးဟို ငါမြင်ရဟယ်။ သူဟာ ကောင်းဂန်လယ်မာ ပုလဲဇောင် ဟူ ငှက်ဂူလောင်းဟို “ဘုရားသခင်ရဲ့ ညဉ့်ဇာစားဗွဲဟို လာ ဘီးစုဂေပါ။

18 မန်းဂီးလေရဲ့ သား၊ တပ်မှူးလေရဲ့ သား၊ စစ်သား လေရဲ့ သား၊ မြင်းန မြင်းစီးဟူ သူလေရဲ့ သား၊ လူလွတ်န ကျွန်လေဟုစား လူဂီးလူငယ်ရှိမျှလေရဲ့ သားဟို လာဘီး စားဂေပါ” ဆိုဘီး ရရာတိုင်းကုလယ်ဟူသံန ကြွေးကြော် ဂေဟယ်။

19 အယ်ခီမာ သားရဲတကောန်ဟုစား မုလေဂီးရဲ့ မန်း ဂီးလေန သူးနို့ရဲ့ ဗိုလ်ခေလေဟာ မြင်းစီးဟူသူန သူ့ရဲ့ ဗိုလ်ခေလေဟို စစ်တိုက်ဟို့တွပ် စုနေဇာဟို ငါမြင်ရဟယ်။

20 သားရဲန ပရောဖက် တုယောန်လေဟာ ဖမ်းခံရဟယ်။ အယ်ပရောဖက် တုယောန်ဟာ သားရဲရဲ့ရှေ့မာ နိမိတ် လတ်ခဏာလေဟို လောက်ဘီး၊ အယ်နိမိတ်လတ်ခဏာ

အားဖြင့် သားရဲရဲ့ ဇိဟို ယူဘီး သူရဲ ရောက်ထုဟို ကိုးကွယ်ဟူ သူလေဟို လှည့်ဇားဟူ သူဖြစ်ဟယ်။ သတ်ရှင်ဘီး ရှိနေဟူ အယ်သူ နေ့ယော့-က်လောင်းဟာ ကန်နရောဘီး လောန်နေဟူ မီးအိုင်ထဲဟို ရှင်လတ်လတ် ပစ်ခဲလရှင်းဟို ခံရဂေဟယ်။

²¹ ကျန်ရစ်ဟူ သူလေဟု မြင်းစီးဟူသူရဲ ဇပ်ပေါ့-က် ထဲဟုထွပ်ဟူ သန်လျက်န သတ်ပစ်ရှင်းဟို ခံရဘီး ငှတ်ဂူ လောင်းဟာ သူးနှိလေရဲ့ သားဟို မိုက်ဝအောန် စားရဂေဟယ်။

20

နှစ်တထောန်

¹ အယ်ဘီးန ကောန်းဂန်တမန်တပါးဟာ နတ်ဆောင်းတွမ်းရဲ့ သော့-က်န ရရာတိုင်း ကီးဟူ သံကြိုးလေဟို သူရဲလတ်မာ ကိုင်ဟူးဘီး ကောန်းဂန်ဘောင်ဟု ဆင်းလာဇာဟို ငါမြင်ရဟယ်။

² သူဟာ စာတန်မာရ်နတ်ဖြစ်ဟူ၊ ရှေးဗွီဟောင်းဖြစ်ဟူ နဂါးဟို ဖမ်းဘီး နှစ်တထောန်ခယ်ဟူးဟယ်။

³ နှစ်တထောန်ကူဟူခီထိ လူလေဟို နော့-က်ထပ် လှည့်ဇားနိုင်ဘဲနေအောန် သူဟို နတ်ဆောင်းတွမ်းထဲဟို ပစ်ခဲလဘီး၊ ပိဟူးလိုက်ဘီး ဇိနခတ်ဟူးလေဟယ်။ အယ်ခီကာလကူဘီးမှ သူဟို ရှစ်ဟူးလွတ်ပေးရဟယ်။

⁴ အယ်ဘီးန ပလ္လင်လေန အယ်ပလ္လင်ထတ်မာ ထိုင်နေဟူ သူလေဟို ငါမြင်ရဟယ်။ အယ်သူလေဟာ တရားစီ

ရင်ဟို့ ခွမ့်အာဏာဟို့ ရဂေဟယ်။ အယ်ဘီးဟာ ယေရှုန
ဆိုင်ဟူ သတ်သေခံချစ်တွပ်ရော၊ ဘုရားသခင်ရဲ့ စကား
တော်တွပ်ရော၊ ခေါန်းဖြတ်ခံရဟူ သူလေရဲ့ ဝိညာဉ်လေ
န သားရဲန သားရဲရဲ့ရောက်ထုဟို့ ကိုးကွယ်ဘဲ သူ့ရဲ့ဇိဟို့
ရော၊ သူးနို့လေရဲ့ ဖူးမာ အယ်မျိုးမူဘဲဟာ လတ်မာ ခံ
ဘဲဟူ သူလေဟို့ရော ငါမြင်ရဟယ်။ သူးနို့ဟာ သတ်ပု
လန်ရှင်ဘီး နှစ်တထောန်လောင်းလောင်း ခရစ်တော်နတူး
ဒူ အောက်စိုးရဂေဟယ်။

⁵ ရင်ဟူသေဟားဟူ သူလေဟာ နှစ်တထောန်ကူခန်ထိ
သတ်ရှင်ရဂေဟူ။ အယ်ဇာဟာ ပထမ ထမြော့-က်ရှင်း ဖြ
စ်ဟယ်။

⁶ ပထမ ထမြော့-က်ရှင်းမာ ပါဟူသူဟာ မင်္ဂလာရှိဟူ
သူ၊ သန်ရှင်းဟူသူ ဖြစ်ဟယ်။ ဒုတိယ သေရှင်းဟာ သူး
နို့လေထတ်မာ တဂိုးမွေဟွမ်း။ သူးနို့ဟာ ဘုရားသခင်န
ခရစ်တော်ရဲ့ ယဇ်ပုရောဟိတ်လေ ဖြစ်ဂေဘီး ခရစ်တော်
နတူးဒူ နှစ်တထောန် အောက်စိုးဂေလေ့မယ်။

စာတန် ရှောင်းဟားဟူကြောန်း

⁷ အယ်နှစ်တထောန် ကူဟားဟူ ခီမာ စာတန်ဟာ သူခ
ယ်ဟားခံရဟူ တွမ်းထဲဟုနေ လွတ်ပေးရှင်းဟို့ခံရဘီး

⁸ မုလေဂီးလေးမျစ်နှာမာရှိဟူ လူမျိုးလေဖြစ်ဂေဟူ
ဂေါဂ၊ မာဂေါဂဟို့ လှည်းဖြားဟို့တွပ်န စစ်ပွဲတွပ်၊ သူးနို့
ဟို့ စုဝီးဂေဟို့တွပ် ထွပ်ဟားလေ့မယ်။ သူးနို့လေဟာ ပန်
လယ်သဲလောင်းလော့-က် များဂေဟယ်။

⁹ သူးနှိလေဟာ မုလေဂီးရဲ့ ရရာတိုင်း ကုလယံဟူနေရာ
 ဟို့ တတ်လာဂေဘီး သန်ရှင်းသူလေရဲ့ တပ်စခန်းနဲ့ ရှစ်ဇာ
 ကောင်းဟူမြို့ဟို့ ဝိုင်းဟွားဂေဟယ်။ အယ်ခီမာ ကောင်း
 ဂန်ဘောင်းဟု မီးဟာ ကုလလာဘီး သူးနှိလေဟာ လောန်
 ဘီးဟာ ဖျစ်ဆီးခံရဂေဟယ်။

¹⁰ သူးနှိဟို့ လှည့်ဇားဟူ မာရ်နတ်ဟို့လည်း သားရဲ့နဲ့ ပ
 ရောဖက်တုယောန်ရှိဟူ၊ ကန်နရောဟွားဟူ မီးအိုင်ထဲဟို့ ပ
 စ်ခလရှင်းဟို့ ခံရဟယ်။ သူးနှိလေဟာ နေရောညဉ့်ရော
 ကမ္ဘာဆစ်ဆစ် ညဉ့်ဆဲရှင်းဟို့ ခံရဂေလေ့မယ်။

နော-က်ဆောင်း တရားစီရင်ဟူကြောန်း

¹¹ အယ်ဘီးနဲ့ ဖုလူဟူပလုလင်ဂီးနဲ့ အယ်ပလ္လင်ထတ်မာ
 ထိုင်နေဟူ သခင်ဟို့ ငါဟာ မြင်ရဟယ်။ ကောင်းဂန်နဲ့ မု
 လေဂီးဟာ အယ်သခင်ရဲ့ရှေ့မာ ပျော့-က်ဟွားဘီးဟာ နေ
 ဟို့နေရာ မေ့ဟုမ်း။

¹² ရင်ဟုသေဟွားဂေဟူ ကီးငယ်လေဟာ ပလ္လင်ရှေ့မာ
 ရပ်နေရှင်းဟို့ ငါမြင်ရဟယ်။ စာစောန်လေဟို့ ဖွမ်ဟွား
 ဘီး သတ်စာစောန်နဲ့ တခြားစာစောန်ဟို့လည်း ဖွမ်ဟွား
 ဟယ်။ ရင်ဟုသေဟွားဟူ သူလေဟာ အယ်စာစောန်လေ
 မာ ရေးဟွားတိုင်း သူးနှိလေရဲ့ လောက်ဟူမုလေတိုင်းဘဲ
 တရားစီရင်ရှင်းဟို့ ခံရဂေဟယ်။

¹³ ပန်လယ်ဟာ သူမာရှိဟူ လူသေလေဟို့ ပေးလေ
 ဟယ်။ သေရှင်းနဲ့ မရဏာနိုင်ငံလေဟုလည်း သူမာရှိဟူ
 လူသေလေဟို့ ပေးလေဟယ်။ အယ်ခီမာ လူလေ ဂူလော

င်းဟာ သူးနို့ လောက်ဟားဟူတိုင်း တရားစီရင်ရှင်းဟို့ ခံရဂေဟယ်။

¹⁴ အယ်ဘီးန သေရှင်းန မရဏာနိုင်ငံဟုလည်း မီးအိုင်ထဲဟို့ ပစ်ခဲလရှင်းဟို့ ခံရဂေလေ့မယ်။ (အယ်မီးအိုင်ဟာ ဒုတိယ သေရှင်း ဖြစ်ဟယ်။)

¹⁵ သတ်စာစောန်မာ စာရင်းဝမ်ဘဲဟူသူ ရှိမျှဟို့လည်း မီးအိုင်ထဲဟို့ ပစ်ခဲလရှင်းဟို့ ခံရဂေဟယ်။

21

ကောန်းဂန်သစ်န မုလေဂီးသစ်

¹ အယ်ဘီးန ကောန်းဂန်သစ်န မုလေဂီးသစ်ဟို့ ငါမြင်ရဟယ်။ ဖြားဖြစ်ကြောန့်နူးဆိုဟာ ရင်ဟု ကောန်းဂန်န မုလေဂီးဟာ ပျော့-က်ဟားဘီး ပန်လယ်လေလည်း မွေဟုမ်း။

² အယ်ဘီးဟာ သန်ရှင်းဟူ ယေရုရှလင်မြို့သစ်ဟာ ခွီးသားတွပ် တန်ဆာဆင်ဟားဟူ ခွီးသမီးမျိုး ပြင်ဆင်ဘီး ဘုရားသခင်နားဟု ကောန်းဂန်ဘောင်ဟု ဆင်းလာဇာဟို့ ငါမြင်ရဟယ်။

³ အယ်ဘီးန ပလ္လင်ထဲဟု ရရာတိုင်း ကုလယ်ဟူသံဟု “ကေ့ကေ့ပါ။ ဘုရားသခင်နေဟူ တံတော်ဟာ လူလေထဲမာရှိဘီး ကိုယ်တော်ဟာ သူးနို့နတူးဒု စံမြန်းမယ်။ သူးနို့ဟုလည်း ကိုယ်တော်ရဲ့ လူမျိုးတော်ဖြစ်ဂေဘီး၊ ဘုရားသခင်

ကိုယ်တိုင် သူးနို့လေနရှိဘီး သူးနို့လေရဲ့ ဘုရားသခင် ဖြစ်
တော်မူမယ်။

⁴ ကိုယ်တော်ဟာ သူးနို့လေရဲ့ မျစ်စိဟု မျစ်ရယ်ရှိမျှဟို့
သုပေးလေ့မယ်။ သေရှင်းလည်း ရှိဟို့မူဘီ။ ဝန်းနဲကြွကွဲ
ဇာ၊ ငိုဇာန နာကျင်ဟူ ဝေဒနာလေလည်း ရှိဟို့မူဘီ။ ပြား
ဖြစ်ကြောနဲ့ဆိုဟာ ရင်းရင်ဒူးဟု ဖြစ်ဟူးဟူ ဇာလေဟာ
ပျော့-က်ဟူးဘီ” ဆိုဘီး ပြောဇာဟို့ ငါကြားရဟယ်။

⁵ ပလ္လင်ထတ်မာ ထိုင်နေဟူ သခင်ဟုလည်း “ကေ့ကေ့
ပါ။ ငါဟာ ဂူလောင်းဟို့ သစ်ဖြစ်စေဟယ်” ဆိုဘီး မိန့်
တော်မူဘီးန အယ်စကားဟာ သစ်စာစကား၊ မှန်ဟူစကား
ဖြစ်ဟူကြောနဲ့ ရေးဟူးပါ ဆိုဘီး မိန့်တော်မူလေဟယ်။

⁶ မူပီးဘီ။ “ငါဟာ အာလဖန သြမေဃဖြစ်ဟယ်။ စန
ဆောင်းလည်း ဖြစ်ဟယ်။ ရေငတ်ဟူသူဟို့ သတ်စမ်းရေ
ဟို့ ဖိုးယူဘဲနပေးဟယ်။

⁷ အောန်မြင်ဟူသူဟာ အယ်ဇာလေဟို့ မွီဆစ်ခံရလေ့
မယ်။ ငါဟာ သူ့ရဲ့ ဘုရားသခင်ဖြစ်မယ်။ သူဟုလည်း ငါ
ရဲ့ သားမီးလေ ဖြစ်လေ့မယ်။

⁸ အယ်ဘေမဲ့ ကြော့-က်တတ်ဟူသူလေ၊ ယောင်ကြည်
ဘဲဟူသူလေ၊ ရွံဇာကောန်းဟူသူလေ၊ လူသတ်ဟူသူလေ၊
တရားဘဲဟူမေထုန် လောက်ဟူသူလေ၊ ပြုစားဟူသူလေ၊
ရောက်ထုဟို့ ကိုးကွယ်ဟူသူလေန လီညာဟူသူ ဂူလော
င်းဟာ ကန်နုလောန်နေဟူ မီးအိုင်ထဲဟို့ ရော့-က်ရဂေ့လေ့
မယ်။ အယ်ဇာဟာ ဒုတိယ သေရှင်းဖြစ်ဟယ်” ဆိုဘီး မိန့်

တော်မူလေဟုယ်။

ယေရုရှလင်မြို့သစ်

⁹ အယ်ဘီးန နှော့-က်ဆောင်းဘေးဒန် ခွန်နစ်ခုနုပုလဲ
နေဟူ ဖလားခွန်နစ်လောင်းဟို့ ကိုင်ဟားဟူ ကောန်းဂန်
တမန် ခွန်နစ်ပါးထဲဟု တပါးဟာလာဘီး ငါနစကားပြော
ဘီး “လာပါ။ သိုးသားဂန်းဟားရဲ့ မီးမဖြစ်ဟူ ဒို့သမီးဟို့
ငါပြမယ် ဆိုဘီး” ငါ့ဟို့ ပြောဟုယ်။

¹⁰ အယ်ကောန်းဂန်တမန်ဟု ရရာတိုင်း ကီးဘီး ဖြစ်
ဟူတောန်ထတ်ဟို့ ဝိညာဉ်တော်အားဖြင့် ငါ့ဟို့ ခေါ်ဆောန်
ဟားဘီး ဘုရားသခင်နားဟု ကောန်းဂန်ထတ်ဟု ဆင်းလာ
ဟူ သန်ရှင်းဟူ ယေရုရှလင်မြို့ဟို့ ငါ့ဟို့ ပြလေဟုယ်။

¹¹ အယ်မြို့ဟာ ဘုရားသခင်ရဲ့ ဖောင်းသရေတော်န ပု
လဲဇောင်ဘီး လန်းရောန်ဟာ ကုလော့-က်မြတ်ရတနာနတူ
ဘီး ကုလော့-က်သလင်းမျိုး ရရာတိုင်း လန်းနေဟူ နဂါး
သွဲ့ကုလော့-က်မျိုး ဖြစ်ဟုယ်။

¹² အယ်မြို့မာ ရရာတိုင်း ကီးဘီး ဖြစ်ဟူမြို့ရိုးရှိဘီး
ခွဗော့-က်ဆယ်နေ့ပေါ့-က် ရှိဟုယ်။ ခွဗော့-က်လေမာ
ကောန်းဂန်တမန် ဆယ့်နေ့ပါးရှိဘီး အယ်ခွဗော့-က်ထတ်
မာ ကူသရေလလူမျိုးလေရဲ့ မျိုးနွယ်စု ဆယ့်နေ့နွယ်လေ
ရဲ့ နာမယ်လေဟို့ ရေးဟားဟုယ်။

¹³ ရှေ့ဖတ်မာ ခွဗော့-က်သောင်းပေါ့-က်၊ မြေ့-က်
ဖတ်မာ ခွဗော့-က်သောင်းပေါ့-က်၊ တောန်ဖတ်မာ ခွ

ဗော့-က်သောင်းပေါ့-က်၊ နော့-က်ဖတ်မာ ခွဗော့-က်
သောင်းပေါ့-က် ရှိဟယ်။

14 မြို့ရိုးဟာ အုပ်စုဆယ့်နှစ်ခုရှိဘီး အယ်ထတ်မာ
သိုးသားဂန်းဟားရဲ့ တမန်တော် ဆယ့်နှစ်ပါးလေရဲ့ နာ
မယ်ဆယ့်နှစ်ခုဟို့ ရေးဟားဟယ်။

15 ငါန စကားပြောဟူ ကောန်းဂန်တမန်မာ အယ်မြို့ဟို့
ရော၊ မြို့ရဲ့ခွဗော့-က်န မြို့ရိုးဟို့ရော တိုင်းဟို့တွပ် တိုင်း
ဇာ ရွှေကျူလောင်းရှိဟယ်။

16 အယ်မြို့ဟာ လေးထောင့်ပေါင်ရှိဘီး လျားနနဟာ တူ
ဟယ်။ ကောန်းဂန်တမန်ဟာ ရွှေကျူလောင်းန မြို့ဟို့တို
င်းဟူ ခီမာ မိုင်ပေါင်း ၁,၃၈၀ လော့-က် ရှိဘီး လျား၊ နံ၊
မြစ်လေဟာ တူဂေဟယ်။

17 မြို့ရိုးဒုဟို့လည်း တိုင်းဟူ ခီမာ ကောန်းဂန်တမန် တို
င်းဟူဇာရော၊ လူလေတိုင်းဟူဇာအားဖြင့် မြစ်* ၂၁၆ ပေ
ရှိဟယ်။†

18 အယ်မြို့ရိုးဟို့ နဂါးသွဲ့ကုလော့-က်န ဆော့-က်ဟား
ဘီး မြို့ဟာ ရရာတိုင်း လန်းဟူ ဖန်သားမျိုး ကြည်လင်
ဘီး ရွှေစင်ဖြစ်ဟယ်။

19 မြို့ရိုးရဲ့ အုပ်စုဟို့ ကုလော့-က်မြတ်ရတနာ ဘော
န်းဇောင်န တန်ဆာဆင်ဟားဟယ်။ ပထမ အုပ်စုဟာ
နဂါးသွဲ့၊ ဒုတိယ အုပ်စုဟာ နီလာ၊ တတိယ အုပ်စုဟာ

* 21:17 ၂၁.၁၇ မြစ်၊ အယ်မျိုးမူဟုဆိုဟာ ထူ။ † 21:17 ၂၁.၁၇
ဂရိကျမ်းရဲ့ ခန်းငယ် ၁၆ န ၁၇ ထဲမာ “၁၂,၀၀၀ ဖာလုံ” န “၁၄၄ ကုဗပေ”
ဆိုဘီး ဖော်ပြဟားဟယ်။ အယ်တိုင်းတာဟာ ပေါင်ဆောန်ချစ် ဖြစ်နိုင်ဟယ်။

မဟူရာ၊ စတုတုထဟာ မြ၊

²⁰ ပဉ္စမ ပြစ်ဟာ ကြောင်၊ ဆဋ္ဌမ ပြစ်ဟာ ပတ္တမြား၊ သတ္တမ ပြစ်ဟာ သလင်းဝါ၊ အဋ္ဌမ ပြစ်ဟာ မျက်ရွဲ၊ နဝမ ပြစ်ဟာ ဥဿဖရား၊ ဒသမ ပြစ်ဟာ မဟူရာစိမ်း၊ ဧက ဒသမ ပြစ်ဟာ နီလာသွီး၊ ဒွါဒသမ ပြစ်ဟာ နီလာခရမ်းလေ ဖြစ်ဂေဟယ်။

²¹ မြို့ခွဗော့-က် ဆယ့်နှေ့ပေါ့-က်လေဟာ ပုလဲဆယ့်နှေ့လောင်းဖြစ်ဂေဘီး ခွဗော့-က်တဗော့-က်မာ ပုလဲတလောင်းစီန လောက်ဟားဟယ်။ မြို့ရဲ့ လမ်းမဟာ ရရာတိုင်း စင်ကြယ်ဟူ ဖန်သားနတူဟူ ရွှေစင်ဖြစ်ဟယ်။

²² အယ်မြို့မာ ဗိမာန်တော်ဟို့ ငါတို့ရဟု။ ဖြားဖြစ်ကြောန့်နဲ့ဆိုဟာ အနန္တတဂိုးန ပုလဲဇောင်ဟူ ဘုရားသခင်နသိုးသားဂန်းဟားဟာ အယ်မြို့ရဲ့ ဗိမာန်တော်ဖြစ်ဟယ်။

²³ ဘုရားသခင်ရဲ့ ဖောင်းသရေတော်ဟာ အယ်မြို့ဟို့ လန်းစေဘီး သိုးသားဂန်းဟားဟာ အယ်မြို့ရဲ့ ဆီမီးဖြစ်ဟူကြောန့် အယ်မြို့ဟို့ လန်းစေဟူကြောန့် နေန လလေဟို့ လိုအပ်ဟု။

²⁴ လူမျိုးဘောင်းဇောင်ဟာ အယ်မြို့ရဲ့ လန်းရောန့်ဟို့ မှီပြုဘီး သွားလာဂေလေမယ်။ မုလေဂီးမာရုံဟူ မန်းဂီးလေဟာ သူးနို့လေရဲ့ ဖောင်းသရေတော်ဟို့ အယ်မြို့ထဲဟို့ ယူဆောန်လာဂေလေမယ်။

²⁵ အယ်နေရာမာ ညဉ့်မေ့ဘဲဟူကြောန့် မြို့ခွဗော့-က်လေဟို့ ဖယ်ခါလည်း ပိဟားဟု။

26 လူမျိုးဘောန်းဇောင်ဟာ ဖောင်းသရေတော်န ဂေါင်သရေလေဟို အယ်မြို့ထဲဟို ယူလာဂေ့လေ့မယ်။

27 စင်ကြယ်ဘဲဟူဇာ ခုလည်း အယ်မြို့ထဲဟို ဝမ်ရဟို မှဟူ။ ရှုံဇာကောန်းသူန လီညာသူလေလည်း ဝမ်ရဟို မှဟူ။ သိုးသားဂန်းဟားရဲ့ သတ်စာစောန်မာ စာရင်းဝမ်ဟူ သူလေဟဘဲ့ ဝမ်ရဂေ့လေ့မယ်။

22

1 အယ်ဘီးန ကောန်းဂန်တမန်ဟာ ကုလော့-က်သလင်းမျိုး ရရာတိုင်း လန်းဘီး တော့-က်ပနေဟူ သတ်ရေစီးဟူမှ လစ်ဟို ငါ့ဟို ပြလေဟယ်။ အယ်မှလစ်ဟာ ဘုရားသခင်န သိုးသားဂန်းဟားရဲ့ ပလုလင်ဟုထွပ်ဘီး

2 မြို့ရဲ့ လမ်းမလယ် တရှော့-က်လောင်းဟို စီးဆင်းနေဟယ်။ မှလစ်ရဲ့ တဖတ်မာ ဆယ့်နှေ့မျိုးသီးဟူ၊ တလဟို တခါသီးဟူ၊ ဆယ့်နှေ့ခါသီးဟူ သတ်ပန်ရှိဟယ်။ အယ်ပန်ရဲ့ ဝပ်ဟု လူမျိုးဘောန်းဇောင်ဟို ကျန်းမာစေဟယ်။

3 ကီဆဲခံရဇာ ခုလည်း ရှိဟိုမှဘီ။

ဘုရားသခင်န သိုးသားဂန်းဟားရဲ့ ပလုလင်ဟာ အယ်မြို့မာရှိဘီး ကိုယ်တော်ရဲ့ စေခံလေဟာ ကိုယ်တော့်ဟို ကိုးကွယ်ဂေ့လေ့မယ်။

4 သူးနို့ဟာ ကိုယ်တော်ရဲ့ မျစ်နှာဟို မြင်ရဂေ့လေ့မယ်။ ကိုယ်တော်ရဲ့ နာမတော်ဟုလည်း သူးနို့ဖူးမာ ရှိဂေ့လေ့မယ်။

⁵ ညဉ့်လည်းရှိဟို့ မှဘီ။ ဘုရားသခင်ဟာ သူးနှိဟို့ လန်းရောန်ပေးဟူးဟူကြောန့် ဆီမီးရဲ့ လန်းရောန်န နေရဲ့ လန်းရောန်လေဟို့လည်း လိုအပ်ဟို့ မှဘီ။ သူးနှိဟာ ကမ္ဘာဆစ်ဆစ် အောက်စိုးဂေ့လေ့မယ်။

ယေရှုကြွလာဟူကြောန်း

⁶ အယ်ဘီးန ကောန်းဂန်တမန်ဟု “အယ်စကားဟာ သစ်စာစကား၊ မှန်ကန်ဟူ စကားဖြစ်ဟယ်။ ပရောဖက်လေရဲ့ ဝိညာဉ်လေဟို့ ပိုင်ဟူ ဘုရားသခင်ဟာ ကြာခန်မာ ဖြစ်ရဟို့ ဇာလေဟို့ သူရဲ့ စေခံလေဟို့ ပြဟို့တွပ် သူရဲ့ ကောန်းဂန်တမန်ဟို့ လွတ်လိုက်ဟယ်” ဆိုဘီး မိန့်တော်မူလေဟယ်။

⁷ ယေရှုဟု “နားထောန်ပါ။ ငါဟာ မြန်းမြန်ဟူးလာမယ်။ အယ်စာစောန်ထဲမာ ပရောဖက်ပြုဘီး ဟောပြောဟူ စကားလေဟို့ လိုက်နာဘီး စောန်ထီးဟူသူဟာ မင်္ဂလာရှိဟယ်” ဆိုဘီး မိန့်တော်မူဟယ်။

⁸ ငါယောဟန်ဟာ အယ်ကြောန်းရာလေဟို့ မြင်ရကြားရဟူသူ ဖြစ်ဟယ်။ ငါဟာ မြင်ရကြားရဟူ ခီမာ အယ်ဇာလေဟို့ပြဟူ ကောန်းဂန်တမန်ဟို့ ကိုးကွယ်ဟို့တွပ် သူရဲ့ ခေရင်းမာ ပျပ်ဝပ်ဟူ ခီမာ၊

⁹ သူဟု “အယ်မျိုးလောက်န။ ငါဟာ နန်ဟုနေစဘီး နန့်ရဲ့ညီကိုလေ ဖြစ်ဂေ့ဟူ ပရောဖက်လေန အယ်စာစောန်မာ ပါဟူ စကားလေဟို့ လိုက်နာစောန်ထီးဟူ သူလေရဲ့ စေခံ

ဖြစ်ဟုယ်။ ဘုရားသခင်ဟို့ ကိုးကွယ်ပါ” ဆိုဘီး ပြောဟုယ်။

10 အယ်ဘီးန ကောန်းဂန်တမန်ဟု “အယ်စာစောန်ထဲမာ ပရောဖက်ပြုဟူ စကားလေဟို့ ဇီခပ်န။ ဖြားဖြစ်ကြောန်နူး ဆိုဟာ ခီဟာ နီးကပ်လာဘီ။

11 တရားဘဲဟူသူဟာ ဆစ်ဘီးဟာ တရားဘဲဟူဇာ ဟို့ လောက်ပါစေ။ ညစ်ညူးဟူသူဟာ ညစ်ညူးဘီး နေပါစေ။ ဖြောန်မတ်ဟူသူဟာ ဆစ်ဘီးဟာ ဖြောန်မတ် ဟူမဟို့ လောက်ပါစေ။ သန်ရှင်းဟူသူဟာ ဆစ်ဘီးဟာ သန်ရှင်းပါစေ” ဆိုဘီး ငါ့ဟို့ပြောဟုယ်။

12 ယေရှုဟု “နားထောန်ပါ။ ငါဟာ မြန်းမြန်ဟူးလာ မယ်။ ငါပေးဟို့ ကျိုးပြစ်လေဟို့ ယူလာဘီး လူလေ ဂူ လောင်းဟို့ သူးနို့လောက်ဟူ ဇာလေတိုင်း ငါပေးမယ်။

13 ငါဟာ အာလဖန ဩမေဃလည်း ဖြစ်ဟုယ်။ ဦးဆောင်းန နှော-က်ဆောင်းဖြစ်ဘီး စနဆောင်းလည်း ဖြစ်ဟုယ်။

14 “ကိုယ့်ရဲ့ ဝတ်လောင်ဟို့ လျော်ဘီး ဖုလူအောန်လောက်ဟူ သူဟာ သတ်ပန်ရဲ့သီးဟို့ စားရဟူခွမ်န ခွဟော-က် ဟုနေဘီး မြို့ထဲဟို့ ဝမ်ရဟူခွမ်ဟို့ ရဂေဟူ သူလေဟာ မင်္ဂလာရှိဂေဟုယ်။

15 ပုလန်မာဟု ခိုးဖြစ်ဟူသူ၊ ပြုဇားတတ်ဟူသူ၊ တရား ဘဲဟူ မေထုန်လောက်ဟူသူ၊ လူဟို့သတ်ဟူသူ၊ ရောက်ထု

ဟို့ ကိုးကွယ်ဟူသူန မုသားဟို့ နှစ်သက်ဘီး ကျင့်ဂေဟူသူ
လေ ရှိဂေဟယ်။”

16 “ငါယေရှုဟာ သင်းတော်လေတွပ် အယ်ကြာန်းရာ
လေဟို့ နန်းနို့ဟို့ သတ်သေခံဟို့တွပ် ငါ့ရဲ့ ကောင်းဂန်တ
မန်ဟို့ လွတ်လိုက်ဟယ်။ ငါဟာ ဒါဝိဒ်ရဲ့ မှလစ်န မျိုးနွယ်
ဖြစ်ဘီး ရရာတိုင်း လန်းဟူ မိုးသော့-က်ကြယ် ဖြစ်ဟယ်”
ဆိုဘီး မိန့်တော်မူဟယ်။

17 ဝိညာဉ်တော်န ဒို့သမီးလေဟာ “လာဂေပါ” ဆိုဘီး
ပြောဟယ်။

ကြားရဟူသူဟုလည်း “လာဂေပါ” ဆိုဘီး ပြောဂေစေ။
ရေငတ်ဟူသူဟာ လာပါစေ။ သတ်ရေဟို့ လိုရှင်ဟူသူ
ဟာ အလဂါး ယူပါစေ။

နိဂေါင်း

18 အယ်စာစောန်မာပါဟူ ပရောဖက်ပြုဘီး ဟောပြော
ဟူ စကားလေဟို့ ကြားရဟူ သူတိုင်းဟို့ ငါ့သတ်သေခံ
ရှင်းလေဟို့ ဖယ်သူဘဲဖြစ်ဖြစ် သစ်ပုလန်ထဲမယ် ဆိုဟာ
ဘုရားသခင်ဟာ အယ်စာစောန်မာ ရေးဟွားဟူ ဘေးဒန်
လေဟို့ အယ်သူထတ်မာ ရော့-က်စေလေ့မယ်။

19 ဖယ်သူဘဲဖြစ်ဖြစ် အယ်ပရောဖက်ပြုဘီး ဟောပြော
ဟွားဟူ စာစောန်ထဲမာ စကားလေဟို့ ဖယ်ပစ်မယ် ဆိုဟာ
အယ်စာစောန်မာ ရေးဟွားဟူ သတ်ပန်နရော၊ သန်ရှင်းဟူ
မြို့ဟို့ရော၊ အယ်သူနဆိုင်ဟူ ဇာလေဟို့ရော ဘုရားသခင်
ဟာ နှုတ်လေ့မယ်။

²⁰ အယ်ကြောန်းရာလေဟို သတ်သေခံဟူ သခင်ဟာ
“မှန်ပါဟယ်! ငါဟာ မြန်းမြန်ဟူးလာမယ်!” ဆိုဘီး မိန့်
တော်မူလေဟယ်။

အာမင်! သခင်ယေရှု ကြွလာတော်မူပါ!

²¹ သခင်ယေရှုရဲ့ ကျေးဇူးတော်ဟာ သန့်ရှင်းဟူသူ ဂူ
လောင်း*နတူးဒူ ရှိပါစေ။ အာမင်။

* **22:21** **၂၂.၂၁** ဂူလောင်း၊ တချို့ မူရင်းလတ်ရေးမူလေမာ ဘုရားသခင်ရဲ့
လူမျိုးတော်၊ ဆိုဘီး ပါရှိဟယ်။ တခြား မူရင်းလတ်ရေးမူလေမာ
ဘုရားသခင်ရဲ့ လူမျိုးတော်လေ ဂူလောင်း၊ ဆိုဘီး ပါရှိဟယ်။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1